

萬 有 文 庫

第 二 集 七 百 種

王 雲 五 主 編

甌 北 詩 鈔

(四)

趙 翼 撰

商 務 印 書 館 發 行

甌北詩鈔

(四)

撰 龔 棻

國學基本叢書

編主五雲王  
庫文有萬

種百七集二第

鈔 詩 北 甌  
冊 四

中華民國二十四年九月初版

撰 者 趙 翼

發 行 人 王 雲 五  
上海河南路

印 刷 所 商 務 印 書 館  
上海河南路

發 行 所 商 務 印 書 館  
上海及各埠

五五六六

祥

# 甌北詩鈔七言律六

己未元旦

飲罷餘酥最後觴。履端復此慶農祥。觀書眼暗情猶戀。思子臺空痛未忘。老閱年光如愈駛。閒無日課轉尋忙。青紅省記兒童事。七十年前上學堂。

大行太上皇帝升遐恭輓四章

堯年寒積雪差<sub>去臘大雪</sub>。龍馭俄傳上絳河。壽到耄期千古少。功兼創守一身多。人悲送佛歸靈竺。天爲迎

賓掃大羅。六十餘年恩澤溥。那禁薄海淚滂沱。

聖德神功邁百王。內綏區宇外開疆。直無一事留餘憾。惟有千秋頌不忘。治媿勳華金大定。金世宗紀人稱小堯舜。

政嚴綜核漢元康。邛隆不侈云亭禪。彌見持盈有道長。

宮開德壽晚延暉。預簡元良授萬幾。付託得人堪脫屣。昇平繼體正垂衣。納從舜麓艱先試。見有堯羹色

豈遠。陟降在天應大慰。紹庭一樣切民依。

忝竊朝簪二十年。入供館閣出籌邊。每叨除授皆親筆。京察記名。出守兩粵。從軍滇南。擢貴西道。皆出特旨。歸免饑寒尙俸錢。搏頽

有哀頻搶地。攀髯無路但號天。也知草莽悲何益。回首觚稜淚自漣。



感事

相星忽報坼中臺。恩寵由來是禍胎。共識都盧撞最險。不虞霹靂斧真來。姓名久屬千夫指。氣燄俄消一寸灰。老去香山感時事。龍門詩豈幸人災。

梁家朱异漢江充。都在英君駕馭中。只覺可供驅使便。誰知已竊笑嚙工。九天咳唾風雲變。四海苞苴杼軸空。好個家居幾撞壞。豈容還作黑頭公。

聞道鈴山簿錄時。世間無此擁高貲。窖金已鑄藏舟壑。井鉤兼裝激溜池。豈憶出身從委巷。依然空手赴

冥司。可憐臨死猶癡甚。又想黃樓五丈旗。井鉤見新唐書王鉞傳

秋風賓客孟嘗門。頃刻炎涼局頓翻。往日肉羶趨螞蟻。祇今樹倒散猢猻。尙憂瓜蔓抄將及。轉恐冰山倚有痕。太息沙堤高閣裏。一時多少未招魂。

邸抄

九霄默運斗杓旋。第一先收佞倖權。龍袞班高將極品。雞棲樹老已多年。灰釘敢效壘臣乞。帷蓋猶蒙聖主憐。從此百僚咸動色。要津誰復敢蚤緣。

詔下人人感涕流。同民好惡見皇猷。芻蕘博採千官疏。花萼相輝百尺樓。黃髮召歸龍尾道。翠雲焚卻雉頭裘。由來乙夜觀今古。總作璇樞布政優。

連日大僚多暴亡相傳爲失奧援懼株累也口語無稽書以一笑

鈴閣俄聞蒿里聲。馬肝共說食文成。一抔土縱堪逃禍。萬口碑終不徇情。豈比遊仙雲鳥去。剩攜使鬼紙錢行。只憐自古誰無死。偏與人傳破膽驚。

兩村書中謂督學廣東時余子以拙刻贊謁厚贖而去僕初未有子入粵也蓋他人假名干謁耳書以一笑

一紙書來事大奇。老夫被販不曾知。是誰甘謂他人父。願我從無外舍兒。表丈不妨聊暫借。見唐摭言李播事故人且免去窮追。見葉石林玉潤雜書楊衡事只慚畫餅名何用。未足供渠干謁資。

### 擬老杜諸將之作

西南蛇豕尙縱橫。倏擾遙傳遍列城。民被賊驅多作賊。將嫌兵少屢增兵。風腥滿路尸陀氣。月黑千山杜宇聲。率土清甯秦蜀擾。蒼茫天意迥難明。

萑苻未掃一年遲。特起蒼頭又幾支。奔迸人皆半穀觶。飛揚賊有虎胭脂。中多女賊徵兵空歷重關險。駐旅曾無一矢遺。總爲修羅能障日。遷延釀禍至今貽。

盛世何因發殺機。追原禍始定誰歸。時平官橐竄民力。亂起兵塵費國威。尙倖脫身逃鼎鑊。可應填腹飽珠璣。如何明詔教彈劾。不見封章到瑣闈。

露布頻聞奏捷書。揭竿隳突益焚如。城空官已同疣贅。賊過兵皆拾唾餘。風鶴警來惟早避。幕烏啼處且安居。也知草竊成何事。只是何人去勦除。

兵聞拙速久難工。初起潢池易掃空。將略誰防滋蔓後。軍儲徒耗養癰中。頻年坐甲芒俱頓。今日需糧力漸窮。那不令人思賈鄧。專征出每早成功。

益州沃野錦成堆。今日川原半草萊。刮地搜殘深窖粟。連營炊散畫梁灰。焦頭救已愁災熾。生齒繁應有劫來。好片平疇荒不種。清泉灑灑浸蒼苔。

堅壘深溝各保家。村村團結拒車巴。匹夫倡義皆肝胆。衆志成城亦爪牙。獷鹵莫嗤包疙疸。驍雄或有郭蝦蟆。見金史皆鄉民起義者勇於公戰非私鬪。獎勵還應式怒蛙。

早敷解澤散妖氛。梟獍何知竟罔聞。祝網已開生路走。死灰偏熾燎原焚。紆遲充國屯田議。辛苦相如諭蜀文。不勦斷無招撫法。亟須一挫犬羊羣。

喜聞勁旅發三韓。新調黑龍江兵從此軍應薙草菅。萬騎無聲秋入塞。千盤有路曉搜山。烟騰列竈連天熱。風勁雕弓滿月彎。早晚綠林俱掃迹。歡聲笳鼓唱刀環。

三十餘年臥故林。何期戎馬動愁吟。無才徒作憂時語。未死終懸報國心。烽火何時停戰伐。江山依舊好登臨。老來光景無多日。要聽銷兵大凱音。

蔣時南中丞致政後特詔起總督漕運淮壩相晤敬賦奉呈末章兼寄費芸浦制府二公皆余門下士也

數歷巖疆宿望崇。引年人更仰高風。帝因轉粟煩劉晏。人比懸車起潞公。威令早行升會減。苦心仍濟舳艫窮。一封愷切論漕政。共識儒臣體國忠。

致政歸田鬢已絲。何當重作出山時。老求身退偏難退。清畏人知己共知。薊闕陳情詞懇款。秦關回首路逶遲。祇應天假良緣便。白首師生再見期。

桃李門牆樾蔭叨。三江節度八州漕。射堂演武森千騎。畫簿催綱押萬艘。愧比王通羅將相。敢誇裴皞識英豪。一莊兩督增光處。不在官高在品高。

### 新豐道中

過江風峭片帆輕。沽酒新豐又半程。高岸土留開鑿迹。獨輪車碾輓轆聲。餘糧棲畝鴉猶啄。疎雨膏田犢已耕。向晚市橋燈火滿。郵籤早到呂蒙城。

### 華墅

近遊百里覽郊原。柔櫓來過華墅村。山勢不高猶翠色。江流雖近少潮痕。朽株葉借籐牽蔓。崩岸泥懸樹絡根。東去相傳多古蹟。暨陽城控海爲門。

重過靈巖山館

靈巖山館好菟裘。老友重過淚暗流。嗣祖早亡猶是福。武安若在恐難留。春風亭榭花誰看。落日林巒鳥自投。終是生平風雅報。及身得免喚朱游。漢書蕭望之傳

旌麾三楚鎮雄繁。預擬歸開北海樽。侍地猶依探香徑。籍官幸免奉誠園。會心魚鳥應餘慨。過眼雲烟尙有痕。太息平泉空作記。不曾終老此邱樊。

葺屋

老屋多年滿壁塵。一番補葺稍從新。愧無北海樽盈座。幸有東坡宅作鄰。東坡舊寓孫氏宅。距余舍數十步。水閣自明無月夜。後有水閣。臨白雲渡。山茶獨占滿城春。山茶一株。大合抱。爲常城第一。三閭馬磨誰還記。閒與兒孫說舊貧。

蔣瑩溪別駕館愛妾於揚州過江來寓戲贈

滿天風雨渡江來。軟腳筵從別館開。難得美人分鏡待。正當侍婢賣珠迴。冶遊喜有藏嬌屋。僑寓兼爲避債臺。亟與綢繆消別恨。莫教擁髻夜啼哀。

金子友來乞楹帖。其家住太平寺旁。門臨大池。余爲書鳥宿池邊樹。僧敲月下門。一聯適有尼庵亦來乞桃符。僮奴不知卽以此付之一時。見者傳爲笑資。賦此懺解。

一聯悞到散花居。掩口胡盧遍里閭。豈敢戲留題鳳字。或疑錯寫弄麀書。翻經香奩重簾靜。繡佛燈搖四

壁虛亟與阿師勤懺悔。手抄梵英鎮精廬。

洪稚存編修以言事遣戍伊犁蒙恩赦回誌喜

九死投荒得賜環。德音一道萬人歡。遄歸不待烏頭白。起廢行遷鶴頂丹。令甲二品以上。冠紅珊瑚頂。骨鍊冰霜逾勁節。詩添沙漠有奇觀。直聲已震難回枉。成就先生作好官。

劉檀橋編修六十壽詩

官職聲名兩並全。少登館閣老歸田。風情鍾乳三千兩。聲伎銀箏十五絃。投轄陳遵無晝夜。吹笙子晉本神仙。行年六十稱觴樂。已勝他人百廿年。

稚存歸里賦贈

已分長流萬里程。豈期絕徼得歸耕。命逃柴市歐刀血。夢應天山老樹精。君幼時屢夢至萬松林。今過天山。千里皆松。恍如夢中所見。文士例嘗遷客味。聖朝不忌直臣名。賜環應捧恩綸泣。不待三年召賈生。

生平豪氣隘寰區。事不驚人。不丈夫。出塞始知天地大。題詩多剗古今無。單車風雪孤征路。絕徼山川百戰圖。不敢慰君兒女語。昔人晚節倍艱劬。

讀史

歷歷興衰史冊陳。古方今病轍相循。時當暇豫誰憂國。事到艱難已乏人。九仞山纔傾簣土。一杯水豈救

車薪書生把卷偏多感。剪燭徬徨到嚮晨。  
水淺岷觴本易堙。涓涓不絕遂齋淪。孝經豈果驅狂賊。王法何能懼亂民。牛喫牡丹同百草。蟻擎粒米過千鈞。眼前看是潢池弄。恐費他時爛額人。  
頗聞臺省尙委蛇。風議爭嗤恤緯縻。謝傅圍棋雖故事。曹參醉酒是何時。瘍醫誤已癰疽潰。肉食謀仍燕雀嬉。一笑江村杜陵老。三重茅底獨憂思。

閒居效放翁體

卻老空閒服玉方。暗中不覺漸頽唐。兼金安得買酣睡。上藥不能醫健忘。邀客尋花消日永。呼僮說鬼道宵長。愛閒偏是閒難耐。始悟英雄種菜忙。

哭邵松阿

省垣好友一松阿。晝共清游夜共歌。如此忘形交有幾。翻悲歸老見無多。余兩人先後歸田。一晤君於杭州。一訪君於虞山。虛期深谷看紅葉。今年預約同看香谷紅葉。尙憶荒園踏綠莎。君在京寓趙天羽寄園與余比鄰。剩我白頭無藉在。寢門那禁淚滂沱。

獨立

青韶又閱一年春。死盡交游剩此身。地下轉多相識友。世間暗換一班人。漫將衰鈍稱前輩。誰與從容話昔因。獨立縱然能不懼。蒼茫四顧亦傷神。



驛柳詩和蔣立庵

驛邊垂柳裊風輕。萬縷千絲罨路程。露輶暫停應繫馬。戍樓相倚好聽鶯。蕭疎幾閱人來往。飄颻如隨吏送迎。堠館青葱堪入畫。輪蹄喧處有餘清。

臨風披拂最長條。似掃塵沙待客輶。記里標爲樊圃界。贈行折當灞陵橋。桓公北去悲華髮。陶穀南來狎細腰。何處靈和誇得地。江程尤易動魂銷。

幾家新綠映鞦韆。獨向郵塘冑野烟。館客快當千步幃。廐奴軟借一條鞭。三眠倦識征途苦。十里行逢密蔭圓。欲爲高柯徵故實。滁州古驛至今傳。滁州大柳驛爲趙普授徒處。

莫嗤弱質望秋零。垌野風塵已飽經。排列也同雙隻堠。清涼爭憩短長亭。寄梅人去青連隴。籌筆窗開綠滿庭。不比章臺惹攀折。春風愁煞小娉婷。

曾入詞人賦擅場。營名細柳館長楊。豈知得姓從天上。翻使攀條感道旁。滾滾絮粘泥路雨。垂垂絲瘦板橋霜。可憐老剩空腔在。徒與騶人作馬枋。

館垣淺不蔽車輪。有苑能令景色新。鋪白氍如迎貴客。舒青眼豈慰勞人。肯隨鬻駱同行路。猶爲歌驪縮去塵。生性纏綿本情種。故應獨占渡江春。

檀橋席上賦紅牡丹

姚黃魏紫已稱妍。高格還應讓絳仙。著到緋袍原富貴。映來紅袖倍嬋娟。寫生尙覺胭脂淡。吐豔偏爭鞞鞞鮮。莫惜倚闌留玩久。餘光猶鬪晚霞天。

稚存謂古來牡丹詩少有作正面文字者戲成四首索和

何處東風麗景繁。尺三花朵壓名園。大家氣象無寒態。本色胭脂有醉痕。一捻嬌含晨露濕。千層豔煽午風溫。生來性格原驕貴。肯向風塵漫托根。

庭前羯鼓漫相催。要費陽和氣力培。采石仙人宮錦坐。太原公子褐裘來。圓供正看兼翫看。豔愛全開勝半開。最是香魂奇幻處。有時結撰出重臺。

輕寒輕暖幾番過。釀出花天散曼陀。國色更無同輩比。春華獨占十分多。光能浮動神如活。香帶甜肥氣最和。讌賞不須憑酒醉。但看映面已微酡。膩粉濃丹發豔光。花頭端重不輕狂。自令芍藥甘爲婢。應與芝蘭並號王。曾記帶酥豪士送。未容插髻美人粧。腐儒愛惜中人產。也對深叢一舉觴。

水閣看夜船燈火

白雲渡口水明樓。看盡城中夜舫游。燈火頓成星海沸。亭臺都在月宮浮。三更歌管猶呼酒。兩岸簾櫳不下鉤。贏得老夫憑檻坐。聽人錯喚作遨頭。

莫愁湖

一片風漪望渺茫。湖名猶借美人香。始憐百尺胭脂井。不及雙棲玳瑁梁。異代別歸湯沐邑。游人猶愛水雲鄉。護持賴有風流守。兒女英雄兩不亡。前朝湖爲徐中山家所有。今其子孫尙收漁租。近年李松雲太守新葺湖上館宇。

隨園弔袁子才

小倉亭館記追攀。訪舊重來淚暗潸。勝會不常今宿草。名園無恙尙青山。詩文一代才人筆。花月平生散吏班。我亦暮年難再到。爲君多駐片時間。

偕孫淵如汪春田兩觀察游牛首山春田後余二十年作鎮安守述余舊事甚悉故末章及之

石城南望兩峯寒。勝侶相招躡翠鬟。海內幾人同逸興。江南無處不名山。地傳朱雀橋相直。路比黃牛峽易攀。衰老自憐難濟勝。層椒臨眺亦忘還。

拱衛金陵鎮上游。六朝遺跡至今留。天開都會蒼龍闕。地控郊原白鷺洲。松老都從千歲上。塏高更出萬峯頭。支筇自暢登臨興。肯爲山名感爽鳩。

宦跡南交已久忘。因君重憶舊巖疆。竭來兜率崖千級。山中追話華胥夢一場。豈有袴襦留叔度。空傳尸祝到庚桑。祇應先後同官遇。便似停鞭說故鄉。

喜廉船老友過訪兼以誌別

邗江悵別久離羣。白首重逢誼倍殷。斯世慙遺猶有我。頻年索處正思君。挑燈仍續聯吟興。聞笛還傷歎逝文。心餘瘦銅四十年前同輩幾。喜心翻到淚紛紛。

內姪劉懷英自綿州歸述川中已無賊賊皆聚鄖陽山中其勢漸衰官兵亦四面堵截數月內可掃平矣詩以誌喜

勦除喜信自川中。擄掠無資賊亦窮。狡窟雖遲深入計。周陸漸有合圍功。薪炊鄖嶺枯骸白。刀洗巴江熱血紅。不枉衰翁吟望苦。及身得見賦饗弓。

閱邸報同年馮魯巖總憲病歿詩以哭之

同年同直最情真。邸報驚傳遽飾巾。道遠不通音問久。官高常自簿書親。公常勤於吏牘掌綸樞府馳軍檄。直軍機處

久建節巖疆靖塞塵。巡撫點中至竟蓋棺勞績著。祭壇恩命自天申。特賜祭壇

征南重憶共軍門。公先隨明將軍征緬極目炎天瘴霧昏。公幸得還鷺尚跼。小猛育我來無用蝨空捫。指

馮渡江事前塵杳杳都成夢。舊雨茫茫易愴魂。今日更增聞笛感。同時幕府幾人存。經略傅公將軍兩阿公幕僚劉竹軒孫補山錢充齋

趙璞函及公皆下世存者惟王述庵惠中丞及余耳。

稚存見題拙著甌北詩話次韻奉答

論古雖如廷尉平。詩文事已一毫輕。但消白首無聊日。豈附青雲不朽名。老始識塗輸早見。貧堪鑿壁借

餘明只慚結習癡堪笑。猶是燈窗未了情。  
何限紛紛著作林。揀來只剩幾銖金。論人且復先觀我。愛古仍須不薄今。耳食爭誇談娓娓。鼻參誰候息  
深深。錦機恐負遺山老。枉度鴛鴦舊繡針。  
晚知甘苦擇言馴。一代風騷自有真。毫學我悲垂盡歲。大名君已必傳人。幸同禪窟參三昧。不笑元關隔  
一塵。從此國門懸呂覽。聽他辯舌騁儀秦。

閱邸報殘賊勦除將盡蕩平有日矣誌喜

捷音絡繹報星郵。劫數將終局易收。賊勢已同強弩末。軍聲行唱大刀頭。人烟斷處還甌脫。鬼火啼來半  
濁醜。待得流移元氣復。尚煩宵旰幾年籌。  
但看比戶感恩波。早卜鐃簫有凱歌。人去空邨從賊少。家移邊寨避兵多。費糧木杪分猿果。隴壁山巔俯  
鳥窠。今日漸堪歸里社。重攜鋤耒理田禾。

送稚存游甯國

步履過從一載餘。忽教行色動征裾。里中漸少看花會。海內猶傳諫獵書。秋浦晴波移櫂穩。宛陵遙翠映  
窻虛。定增謝朓驚人句。寄我郵筒慰索居。

全惕莊織造七十壽詩

揚州花甲記開筵。江介宣勞又十年。南國威名英蕩節。尚方經費水衡錢。老能健飯鬢眉壯。功贊垂衣黼黻鮮。我是平津舊賓客。喜隨公作地行仙。

春游

春風何處到江臯。毫齒清游興尚豪。福德在吳連歲稔。靈光占魯歷年高。新芽黃淺纔舒柳。嫩蕊紅輕欲試桃。著个老翁堪入畫。陌頭扶杖髻蕭騷。

自楊舍檢校質庫回

暨陽城下小舟開。正值村村放早梅。潮落沙痕攙水出。日斜山影渡河來。有田二頃甯求益。每字三縑亦論財。卻愧滄江漁父好。夜深只載月明回。

城外閒步

春暄猶未脫吳綾。流覽風光力尙勝。簾閣燕尋曾宿壘。池塘鴨浴已融冰。野花地僻無人賞。廟樹年深有物憑。最是鄉鄰淳樸意。相邀村酒醉懵騰。

同年王惺園相公見余廿二史劄記有感於前朝荆楚流氛事手書遠訊敬賦奉酬

千里郇箋到草堂。離懷時事兩蒼茫。公真與國同休戚。我已無人問在亡。身退敢思投筆奮。官高共仰運籌長。狀元宰相榮華處。知爲憂勞已澹忘。

王夢樓輓詩

哀音來自鎮江濱，竟喪維摩示寂身。蔬筍持齋將送老，碑銘賣字未全貧。一科先我爲前輩，百里因君有近鄰。從此故人都哭盡，他年哭我更何人。

早膺華組早投簪，別借疎狂耗壯心。生有笙歌矜馬帳，家有梨園小部死猶詩句在雞林。君少時隨冊使封琉璃王黠癡各半無真癖，謫譽相兼有賞音。要是人間名士氣，祇今又作廣陵琴。

登陽山絕頂

登高想見昔鴻濛，一片川原緯繡中。目力窮如天地合，心神超到古今空。羲軒有號先堯典，混沌初開豈禹功。至此直思元會始，欲將菱紐問高穹。

疑團

一物何能恥不知，荒唐呵壁祇生疑。思窮盤古胚胎日，想到尼山衽席時。鼎鼎百年幾兩屐，茫茫千古滿盤棋。笑他如豆書生眼，徒詡生花筆一枝。

午節攜家人水閣小酌看夜船燈火之盛

蒲觴佳節晚開筵，正是雲溪雨後天。小閣杯盤冬釀酒，滿河燈火夜遊船。紅塵不到清涼界，白首猶留矍鑠年。地是恬熙人老健，更何賒望乞天憐。



感興和放翁韻

少年鼻息薄星河，只覺將來歲月多。壽命誰看天倚杵，身謀俄想日揮戈。過來富貴邯鄲夢，老去英雄敕勒歌。至此始悲無立足，求名學道兩蹉跎。

出郭

纔脫吳棉尚淺涼，恢台夏景倍舒長。學飛燕尾雙開剪，對語鶯吭並鼓簧。候屆耕鋤農滿野，香生餅餌麥登場。自慚游惰無營業，高柳陰中話雨暘。

散步

一蝸廬內有清娛，散步芒屨踏綠蕪。蝶不乞糧花作飯，蟲能識字藥鏤符。豪除北里笙歌部，閒徧東坡笠屐圖。太息生平高位置，何當如此老潛夫。

李雨村觀察自蜀中續寄詩話比舊增多戲題於後

牛腰長卷廣搜羅，都是名流句琢磨。一代幾家傳世久，千秋兩字騙人多。編如釀蜜黃蜂採，來比函經白馬馱。贏得老夫消晝永，披吟不惜一丸螺。

何來爵里刺爭投，履歷偏勞記憶周。采諸詩人名號，科第官位無不詳核。人各造車期合轍，君能集腋便成裘。採兼鹿苑高

僧座，購到雞林賈客舟。兼探高麗人李德懋所著清脾錄。真个將軍不好武，盡將風雅入旁搜。君舊有小李將軍之號，故戲及。

蕪詞謬辱故人知。遣與名流並轡馳。世不乏才常接踵。士皆爭勝孰低眉。事關公論情難狗。人以詩傳品已卑。敢比湖州楊伯子。自攜畫像出生祠。

### 旅宿暨陽

近游百里暨陽偏。又是江城一宿緣。柝盡荒雞催客起。燈殘饑鼠瞰人眠。亢倉畏壘非逃祝。子厚愚溪擬卜塵。那不逢場聊作戲。七旬以外總餘年。

### 暨陽望海

決背眞教目力窮。憑高一覽大瀛東。五更紅湧扶桑日。萬里青排舶趲風。勢絕中休無過鳥。氣能橫跨只垂虹。正當海不揚波世。何物萑苻敢逞雄。

### 苦熱

火織當空氣益炎。避炎何處覓深巖。汗流似滴鮫珠濕。痲癢思搔鳥爪尖。螢可作燈兒剪紙。燕將歸舍婢鉤簾。茶瓜欲話無人共。細碎成詩韻一拈。

### 久晴

纔欣甘露插秧青。火織炎官又曜靈。大熱得風知不雨。晴空無月更多星。井懸汲綆疑焦釜。河捲翻車恐罄餅。縱不憂人亦憂己。夜深望歲立中庭。

泛小舟出郊看田禾

經旬謝病掩荆扉，偶泛輕橈趁夕暉。知我忘機鷗不避，爲人引道鷺先飛。桔槔翻水聲無歇，穉穉登場願恐違。見說江南真福地，可能連稔慰民依。

田家留飲

豆棚瓜架菴溪濱，老瓦盆留客飲醇。露綻葡萄肥馬乳，風搖薜荔活龍鱗。牛羊齧草無分地，鵝鴨歸闌不誤鄰。看到鄉村淳樸象，人間尚有葛天民。

臙舟亭小憩

臙舟亭下臙舟時，來訪東坡洗硯池。紅菖挺生剛有骨，紫薇怕癢嫩無皮。假山未裂瓊瓏石，古木多垂鬱律枝。只爲毘陵少山水，一邱一壑也稱奇。

幽事

已謝塵緣罷送迎，祇將幽事遣幽情。瓶花浸水無根活，爐火烹泉有竅鳴。龜臥何須彌勒共，屐遊要比阮孚輕。天留老健娛遲暮，忽復分營到利名。

江樓野望

西風吹我上高樓，滿目蒼茫入感秋。天若有情應亦老，古而無死更何憂。也知身本非金石，已聽人呼作

馬牛枉費狂奔夸父杖。大江自昔只東流。

### 魚釜

魚釜游魂未掃平。頗聞臺省重修行。四禪地縱堪逃劫。大乘經甯便解兵。王綰擬營銅瓦費。圖澄尙識塔鈴聲。只愁呂相遊僧寺。多少禪鑽競送迎。

### 蔣心餘孫立中來謁感賦

握手相逢感昔因。依稀下蔡舊丰神。用蔣濟事曾看乃父荷衣拜。又嘆孤兒葛屨貧。昔在京時立中父僅十餘歲耳車笠故交欣有後。坵壇同輩已無人。報劉更聽重闈老。存歿相關淚滿巾。心餘夫人在

### 雨後坐月

一天好雨遍郊原。四野人情寂不喧。秋早金風涼有信。月明銀漢淡無痕。偶陳瓜藕供清坐。閒聽兒童作謔言。又覺西成豐有象。老懷那不樂田園。

### 一院

一院苔痕綠正勻。藥欄聊喜踏芳茵。風來蕉葉搖紈扇。露壓荷盤瀉水銀。巢燕語梁將別主。野鳩呼雨似憂民。側聞米價朝來減。計日香秔又食新。

### 閱稚存百日賜環集再題

生平才氣最雄豪，惹得投荒萬里遙。足已烏孫途上繭，頭幾黃祖席前臯。到戍後有請加重辟者轉邀恩旨赦歸得歸故里甯非幸，善保高名在弗驕。百日賜環詩一卷，知君感泣徹深宵。

文端師長孫杏漁郡丞攜其子來常州就婚喜賦

彈指俄驚五十春，前遊歷歷記平津。曾依講座三重席，喜見師門四代人。王謝家多佳子弟，崔盧族稱宦婚姻。劉文定公孫女祖孫先後來親迎，畫鼓紅燈一樣新。郡丞尊人幼泉民部昔亦來常州就婚吳藩伯家余親見之

閱邸抄惺園相公以老病再伸前請始予告並許在家食俸恩禮始終人臣之榮遇極矣欣羨之餘

再賦一律奉寄

一魁殿榜便青旻，直到鈞衡老乞身。遭際畢生無缺陷，聲名他日有清貧。優賢特許仍支俸，問道行看更從珍。禮記九十者以珍從如此高風如此福，腐儒那得逐鸞輪。指殿試名次互易事

十月二十二日為余生辰天將曉忽夢出守廣州上官為李公瑚幕友有吳雪清暨內弟高仲馨皆

物故久矣豈余修文赴召之兆耶詩以紀之

鼓缶而歌大耋身，榮華念久斷紅塵。遊仙夢裏將醒候，點鬼場邊待缺人。豈有旌麾重出守，得非俎豆去為神。為神自分非南海，或莅邕西舊士民。鎮安在邕州西余為守時頗有遺愛及調廣州殊少惠績也

三十年來著述身，只期樸學不成塵。誰能沒世後傳世，我亦衆人中一人。生不英奇成好漢，死何功德作

明神若教廟食羊城路。恐少碑前墮淚民。

沙山弔閩典史故居

君已謝事。僑寓於此。因士民請入江陰守城。

十三萬命繫君身。那得山村作隱淪。屠城詩死者十三萬餘人。報國豈論官最小。逆天弗顧運維新。斷頭巴郡無降將。嚼齒睚陽至食人。今日經過投袂處。百年猶覺膽輪囷。

聞各路軍營報捷殘賊計日可盡喜賦

佳苻漸喜熄烟塵。屈指軍興七閱春。幸未合成銅馬隊。本無能舉石獅人。亂來賊勢炊羹沸。劫盡兵威破竹神。看到軍驍分隊撤。緣知奏凱不逾旬。時黑龍江等兵先撤回。

自年生長太平中。日夜蕃滋似蟻蟲。造物亦難供飽暖。有身各欲救飢窮。叢祠鳴火俱行劫。高寨摩雲或取攻。頻歲刀兵相斬殺。芸生倘藉此疏通。

是民是賊不分明。籍籍枯骸無主名。枵腹死猶爲餓鬼。遊魂散豈復陰兵。荆榛黯黯寒燐燄。風雨啾啾夜哭聲。也是閻浮提一劫。翻因凱樂動悲情。

甯陽破後戮羣凶。賊亦知兵但折衝。不佔城池防受困。先驅老弱代櫻鋒。運籌大帥思觀釁。坐甲征夫樂養癰。至竟成功須戰將。追犇不避萬山重。

一一渠魁已勦除。縱餘漏網亦窮魚。艷都造冊筆成塚。京觀築邱尸滿輿。餽餉停來無輓運。炊烟起處有

耕鋤鴈垣百堵看新葺。依舊桑麻景晏如。

寢兵從此息戈矛。善後還資計畫周。丁壯歸農猶佩犢。鄉勇田廬無主競巢鳩。賊產甲生蟻蝨兵皆僊。征兵歸營簿

校芻糧吏正愁。軍需報銷蕩洗妖氛覃愷澤。尙煩廟畧幾番籌。

吳蘭雪過訪枉贈佳章卽次送別

峭帆風緊過江來。草草杯盤半日陪。我讓出頭非調語。世無敵手始奇才。綠楊枝記西湖折。昔與君別於西湖紅

杏花遲上苑開。下第南歸卻憶同遊半殂謝。那禁別淚滴蒼苔。西湖之遊謝蘊山中丞馮星石鴻臚同譙集今二公皆下世

接張廉船書寄答

江程千里接郵箋。根觸離懷悵各天。過我相留纔幾日。與君重見定何年。慢亭空約登山屐。前歲曾有武夷之約蘭

渚猶遲下瀨船。欲作報章無別語。相期健飯到華顛。

前接雨村觀察續寄詩話有書報謝並附拙刻陔餘叢考廿二史劄記奉呈茲又接來書並詩四章

再次寄答

綿陽西望渺關河。甚欲相尋奈遠何。壽過七旬猶矍鑠。眼空四海總么麼。寄書未卜人還在。得報翻欣句

更多。深感扶輪賢刺史。郵筒雙遞兩翁皤。余內姪劉慕陔牧綿州兩入書札往來皆慕陔轉遞

京邸相隨步履塵。京中寓舍與君同在椿樹街祇今音問藉鴻賓。一封遠扎修將就。千結離腸轉已頻。蘭棹難浮三峽



水梅花聊寄一枝春。晨星敢謂非天幸。萬里猶存兩老人。

勝說叢殘孰表彰。多煩一一爲提綱。獎許拙刻甚至要傳著述千秋久。須有光芒萬丈長。名士空多誰足數。故人

漸少愈難忘。披金倘有沙應汰。愛我還期拙代藏。

漫將優劣較元劉。來詩以白元劉比袁蔣趙迂叟心期迥不侔。角立縱支三足鼎。高瞻須更一層樓。擣虛拔幟晨趨壁。

救敗量沙夜唱籌。戰績中猶分等級。況憑寸管冀長留。

### 哭惕莊總管之訃

縞紵論交二十春。訃來那禁黯傷神。貧惟鮑叔心知我。貴不宜明面向人。方喜清班依殿陛。尙聞遺愛在關津。考終正及還朝後。天意分明報蕙臣。

卿月班聯近紫宸。方憂道阻見無因。豈期一別真千古。如此相知有幾人。高冢松楸丹旆遠。公已預營葬地舊壇

車笠白頭新。生平不灑無情淚。今日羊曇濕滿巾。

新春招劉檀橋中允莊迂甫贊善洪稚存編修蔣佩荃檢討讌集草堂。適曾賓谷運使枉過。遂并邀

入會。皆詞館也。江鄉此會頗不易得。爰作詩以張之。并邀諸公屬和。

五人詞館共家居。合有春醪折簡呼。廿榜輩行吾獨老。一堂風雅世應無。占星或擬賢人聚。入畫堪追學士圖。科目最先杯最後。主人笑比飲屠酥。

百年人物出柯亭。故事猶傳舊典型。兩鬢霜甘居退院。一條冰恰稱寒廳。是日極寒誰當牛耳操剝澤。我敢龍頭占管甯。林下漸多朝右少。諸公應早赴彤廷。

辛盤正擬具壺觴。忽有干旌過草堂。未便帶符韓尉座。已如里改鄭公鄉。儒餐野味無官鮓。翰苑虛名漸餽羊。扶起雅輪須大力。期公北斗領文昌。

閱邸報秦楚蜀三省同時奏捷軍事告藏喜作凱歌

露布星馳到玉京。鐃簫大凱溢歡聲。雨來盡洗川原血。風掃都成草水兵。豈有盛朝容伏莽。從看率土淨銷萌。莫輕一片紅旗影。多少軍儲始告成。

久享恬熙習故常。時艱始見國恩長。七年征繕無加賦。幾處流移有發倉。驅犢歸犁荒地草。課蠶重理故園桑。遺黎灑泣私相語。都賴朝家續命湯。

蕭蕭班馬過歸師。西土依然好繡圻。天下江山奇絕處。積年盜賊掃平時。烏烏聲樂征人幕。鼓角風清大將旗。烽燧盡消天日朗。彩霞五色絢晴曦。

杖杜詩成喜氣重。深宮五夜第勳庸。裹屍馬革三壇祭。錫命龍章五等封。遠戍兵歸身脫劍。大酺人醉手扶筇。潢池何代無征勦。駿烈今堪勒鼎鐘。

新春卽日

東風冉冉到天涯。老向人間閱歲華。死盡故人成魯殿。占先春色有唐花。魚龍雜戲紛千隊。簫鼓歡聲溢萬家。自是太平真景象。今年應又慶籌車。

野步

同此光陰逝水流。與其枯坐不如遊。野花晝暖香迷蝶。古樹年深大蔽牛。不著胭脂春自麗。但聞鷄犬境逾幽。只慚賣酒人家笑。此老無錢掛杖頭。

前歲作牡丹詩頗不愜意今日對花再作四首

夏無花可鬪芳菲。飽受陽和始吐輝。詞客文章惟宋豔。美人姿態有環肥。人因貴重皆矜寵。蝶亦溫存作軟飛。騙得遊春忙十日。滿城裁盡綺羅衣。

紛紛桃杏盡開過。晚出從容燦曼陀。十戶貲猶嫌價少。廿番風獨占春多。光浮花外三分暈。味在香中一片和。只恐女郎嫌太重。不教插上髻盤螺。

園林無此不能豪。旁護朱欄上碧綃。畫以胭脂猶欠活。生來富貴自多嬌。花頭端重風迴陣。粉靨醺酣酒上潮。最是精神全發越。線晴驗取午時貓。

禮華恰趁豔陽天。繭栗開成徑尺圓。紅藥自甘充婢賤。青蓮曾以喻妃妍。豪宜黨尉銷金帳。陋笑蘇家藥玉船。佔得繁華仍不俗。由來姿韻本花仙。

京口左蘭成留飲

柔櫓輕帆兩日程。近游重過潤州城。欲談舊事無同輩。喜結新知有後生。酒陣酣搖甘露利。詩濤雄鬪大江聲。坡公會醉藏春塢。刁景純園見蘇集此地常多地主情。

水嬉看夜船燈火

水嬉豪舉擅龍城。雲渡游船徹夜聲。燈火熒煌星萬點。笙歌擘緩月三更。繁華知費金錢幾。風景真看玉燭明。恰是村農插秧候。中宵便起叱犍耕。  
今年添製夜龍船。十丈龍身萬燭燃。映水頓成星宿海。騰雲應上燄摩天。一般犀照光尤徹。遍體驪珠警不眠。惹得老顛清興發。孤燈揮翰鬪蜿蜒。

或以余紀遊詩於佩香悟情多諧語賦此解嘲

遊仙偶遇李騰空。莫漫相嘲白髮翁。但看晚霞多麗景。何曾老樹不春風。風流得罪猶堪恕。道學爲詩究未工。君見梅花一篇賦。如何不議廣平公。

哭絨齋姪

京華鄉國鎮相隨。何意今成永訣時。君過八旬甯有憾。我無一件乃真悲。阿咸年轉如兄長。君長余四歲王濟談能辨叔癡。問疾只嫌關拒客。不教觀縷訴心期。

尚書家法儼條科。恭毅公。級佩書紳服習多。座有金人緘口戒。君謹於言。自號緘齋。庭無車子轉喉歌。恭毅遺訓。門內不許演戲。至今

漫興

十笏香嚴遠市囂。不農不仕不漁樵。尚耽書味忘漂麥。未長詩功想握苗。著述身將盈八秩。昇平世已歷三朝。間中卻數平生友。幾個聲名在絳霄。

到揚州值松坪子次生新抱西河之痛至淮安聞晴嵐子蔭堂久下世矣感賦

題襟好友已松楸。那更風摧玉樹秋。哭到故人三兩世。感深倦客一孤舟。當年曾羨駒千里。今日俱歸貉一邱。早識此行多引淚。悔攜襆被出門遊。

清江浦送費制府入爲大司馬賀遷惜別情見乎詞

聽履崇班躡禁廷。本兵身繫九邊甯。帝資海內安磐石。民惜江南去福星。敝歷官更中外職。追攀人滿短長亭。還朝笑憶郎曹舊。三十年前鬢尚青。

平日人忘廈庇中。臨分始識久帡幪。祈年常滿千倉粟。自公到江南。連年大稔。戊午歲禱雨尤驗。率屬俱寒兩袖風。竹箭河流

循軌穩。類歲治河。漫工皆速堵。萑苻兵掃伏隍空。州去歲宿。勦匪事。而今一一勳庸見。都作甘棠憶召公。

腐儒縱不乞餘光。自有餘光到草堂。執醕敢當三老席。指困終恃陸家莊。孔融檄改康成里。思黯車臨履

道坊。

牛僧孺舉制科。白樂天爲考官。後白退居東都履道里。牛爲留守。時相過從。

十載分榮誰不羨。真看桃李蔭門牆。

送別那禁淚暗垂。雲山從此兩睽離。建牙或有重來日。耄齒應無再見期。帷幄謀參溫室樹。江湖身老釣竿絲。惟當皓首猶交勉。各咏黃花晚節詩。

途中偶見兩樂事感賦

倦則知還戀舊窠。物情相去不爭多。卸鞍跑馬歸芻棧。脫輓耕牛放草坡。少日漫思雲出岫。老來惟愛水迴波。天寒翠袖幽居屋。且喚蓬頭婢補蘿。

竹初齋中盆蘭多名種今年爲春寒所敗其次者作花尙茂賦詩索和卽次原韻

九畹姿從短取長。好嬌次第替夷光。精神雖覺三分減。臭味仍同一瓣香。萎豈當門遭刈楚。榮留紱佩慰懷湘。謝庭不斷清芬苗。韻事終勝馬糞王。

磁斗嬌芽冷不禁。護花方法更披尋。縱非首選猶青眼。難得肩隨亦素心。開晚忍嫌抽箭少。耐寒應爲植根深。只愁藉口停嘉宴。辜我年前望到今。去歲有盆蘭之宴。故戲及之。

長孫公桂舉一子老夫遂見曾孫因名之曰曾慶而記以詩

中年得子已嫌遲。余年三十八始舉廷英。豈意孫今又舉兒。天幸已多真忝竊。祖功久積有留貽。老妻檢籛裁文牒。賀客填門索酒卮。笑語鐻工休鐻白。輩行恰稱髻如絲。

遂向人間作太翁。添丁應策長孫功。三班銓尚遲需次。孫方候選縣丞一索占欣早得雄。爲父也須身作鵠。抱男漫詡夢符熊。百年世業青箱在。要續書香振祖風。

題江陰單甯齋明府小照

披圖想見十年前。續學餘閒結靜緣。年少仙人王子晉。風流詞客杜樊川。杏花紅潤含宵露。柳葉青舒抹曉烟。身未出山春意滿。早儲康濟待敷宣。我見先生已有髭。琴堂單父正調絲。早栽滿縣花千樹。但飲澄江水一卮。薦牘共推三異最。御屏應覺九遷遲。此圖留作東山景。聊記潛居舊履綦。

彭芸楣尙書輓詩

同試鑾坡賦獨工。癸未散館公第一余次之清班數歷到司空。帝將李嶠稱才子。公以文學受知先帝有才子之稱人忌元稹平聲作相。公服藥地黃頭。早白年未五十髻髮全白。校書天祿燭常紅。各館修書皆爲總裁京華文戰江城醜。猶憶光芒夜吐虹。散館前與公會

稚存說述菴侍郎近狀尙無恙喜賦

落落江天大蓋身。騷壇猶欲獨扶輪。詩文探到新先輩。刻湖海詩傳湖海文傳二書將告成鬢警幾成活死人。耳目已俱廢支鏑工煮粥。每日但食粥門生當杖代迎賓。門人陶君長安交舊今餘幾。數到殷兄罕倍珍。



西干故里示姪亮采寶士姪孫公蘭等

十年不到綠楊村。白首重來叩里門。驚吠烏鴈疑是客。舊留黃犢已生孫。一經幸尙傳家學。百畝猶當念國恩。是我昔時初奮跡。辦香能不望蘭蓀。

牡丹

春風滿面好容光。十五盈盈出畫堂。天下有花皆避席。豪家無處不飛觴。寫生只合煩周昉。入貢曾傳自洛陽。笑我素嫌脂粉氣。也教軟盡鐵心腸。

答友

日暮逾愁道路遙。老來何敢氣凌霄。誤人子弟由輕獎。欺世聲名恐易消。許靖終爲先主薄。歐陽猶畏後生描。祇應蟻蛭防山躡。觀井錢鏗帛繫腰。

和亂仙詩

靈氛應召判前因。運筆如飛果降真。我是未成丹道士。世無不識字仙人。步虛杳杳來何處。叩寂惺惺信有神。人是古時詩近體。知君學亦逐時新。

客有談故相事者漫記

具瞻當日秉樞鈞。誰敢登車醉吐茵。隻手難遮天下目。回頭已是百年身。見錢福詩蓋棺論定無翻案。當軸權

移有轉輪官位聲名原兩事漫憑威力制窮塵

賦北詩鈔 七言律六

四一五



# 甌北詩鈔七言律七

接同年陳蘭江書知其官金華教授喜而有寄

淮館聯牀兩月同

曾同客淮關  
權使寅公幕

而今二十四春風。書來別雨離雲後。官在青山綠水中。歌袴尙傳秦百二。

君昔宰寶雞  
改就教職

詩筒好遞浙西東。開緘先喜音塵接。已抵論心剪燭紅。

劉石菴相公因繼母太夫人就養在冢孫少宰公江南試院壽屆九十奏蒙恩命南來慶祝公年亦

八十五矣稱觴盛事從古未有余以門下士敬隨叩賀歡忭難名恭紀三律

南國秋風穠稻香。相公請假壽護堂。絳騶不遠三千里。皓首親擎九十觴。龍袞朝衣供綵服。鸞回綸誥賁

奎章。江城況是曾臨駐。

公前視  
學江南

四代今增樂未央。

少宰已有  
子將冠

壽筵盛事艷朝紳。耆輔承恩許省親。接武兩朝賢宰相。疏封一品太夫人。新籟正熟南蘭酒。文錦兼頒內

府珍。縱是家風慣清儉。也應璫管慶長春。

再世調元佐邳隆。更餘書翰壓羣雄。

公書法爲  
天下第一

章平有傳難專美。絳灌無文敢媿功。久別豈期迎畫鷁。舊

情猶荷問雕蟲。剩誇年少依劉日。伴食會陪兩相公。

余昔客公家。文正師方官總憲。公亦爲  
孝廉。每日皆三人共飯。不另設餐也。

石菴還朝口占送別

白頭猶著老萊衣。假滿還朝四牡駢。來爲稱觴增燕喜。去歌遵渚羨鴻飛。送公千里終須別。剩我孤舟獨自歸。誼是故交年大耋。臨分那不倍依依。

壽劉可行舅兄八十

歸然耆宿魯靈光。宦績文名少輩行。夜月琴聲單父宰。春風帶草鄭公鄉。一門子弟親陶鑄。三世文詞力表彰。刻劉氏一家文稿行世。要識老儒榮暮景。添丁樂事助稱觴。新添一孫。

仕宦歸同理舊編。黑頭昆弟兩皤然。每欣求仲來荒徑。還仗殷兄銜少年。張丈殷兄見香山詩。君長余二歲。剪燭深談三鼓後。扶筇緩步百花前。往來二老風流在。剩與人間說散仙。

聞汪時齋總憲蒙恩以二品歸老感賦

霜威烏府肅行騶。直木風多易感秋。朝議自嚴賢者責。帝心終眷世臣優。七旬老恰初衣遂。二品歸仍畫錦遊。白嶽黃山相待久。籃輿探勝亦風流。

巢痕回首綠楊灣。燈火書堂課晏閒。公從余受業。常在澄懷園。卅載寒暄雖久別。兩家痛癢最相關。寢邱田豈供千指。奉禮廳猶僻萬山。公家在休甯萬山中。平日愛臨顏氏帖。也書乞米落人間。

錢竹汀宮詹輓詩

蓬瀛仙馭杳難攀。官本清華館閣班。生死不離文字裏。聲名早在斗山間。縹緗麗製傳中禁。碑版雄詞到

百蠻略似春蠶絲吐盡。化飛蛾去脫塵寰。

歷朝記載萬牛手。同異紛如費別搔。十七史從何處說。一家言已等身高。君著廿二史考異最精核有疑好就靈犀照。不朽何須汗馬勞。直自深甯王叟後。又添困學析秋毫。

庚年同譜幾人留。百里相望兩白頭。君去更無人可語。我來應有伴同遊。後身定識仍金粟。前路先看赴玉樓。一笑吾曹論壽命。短長不在幾春秋。

戲作

九尺曹交自覺長。盡傾一座氣飛揚。螻蛄安見青松老。魍魅終消白日光。麟閣畫圖功不朽。雞林詩句價爭償。曠觀自有無窮在。汲汲何須蟻撼牀。李白詩螻蛄啼青松。安見此樹老。

李雨村觀察輓詩

久不接雨村書。心竊憂疑將于野。自京回曾晤其弟。編修君鼎元。知已下世驚悼之餘。以詩當哭。綿陽音斷渺烟雲。得信俄驚宿草墳。斯世幾人真愛我。老年同輩又亡君。和疑板散千家集。文節樓傷萬卷焚。君搜刻說部數百種。名曰函海。又選近人詩作詩話。十六卷。家有萬卷樓。貯書畫鐘疊忽燬於火。奇士人間留不住。故應召掌紫臺文。見漢武外傳。每逢書到悵睽離。今并音書不可期。萬里難爲徐穉弔。一編重檢蜀州詩。少陵有檢得高蜀州遺詩。魂來夢裏人猶舊。名在陽間鬼豈知。八表停雲空目極。更從何處寄相思。

戲問稚存

青鞵布韞過從頻。一道橫街作近鄰。我已年來都散漢。君真天上謫仙人。詩纔起草先邀和。諺到交鋒不避嗔。如此清歡供暮景。也應俗煞軟紅塵。

示兒孫

風貌居然玉樹枝。未遑講道且修詞。要無一字無來處。但有三人有我師。祖父聲光安可恃。衣冠門戶倍難支。畧猶餘粟囊餘帛。不惜分陰待幾時。

教場壩懷故將白秋齋同年

君庚午武鄉試與余同年官至副將有賢聲曾爲常州遊擊教場壩其演武地也

長身玉立好鬚眉。威令羣推節制師。可惜將兵程不識。誰爲薦士魏無知。老猶射虎千鈞力。生未圖麟兩鬢絲。今日經過教場壩。春風楊柳想旌旗。

石菴相公輓詩

纔送還朝數月前。俄驚仙馭大羅天。向愁久別難重見。豈意相逢遽永捐。黃閣調元榮再世。青燈談藝記當年。翻思昨歲南來日。天子吾曹一面緣。

貞白汾陽陸放翁。壽俱八十五纔終。高名已屬三君子。大耋今添一相公。勳業不妨文敵武。神仙皆到老還童。卽論落紙烟雲妙。也抵山陰萬首工。

我與公交跡最陳。秀才時已客平津。余初入京。文正師即延入邸第。分岐雖隔青雲路。閱世同爲白髮人。楹帖一聯成絕筆。書籤十册枉隨輪。公臨行爲余書楹帖并索拙著攜去。始知老健原難恃。只在斯須臂屈伸。楹帖十八字。務觀萬蒿半皆歸也。言蓋絕筆也。

### 哭劉可行舅兄

松筠方喜景長春。何意康強遽飾巾。名行已歸耆舊傳。親知其惜老成人。生無嗜好惟耽學。家本清寒尚卹貧。欲識蓋棺公論定。瀟風共說葛天民。

生平執友本無多。況復相隨到鬢皤。尙擬泛舟偕襲美。已辭折簡召閻羅。君自言三年前夢閻羅有請帖到以編刻家集未成辭不赴。文心積習原成癖。嚙語通靈轉似魔。從此故人都哭盡。爲君拚竭淚滂沱。

### 王惺園相公輓詩

鼈頂科名位秉鈞。何期致政遽歸真。素風到老如寒士。公論同聲說正人。解綬臣辭前席寵。懸弧帝錫尙方珍。歸田仍歿長安道。遙識心猶戀紫宸。公已致仕歸里八十壽辰上寵錫優厚來京謝恩遂歿于京。曲江賜宴共恩榮。中外分岐遂判程。我慕千秋勤著述。公登一品佐昇平。特邀主眷原奇遇。難得官高尚令名。一甲三人兩徂謝。此身雖在也堪驚。榜眼胡豫堂官至總憲已先下世。

常州東門外天甯寺最崇。做殿宇百畝僧徒常數千。指江南一大叢林也。顧未有詠之者。僧了月修



造工竣詩以落之

祗洎樓殿映霞丹。江北江南一刹竿。千載不遭兵火厄。半空直接斗星寒。鳴鐘聲集齋堂飯。汲綆痕深石井欄。代有名僧爲起廢。緣知福也占蒲團。

味辛自松江歸。逋菴侍郎珮珊女史俱寄聲存問。并知珮珊能背誦拙詩如瓶瀉水各寄謝一首。

十載邊疆踏戰塵。歸勤著述柳湖村。五官俱廢名心在。二品非榮老學尊。湖海論交無輩行。文章傳世卽兒孫。衰年我亦頽唐甚。能否扁舟一款門。寄述菴

騷雅中誰識苦辛。正難物色向風塵。豈期白首新知已。翻在紅顏絕代人。繡出弓衣傳唱遠。拂來羅袖愛才真。拙詩背誦如流水。多恐汚君點絳唇。寄珮珊

自遣

熊魚兼取本天慳。老去塵緣已盡刪。名或可傳聽日後。詩留不盡與人間。身隨甌窰上聲。豚蹄祝。夢斷周陸豹尾班。獨惜退休三十載。不曾絲髮濟時艱。

生事

出身草澤躡蓬萊。官有腰魚壽背鮐。老樹尙期千尺長。名花已到十分開。半收芋栗當全熟。薄病蓀苔壓小災。放翁詩留但使高明憂鬼瞰。他年或免食嗟來。

余年十九補弟子員今七十有九又屆乙丑院試之期作重遊泮宮詩記事

佳話爭傳泮水塘。一周花甲又芹香。阿婆迴憶新婚夕。老將重經舊戰場。殘墨尙留題字柱。銛鋒早脫處  
錐囊。綴行同出人爭看。白髮翁攙白面郎。

鬢門裾屐記前遊。又見誥誥出俊流。便合膝行觀壁上。漫勞足曳跋壺頭。舊痕久掃離巢燕。陳迹難追踏  
磨牛。惟有秀才餘習在。一編仍守夜窗幽。

一彈指頃盛衰殊。曾記初程便棄繻。犢是新生甯畏虎。馬今漸老反爲駒。房公入寺疑前世。波匿觀河認  
故吾。爲語少年諸譽髦。故須及早奮修途。

先後同年例可循。一般蘭譜誼相親。舉場應喚新先輩。鄉飲慚叨舊大賓。坡老纔如一場夢。劉郎真是再  
來人。也虧頑健能堅耐。初地重遊六十春。

登太平寺塔

凌虛率堵覽蒼茫。始覺書生眼寸光。無弊不成天地大。有愁方度古今長。長安賢佞三期口。漢書王  
尊傳廣武  
英雄百戲場。待得塵緣看到破。老夫亦已熟黃梁。

出郊

一筇兩屐出郊原。極目青圻景色繁。待渡馬嘶芳草岸。歇涼人語綠楊邨。好風一陣新蒲扇。薄酒三升老

瓦盆此卽江鄉好圖書。何須遠訪翟家園。楊城齋守常州。屢游翟家園。今遺趾無考。

哭時齋侍郎病歿陽穀舟次

兩世師生六十年。南歸正好共流連。豈期半路將逢候。翻隔終身一晤緣。旅櫬料無題湊美。夷槃安得伐

冰堅。祇應卹典哀榮備。猶荷恩光賁九泉。鳳旨照侍郎銜賜卹。

書堂燈火最情親。回首鴻泥跡已陳。我忝先生翻後死。余長君十歲。君雖大貴卻長貧。支來官俸惟償債。典去

朝衣尙醺賓。今日翟公門巷冷。指困高誼屬何人。

夜泛

經旬不出避炎曦。又是西流大火時。夜露無聲衣自濕。秋風有信葉先知。禾豐差補來牟歉。夏閏猶嫌穠  
稔遲。待看滌場收稼後。依然風景復恬熙。

八十自壽丙寅

偶然七尺落紅塵。彈指俄驚八十春。湖海漫傳垂釣叟。英雄豈在讀書人。惠夷處世聽時論。童耄觀河感  
昔因。捕虎逐麋今已矣。燈窗依舊苦吟身。

早登仕籍早歸田。正值重熙極樂天。才短愧無經世用。時清惟有作詩傳。綠簑泛雨船雙槳。紫陌看花杖  
百錢。如此太平甯易遇。四千年內不千年。自唐堯卽位元年。至明崇禎末。共四千年。二年。

一出春明道阻長。天教遊跡破天荒。攜來詞客驚人句。踏遍前賢謫官鄉。炎徼風清無瘴癘。蠻陬地闊有梯航。難忘最是邕西路。已築生祠祀狄梁。鎮安民已爲余立生祠。劉觀察大觀云。

少日飛揚氣吐虹。曾磨盾鼻挽雕弓。虛叨塞上頭鵝宴。未有軍前汗馬功。結客漸如揚鱗散。代人徒作嫁衣工。可憐八十年心力。不在凌烟圖畫中。

求仙學佛兩無成。屢強猶餘傲骨撐。自吃庾郎三韭飯。不嘗樓護五侯鯖。買山錢肯從人乞。諛墓金仍贈客行。也是天公曲全意。免教涓滴領人情。

年將四十纔生子。豈意孫今又抱孩。在我原爲非分福。知他誰是不羈才。金防躍冶爐常守。樹望成陰土屢培。卻被達觀人暗笑。何如且醉眼前杯。

七十相傳自古稀。況今又過十年期。想蒙疎網吞舟漏。得緩征輪下坂馳。倘不早歸應貴顯。偶思再出已衰遲。緣知百甕黃齏在。未到生平飯滿時。

束髮耽書誦夜闌。得登館閣附鷓鸞。當時擬藉文章進。臨事方知幹濟難。官去僅餘風兩袖。老來聊臥日三竿。遍翻史傳無尋處。或有人從藝苑看。

秦望山

張士誠駐兵處。戰敗後。明吳良等遂拔江陰城。

秦望山高好駐兵。淮張曾此瞰江城。亂離未定瞻烏止。盜賊皆思逐鹿爭。赤伏符終歸漢主。白駒場枉闢

周京士誠僭號大周祇餘不肯生降處猶似田橫氣未平。

逃荒

淮揚漸欲作洪流。眼見饑荒起衆咻。被髮纓冠非我事。舐糠及米亦吾憂。無依競托沿門鉢。有力將移負壑舟。安得尾閭籌滅水。盡收歸海出平疇。

咏物四首

開過荷花現幻軀。亂頭粗服出泥塗。中虛好伴竹君子。挺立也師松大夫。掩袖苦心如有憶。古詩蓮子凌

波徐步不須扶。六郎枉擅芙蓉面。何似蓬仙骨相懼。蓮蓬人

出自滄波作羽仙。身兼飛躍幻魚鳶。想仍水擊三千里。豈羨腰纏十萬錢。掉尾已辭漁父餌。梳翎肯舞貴

人筵。莫嫌到漑猶餘臭。臭腐能奇是化權。鯨魚

簾外陰霖膩滿空。美人擁篲有神功。捷驅巫女三更雨。巧借封姨一陣風。香捲胭脂花落後。魂歸環珮月

明中。莫疑冤婦能招旱。得號乾娘勝得雄。掃晴娘

傀儡偏供戲酒筵。但憑手撥不絲牽。白題胡舞斜防跌。黃胖春遊醉欲顛。宛轉隨人終自立。周旋伴客不

安眠。紙糊閣老休相擬。倔強身還傲氣仙。不倒翁黃胖遊春覓對不得明日得胡舞白題斜不禁狂喜遂湊成一聯

蝦鬚簾四十韻

海上奇聞過瑞鯨。鰕鬚數尺可爲簾。鞠躬曾彷彿漁翁釣。借目常爲水母覘。趨躍螽身無兩翅。屈伸螳臂有雙鉗。槎枒芒刺森頭角。戈戟鋒稜在鼻尖。玉德名從樽俎錫。水精肉耐酒醃醃。味鮮已擅調羹獨。軀壯還堪製器兼。燃作燭籠輝砥室。鑲成杯蓋入香奩。斯皆取用憑空殼。未及搜材到美髯。蝟磔英姿爲世出。羗根勇力肯身潛。長髻宛似揚旌旆。剛鬣寧徒佐釜鬻。高出一頭標蠹蠹。苗從雙頰奮鬚鬚。鬚眉豈慕奇男表。頤頤曾聞贅塔嫌。粗未成竿晴浪曝。細堪作線綺窗拈。遂煩惱緯成懸箔。不用斑筠掛畫檐。捋處本無纏以帛。拔來豈惜痛如砭。縱橫入扣規棋罫。疎密成行結綵綬。織豈蜚娘機軋軋。編應螺女手摻摻。卷舒軟恰隨犀軸。條縷分如界象籤。方幅鮫綃雲霧薄。圓空蛛網蝶蜂粘。障他下界飛塵浣。捲去西山過雨霰。晝靜香常籠寶鴨。夜明光欲奪銀蟾。細逾晶髮能延照。潔比冰絲好辟炎。最喜通明觀若火。只難藏醜隱無鹽。草痕映入風仍隔。花影移來露不霑。何必蚌珠穿作幌。漫勞魚錦繡成帘。題詩聊當紗籠碧。養目微輸皂幃黔。雨濺似涵腥氣濕。風搖仍漾水紋恬。貢從龍國途何遠。購自雞林價不廉。玳瑁梁歸妨舞燕。琉璃壁逗誤飛蟻。多髭女而勞千鐻。有縫天衣貴萬縑。紅玉筯同工製作。紫絲幃且遜觀瞻。押來銀蒜禁風剪。掛起金鈎對月鎌。掩映芙蓉宜綺閣。低垂楊柳笑窮閭。玲瓏合護妝臺李。寂寞寧依卜肆嚴。蔽席門憐編翠篠。織蘆人愧緝蒼兼。五紋繡杆誇雲幔。四望車空炫錦幘。迴憶奮鯉遊浩蕩。何如作笛出沉淹。取材翹肖真成巧。得氣于思不用謙。功賽麟毫精組織。珍逾蚊睫繚修纖。瓊樓玉宇高懸處。朗映瞳矐曉日暹。

懷清橋

夫婦同堅殉國心，不曾聞訃已淵沉。  
輓詩難用香奩體，冤魄猶留血影砧。  
江上有魂應遠慰，人間無路可哀吟。  
可憐一片秦淮水，嗚咽寒流直至今。

吳門范洽園編修來宗爲余作八十壽詩君今歲亦稱七十之觴謹賦三律酬賀

白首相望兩日程，今年同舉壽筵觥。  
古稀對我猶稱弟，老學如君孰敢兄。  
鎖闥攜毫慳接武，君館選余已出京銀

餅索酒未通名，前歲公等譙王述菴於懷杜閣下余爲不速之客江天落落占星象。  
一似長庚一啓明。

曾過天平萬笏山，范文正公墓故知代有濟時艱。  
義田已自增千畝，公增義莊千畝廣廈猶思庇萬間。  
壇坫名高輕仕宦，江湖身遠念痼癢。江北水災君詩屢及之九重方啓天章閣，會見蒲輪促召還。

同此懸弧遞舉觴，瑤函先枉祝釐章。  
千秋豈論科前後，兩敵終分力弱強。  
暮景飛騰君尙壯，阿婆塗抹我徒傷。  
香山倘許聯吟社，徑欲相從履道坊。

錢竹初輓詩

西河哭子甫經年，豈意衰翁又逝川。  
食不老饜偏暴下，功深禪坐竟長眠。  
君常清齋坐禪，忽以腹疾終。一區邱壑憑誰賞，廿卷詩文尙未鏤。  
差幸桂花香正滿，送君一路去昇天。

看君出仕看君還，薄有田園可養閒。  
身後名猶他日待，生前業已近年艱。  
腰圍月減頻量帶，目疾宵昏只

掩關如此清修亦何咎。不教年到耄期班。

### 靜觀

人事紛紛百戲場。閒中淨眼覽蒼茫。狂風難起澄潭浪。暗日終勝皎月光。時際昌期公道在。運當劫數詐謀強。鴻泥多少興衰迹。留與人間話海棠。

### 菊飲同人小集

籬葩紅紫正敷榮。近局相招小合并。不暖不寒天九月。有花有酒夜三更。清談弗禁藏闔戲。白戰猶能擊鉢成。此是暮年消受處。可知無意獵時名。

### 耳聾

與其瞎也不如聾。聾亦難堪竅不通。函谷封泥填罅襍。空坑投石響鏗鐘。移牀近客惟催茗。落葉呼童屢問風。作阿家翁將廿載。何須社酒更祈聰。

### 夢張瘦銅

故人入夢不分明。重感聯牀聽雨聲。塵尾擲來毛落飯。葫頭擣處糝添羹。翻離日久何無語。貧賤交深尙有情。今夕重逢仍恂悅。醒來翻使淚交橫。

### 題鶴歸來戲本

前明大學士瞿式耜留守桂林。城破殉難。族孫頴作此以傳。



化鶴歸從瘴海濱，興亡如夢愴前塵。河山戰敗無餘地，文武逃空剩隻身。青史一編留押卷，明史以公爲列傳終卷。

宋衣雙引去成神，公死後爲蘇州城隍。覆巢之下猶完卵。想見興朝祝網仁，公在桂林拒戰時，江南久入我朝，其家在常熟，眷屬俱無恙，足見是時法網之疎闊。

江陵孫子亦英風，來共殘棋一局終。不死則降無兩法，倡子和汝有雙忠。青山何處呼臯復，白首同歸作

鬼雄。楊震自能招大鳥，豈須鍛羽比遼東。張居正曾孫同儉與公同被執幽之民舍，兩人日賦詩倡和四十餘日，同就戮。

風洞山前土尚香，二公就戮處。從容就義耿剛腸。久拚白刃爲歸路，肯乞黃冠返故鄉。宗澤心期河速渡，福興

身殉國華亡。宗汝霖守汴完顏福興守燕皆留守事。易名真荷如天度，偏爲殷頑特表彰。高宗純皇帝表彰明末忠臣特賜公謚忠宣。

夜醒作

寒戀重衾夜漏長，半醒半寐境悠揚。燈光照夢犀燃渚，爐沸驚魂蟻撼牀。事滿五更真蛸集，書追三篋已

羊亡。朦朧曉景渾如昨，七十年前上學堂。

丁卯元日

朝衣北望拜天閭，剛卯真符景運長。幸忝增年開九秩，曾初赴舉試三場。乾隆丁卯，余初赴江甯鄉試。綠痕上柳猶無

色，紅意催梅漸有香。預卜秋成仍大稔，立春纔屆正農祥。隔年小除前一日立春。

春興

萬仙橋畔出迎禧。兒女青紅又一時。賭酒難勝長夜酒。看詩漸愛老人詩。湖山興發無同伴。花柳春來有定期。自笑童心除未盡。拔河拋毬尙能嬉。

朱石君相公輓詩

調元正仰贊休明。揆席俄驚喪老成。生爲甘盤尊舊學。死同君實易嘉名。公昔爲今上師傅。歿後賜諡文正。昇平相業無奇績。典雅文風有主盟。餘事何妨證仙佛。旁通原不損賢聲。

筠浦協揆策拜體仁閣大學士喜賦

中外宣猷宿望深。欣聞策拜冠朝簪。九天默運爲霖手。四海皆知似水心。泰宇澄清調玉燭。薰風解阜和瑤琴。早聞絳闕宣麻日。朝野同聲慰滿襟。

臺省何人不駿雄。獨邀帝鑒亮天工。最高班位天常近。未老精神日正中。旋馬并無廳治事。公尙儼屋作邸舍。麟應有閣銘功。江鄉野老分榮甚。座下門生作相公。

喜同年崔曼亭觀察歸賦贈

蘭譜交遊悵各天。白頭喜見老同年。去官未免思祠祿。健飯猶堪作地仙。炊白夢雖粧閣冷。君方悼亡。過庭人早御屏遷。公子景儀由翰林出守。何期一棹都凋謝。獨剩吾曹耐久緣。

憂旱

夏至年年插蒔齊。今交小暑未翻犁。換標日日糧加級。築壩層層水上梯。但見過河枯鮒泣。不聞呼雨野鳩嘯。老夫敢爲蒼生哭。自起看雲獨杖藜。

歎暘焦灼到蒿萊。千里憂惶歎旱災。打魃直思開野塚。曝巫寧惜築高臺。涼風爽捲雲頰散。乾電晴驅雨

腳回。降割自關千萬命。可憐賢守獨祈哀。

郡守蔣霽峯求雨甚虔

齋。袂零壇禱百方。吁嗟聲更遍江鄉。幾疑天聽全無耳。其奈人飢各有腸。起伏龍仍潭底睡。斷屠豬已柵邊藏。生機須待明年麥。若個能支一歲長。

不知江國果何愆。深到漕渠也斷泉。思曼船真牽岸住。祖生楫敢渡河鞭。思雖出位緣憂國。力不從心欲挽天。憶我還鄉三遇旱。不曾太甚似今年。

乾隆四十年乙未。五十年乙巳。今嘉慶十二年丁卯。皆遇旱。

贈朱虛舟藩伯

起家丞簿立奇功。廿載官遷二品崇。結寨盡擒張莽蕩。見宋史趙密傳登壇直賽李橫衝。九霄俯視風皆下。五十勤宣日正中。開濟豈徒膺節鉞。會看冊拜黑頭公。

小北門城下看荷花

柳陰深罨北城隈。正值芙蓉百本開。難得有風無日處。相攜臨水看花來。老懷豈尙貪紅豔。逸興兼思泛綠洄。帶得餘香晚歸去。月明更醉碧筩杯。

虛舟藩伯以余宵不能寐蓋心血枯也贈我烏斯藏紅花謂可療此疾半月以來服之果有效賦謝  
佛土曾傳篤瓣香靈葩來亦自西羌恰如攜贈邯鄲枕竟得安眠瑋瑁牀未熄篝燈先夢到不聞街鼓任  
宵長尙嫌未茁心花燦只抵希夷一睡方

余以乾隆丁卯初赴江寧鄉試今嘉慶丁卯又屆鄉試之期六十年間有如昨日而余已老而憊矣

### 感賦

當年赴舉秣陵關歷歷前遊指一彈乍見江山胸頓豁未經場屋目無難川原如舊人將老文字求名興  
已闌一笑昔時辛苦地而今袖手作旁觀

### 哭沈旣堂前輩

哭盡知交剩此人那堪今又萎窮塵廿年回首過從跡兩地關心老病身擘紙分題曾對敵典衣治具記  
留賓綠楊城外紅橋路一度追思一愴神

一江之隔水盈盈書問雖疎意自傾先我三科應論輩詞林論前後輩公折輩行與余交契長公六歲敢稱兄磨牛踪跡人  
皆老芻狗文章世已輕哭寢蒼茫何限感到頭誰駐蓋棺名

### 荒景

天將降割此方民災沴連番過十旬夏至後無雨白露中又毒霧連日無米可炊徒巧婦有播能乞卽良人  
糞來菜甲連

黃葉剝盡榆皮剩赤身。待到明年新麥熟。不知幾個得嘗新。

張甥聖時宦新疆之奇台尉五年俸滿告歸喜賦

玉門關外渺音塵。宦遠難期笑語親。豈意八旬垂老日。猶看萬里遠歸人。三間馬磨欣新築。百結鶉衣記舊貧。重話少年孤露處。喜心翻到淚沾巾。  
絕徼郵程萬二千。路遙職更重安邊。身經戍尉屯田地。時正丁零款塞年。疏勒泉清禾滿野。祁連山迴雪彌天。因君話到殊方景。我又雄心欲着鞭。

歲暮荒景益甚偕諸紳士設局勸賑卽事感賦

勸分鄉誼爲災黎。哀益先將戶籍稽。事鉅不同援嫂溺。惠微只恃乞鄰醯。身憂天下原非分。費出他人豈自齋。從井救人堪一笑。兒孫方抱飯籮嘍。

立春前一日朱虛舟藩伯招同劉檀橋中允洪稚存編修湯樸齋員外瞿秩山觀察崔雲客太守陳樾齋家味辛兩司馬蔣瑩溪別駕管道明州牧崔禮卿明府讌集卽事

嘉醺迎春雪未殘。聯翩裾屐赴辛盤。座多舊識無虛讓。肴是新翻各飽餐。花信探杯人射覆。酒兵衝陣將登壇。只嫌漸啓豪華習。可少迂儒一味酸。

杜門概謝應酬忙。設版焦瑕自畫疆。老避聲名三退舍。閒看今古一炊梁。讀書漫恃青藜火。傳世何關古錦囊。堪笑鄭莊勤置驛。徒從冠蓋借輝光。

### 悼亡

已分今生不服縗。誰知暮景鼓盆悲。生甘荆布無交謫。歿剩蠶鹽有去思。得死夫前原是福。相逢地下料非遲。只憐老伴相依久。忍對空幃不淚垂。  
在官日少在家多。辛苦持門鬢漸皤。薄產不嫌洲種橘。敝居常理屋牽蘿。內言出柩先申警。側室生兒倍撫摩。家政如今更誰倚。祇應獨問夜如何。

椒觴隨例拜新年。病不能興黯獨眠。兒女滿前那忍捨。參苓無效竟難延。向隅暗淚潛流枕。營奠遺言戒費錢。最是傷心鳩祝嘯。翻疑辟穀去登仙。君以腸噎症病歿。

### 偶閱小倉山房詩再題

不拘格律破空行。絕世奇才語必驚。愛宿花爲胡蝶夢。惹銷魂亦野狐精。玄絃欲奪霓裳曲。赤手能摧武庫兵。老我自知輸一着。只因不敢恃聰明。

葉保堂明經多購抄本異書內有馮夢龍甲申紀聞陳濟生再生紀略王世德崇禎遺錄程源孤臣紀哭等書皆明末說部中所記時事可與明史互相參訂者也楊舍寓齋無事借以遣日偶有感

觸輒韻之

劫運人才國祚終。滿朝門戶正交鋒。東林點將罌兼煞。東林點將錄內南渡浮江馬不龍。園土清流屍裹

蕪。潢池劇賊堠傳烽。始知生長昇平幸。出處翛然一短筇。

四鎮調停已割疆。此首專咏史可法運移那得救垂亡。生嫌棣萼枝偏暖。公弟可程曾降賊昔文天祥有弟壁降元或甲以詩有南枝向暖北枝寒之句

死葬梅花土亦香。對梅花嶺盡瘁孤忠諸葛表。立君大義紫陽綱。見可法答攝政王書終邀御筆褒華袞。高宗純皇帝御製題可法答書

後千載丹心日月光。

贈保堂

百里江城權湖洞。喜逢知己好懷開。舊書容我巾箱借。今雨何人步履來。便擬結盟鷗伴侶。相攜望海蜃樓臺。寓齋稍待荷花放。可少臨流一舉杯。

題沈荀蔚蜀難略多記張獻忠孫可望等事

也是西陲一劫塵。天教劇賊殄川民。豈聞狼虎能開國。竟使魚羊恣食人。君后支糧須計口。金銀沉水不翻身。不知當日殘黎幾。何處逃生伏棘榛。

喫煙戲咏

淡芭味不入醎酸。偏惹相思欲斷難。古詩相思若煙草豈學仙能吸雲霧。幾令人變黑心肝。噴浮銀管香驅穢。暖

入丹田氣辟寒。贏得先生誇老健。鼻尖出火駭旁觀。

次韻寄答陳蘭江同年金華教授

千里書來自浙東。無窮別緒寸函中。爲詩我恐如高叟。通德君應號鄭公。五斗早看辭折坡。一甔聊當隱高嵩。初平叱石仙踪在。安得相尋醉碧筒。

次韻答徐芝堂孝廉見贈之作

西山朝爽颯英姿。正喜披襟溽暑時。城北徐公原有貌。渭南趙嘏肯無詩。耽吟本是同功繭。衰老應憐獨足夔。不覺對君慚謏劣。又思補下董生帷。

自戲

莫嗔氣味秀才酸。三十餘年不服官。入世更無同輩語。聞名都作古人看。眼昏屢爲塵揩鏡。頭禿惟憑帶繫冠。姑妄言之供一笑。幾時謁選到長安。

靜觀

古而無死復何哀。悔不機杼早自摧。老樹尙誇霜後勁。名花可惜雨中開。耐閒還藉書消遣。謝病兼辭客往來。莫怪蓬蒿滿三徑。久無屐齒印蒼苔。

靜中觀物見天真。小闢庭齋景色新。枯木有藤青借葉。流螢無火碧成燐。筇枝懶拄惟呼僕。紈扇將捐尙



戀人自笑生平置何等。老來剩作臥雲身。

書賈施朝英每年就我刷印拙刻甌北詩鈔陔餘叢考廿二史劄記十家詩話等各數百部書以一

笑

和凝板本早雕鏤。卻被屠沽索價酬。鼠璞料無三倍獲。雞林可有百金求。奇分宛委藏書穴。氣壓麻沙販客舟。我是爲名他爲利。大家不免達人羞。

哭蔣立崖之訃

噩耗傳來夢亦驚。寢門爲位淚泉傾。斯文謬荷推先達。知己方將託後生。詩有未招魂旅跡。感深不見面交情。君緣事遣戍烏魯木齊從奎林將軍處得拙詩歸遂謁我定交可憐繡谷齋前酒。猶記清談到五更。

閱竹葉菴遺集

三年京邸共挑燈。遺集差欣入剡藤。走觸醋瓶原是癖。覆來醬甌有誰拯。詩文須到重翻板。名姓焉能久繫縲。放眼藝林聊一笑。才人何限氣飛騰。

忽夢重守鎮安感賦

久無夢到日南春。忽漫之官撫舊民。白首重來誰識我。青山無恙尙迎人。樂公社在香猶裊。馮婦倉開粟已陳。好似令威華表鶴。小遊仙去認前塵。

浮榮

明知聲譽亦浮榮。尙未甘爲腐草螢。當代更無毛子晉。他年誰輯趙明誠。送終自是兒曹事。作誅徒叨舊友情。只有詩文早流播。或堪塵坳駐微名。

觀噉都關校獵

霜落秋高校獵時。平蕪草薙正堪馳。鼻尖出火鈴追犬。耳後生風箭叫鷗。壯士功名三尺劍。將軍號令一竿旗。多慚壁上閒觀處。不及周陞一健兒。

暨陽野望

客居恬適漸忘家。少憩郊原倚杖斜。江上無風三尺浪。山中有歷四時花。勤吏單夾暄涼服。預識陰晴曉暮霞。又是秋成黃落候。相從野老話籌車。

吳門晤范洽園編修馮實庵侍御潘榕臯員外暨蔣于野兄弟

訪舊重來七里塘。經年不見倍情長。何當老態三遺矢。還附名流一瓣香。相戒不談朝市事。得閒已淡利名場。暮年正要飛騰景。同看紅霞絢夕陽。

俊兒以我年邁強進參劑其價四百八十換此豈吾輩所宜

鯉庭奉我養生方。一擲千金付藥囊。少日已甘三韭菜。晚年翻飲獨參湯。固知毛裏關心切。直藉刀圭買

命長氣散則歸原順事。老夫心早契蒙莊。

靜觀

從來風月屬詩家。惜未潛參迹象賒。聚散不常雲出岫。早遲有信樹開花。鬼無靈爽憑何祟。物有菁莪肯不華。尙愧觀梅少師授。難將易理洞幽遐。

煖足用温水貯錫孟入被中可達旦不冷昔黃山谷名之曰腳婆今俗呼爲湯婆戲咏

一斗溫泉貯錫孟。勝他黃嬾夜相娛。書引睡曰黃嬾布衾絮薄堪伸腳。二字見新唐書周智光傳紙帳花寒不結趺。發過牀邊

安虎子。器煖逾被底睡狸奴。放翁詩夜長暖足有狸奴老夫正得女妻樂。不許稱婆要改呼。

東籬

東籬半畝薤蒿萊。散步消閒日幾迴。蔀屋何嫌非館閣。桃源豈必有樓臺。花無名字因心造。客有談諧笑口開。詩料平時久忘卻。誰知收召也還來。

過杭白峯之墓

少年同學最關情。重過荒郊宿草瑩。死已無知何麥飯。生雖有食只藜羹。書窗共硯論文夕。蕭寺聯牀聽雨聲。他日九原相見處。可能還作舊嚶鳴。

歸途

半畝庭齋百卉非。客懷欲別轉依依。幾同夢澤留居久。見李太白集笑比和林避暑歸。乳燕經秋空墨去。鷓鴣向暖故山飛。候門遙識孫男女。先認衰容較瘠肥。

和保堂甘露寺咏李德裕之作

千步禪林列岫環。衛公會此躡孱顏。杖無方竹留蕭寺。公以方竹杖贈寺僧僧圓而漆之泉有中泠敵惠山。公在長安用泉口福想應羊食盡。清波雜志公應食一萬羊羈魂難附鳥飛還。在海外有詩獨上高樓望帝京鳥飛猶是半年程倘恢相度消朋黨。千載英名孰許攀。

觀化

註釋蟲魚愧大家。豈知天咫驗萌芽。鐵鞭踏破春難覓。葭管吹來物自華。水力不濡鳧鴨氄。鳧鴨入水氄毛亦不濕人工能變鳳雛花。鳳仙雞冠灌漑勤自能變色眼前何一非新意。猶只恆河裏一沙。

己巳元旦

東風吹送物華新。八十三翁拜紫宸。余歸田後每歲元旦必望闕行禮富貴場曾甘退步。昇平時易作完人。添籌且喜增年歲。鼓缶惟當樂夕晨。回憶求名赴京國。一週花甲又逢春。

閱歐陽五代史多戰爭之事夜遂夢身履行間蓋神不守宅有此迷離恇恍之境尤屬衰至之徵也

詩以記之

忽然夢入大槐安。竟似身上將壇帳。下練兵皮蹴毬。筵前擁妓肉臺盤。幻成勢燄非真境。出自貪癡本笑端。聊喜小遊仙一霎。豪華快洗秀才酸。

人日大雪喜賦

人日欣逢瑞雪來。萬花飛舞把春催。雞聲誤認三更月。狗迹工摹五瓣梅。大地頓教成玉海。新年先喜賞銀杯。老夫髮亦盈頭白。敢詡梁園作賦才。

是日味辛治具肴饌極精。座中衣狔猢猻裘者五人。余裘最敝而余年亦最老。或謂燕毛卽所以序齒也。滿堂皆噴飯而余以主人族誼不敢當首座之尊。詩以解嘲。

餘酥送暖歲初更。鄉飲連朝遞治觥。數見不鮮人太熟。後來居上饌逾精。裘如劉帥隨年杖。酒闋王郎斫地聲。笑我已甘辭首座。漁樵席上不須爭。

正月十九日爲亡室程恭人忌辰。脫纓輟泣。老淚已枯。子然顧影。轉覺神傷也。

鸞鏡輝沉歲一期。悼亡騎省有餘思。別來形影空相弔。夢裏悲歡只自知。漫有牀前阿堵物。也多膝下甯馨兒。一家依舊團圞景。脈脈鰥魚淚獨垂。

健間放翁詩造物予間兼予健

已交大蓋滿頭霜。飯不能強步履強。我慕九旬胡壽愷。鄉先輩胡漫。晚人稱四海魯靈光。僅留畫餅名何

用且喜炊梁夢尙長。天子健聞甯敢負。一筇一笠一輕航。

聞筠浦相公總裁會試喜賦

相臣主試朗文華。鎖院深嚴靜不譁。四海久知心似水。九重兼倚眼無花。量才尺挽風騷古。大雅輪扶願力除。四十年前辛苦地。今看親示指南車。

哭洪稚存編修

里閭徵逐慣從遊。一病何期竟不瘳。生爲狂言投萬里。君以上書死猶遺稿待千秋。繁音不聽梨園調。平不聽戲。健步堪當刻曲舟。出必胸次知君原灑落。古來何事不浮漚。

賜環歸後脫征衫。十笏新營老學菴。花事巧分殷七七。風情亦狎董三三。坡贈李方叔詩。須煩李居士。重說後三三。謂所昵營妓董九。高才失路宜無賴。妄語欺人固不慙。老我獨傷同調盡。共誰茗壑作清談。

廿年以長合先亡。豈意翻爲作輓章。爲我前驅開覺路。比君後死殿名場。作碑索謝非錢辦。斫地悲歌亦酒狂。終有未消奇氣在。重泉應尙吐光芒。余長君二十年。嘗戲謂君他日當爲吾作墓誌。君曰如此則先時戲笑之言。竟成語讖。

本擬憑君作替人。豈知先我委窮塵。江淹誰與收殘錦。王翰空教卜近鄰。余與君共一條街。和韻詩常推勁敵。賣

文錢尙賑飢民。更從何處論陰德。救得蒼生反殞身。丁卯捐賑。君獨任其勞。

哭劉瀛坡總戎

如此相知忍棄捐。身騎箕尾竟登仙。精神老未三遺矢。仕宦歸惟二頃田。儒將風流鈴閣靜。郎君水藻笏  
牀聯。公三子皆榮仕。知公脫屣應無憾。獨我憑誰伴暮年。

自愧

求仙學佛兩難成。虛負書窗一短檠。年老慣爲人送死。才疎敢與世爭名。興來未免回頭錯。數盡何妨撒  
手行。只愧東山但高臥。曾無絲髮濟蒼生。

瑩溪閱拙詩獎借過甚愧不敢當敬酬奉答

書生結習只雕蟲。謬賞叨稱錦繡胸。不朽名須身自定。相知人每世難逢。居貧聊享千金帚。老倦惟支九  
節筇。儒者當爲事何限。愧將寸管鬪詞宗。

戲調瑩溪

死盡交游絕足音。更無朋舊與披襟。欲聯後輩爲同輩。未必他心似我心。浮白百杯嫌費酒。呼盧五木怕  
輸金。不如還把殘書看。消得分陰又寸陰。

目暗

安得空青點眼眶。糊塗過日意難降。近看三尺不能四。遠望一人偏似雙。此一聯非親歷其境不知也。暗避炎光籠皂

幃明貪霽景就疎窻。短檠終惜拋牆角。健筆猶思百斛扛。

余方有聽他有句自然來之句。明早枕上忽得人間無路海茫茫一句。初不知曹唐詩也。隨又得雲外有天星歷歷湊成一聯。亦出於無意。蓋余修文赴召之讖矣。補成一律記之。

步虛詞豈學曹唐。忽漫詩來夢蝶牀。雲外有天星歷歷。人間無路海茫茫。嚙言本不論工拙。讖語何須取吉祥。贏得老誇詩境熟。偶然脫口便成章。

### 獨夜

麗譙梆鼓夜初長。節物經秋愛淺涼。殘雨濕留聲點滴。孤燈清照夢悠揚。時趨競尙新翻曲。舊學幾忘急就章。心事都來五更枕。又添一番應酬忙。

### 放言

幻緣妄念總蠲除。獨立蒼茫想古初。混沌之中生在卯。羲軒以上讀何書。五紋刺繡同毛褐。七寶樓臺亦草廬。身不百年心萬緒。何如一切付空虛。如此昇平不放狂。更於何日得相祥。官高崔烈榮仍臭。壽到錢鏗死亦殤。千古棋枰無定局。一時竿木且逢場。祇餘童叟觀河處。見性依然久不忘。

### 夜坐



秋來一雨一番涼。宴坐蕭齋夜未央。詩句鍊教生處熟。才名排到短中長。塵勞誰脫千絲網。世幻從看百戲場。只有及時行樂好。木樨過又菊花黃。

年初偕同鄉諸公。纜舟亭探春。半年間瀛坡雅存相繼。下世今日重遊。不勝存歿之感。

曾聯步履探春光。今日重來泊野航。一畝園仍好林壑。半年事已小滄桑。人生最樂惟交契。老境愁逢是死喪。便抵黃公爐畔路。臨風回首獨蒼茫。

一蟻

豎頭橫目本無奇。萬蟻叢中一蟻微。徒守書馱身已誤。縱成詩聖世奚裨。綵花色好非真艷。畫餅名高不救飢。五岳胸中且收拾。不如隨分醉深卮。

恭遇皇上五十萬壽。翼偕在籍紳士。纜舟亭虔設經壇。叩祝敬賦。

蕭齋頻問夜何其。起赴郊園叩祝釐。地是城東迎蹕處。人皆林下掛冠時。梅檀香滙春雲護。梵唄聲長晝景移。自笑朝衣箱久疊。今朝綵繡滿身披。

聖壽覃恩典隆。養老翼以年逾八十。得拜絹綿米肉之賜。恭紀三首。

遂初久不綴朝班。帝寶猶蒙及退閒。養老愧無言可乞。錫釐早有詔先頒。優同清俸支宮觀。喜溢榮光耀市闌。莫怪放翁誇十錦。宋制致仕後有祠祿者。所領賜物名十樣錦。見放翁集。歸田人再拜恩難。

普天慶會共呼嵩。想見天閭淑景融。運是太和春不老。數纔大衍日方中。滄溟無警妖氛熄。繡甸咸登歲事豐。如此鴻禧逢七度。吾生幸亦幾人同。自乾隆辛未至今。翼恭遇國慶凡七次。賜葛猶誇杜拾遺。況逢慶典荷殊施。殘牙曾吃紅綾餅。妙句慚無黃絹辭。庠序榮推三老席。庭階暖護萬年枝。卻憐筋骨衰孱甚。不得親身叩玉墀。

### 消寒

冰霜如此出何之。排日尋歡遣歲遲。營室但期容我膝。時方葺暖室。說詩何必解人頤。收藏雪水金莖露。檢點梅花玉樹枝。轉眼消寒過九九。春光又到艷陽時。

閒不可耐。或勸余雜撰戲本。以遣時日者。余老矣。豈作此狡獪耶。謝之。

哀樂中年易感傷。故應絲竹遣流光。豈堪花月張三影。自譜琵琶趙五娘。羅貫中曾三世啞。郭門高後唐莊宗。優名竟及身亡。祇餘玉茗湯開遠。湯若士子。明末殉難。留得清芬在戰場。

### 日計

東坡日計百錢叉。枕上先期飭吃齋。省費擁爐燒石炭。取酬籩酒壓茅柴。十千漫想何曾飯。廿七聊師庾杲鮭。留與熙朝歌擊壤。含哺鼓腹作無懷。

### 戲爲俳體遣閒

莫須有者且勿論。何以文爲甯更華。吾在久將公等壓。子求固不汝曹瑕。心常欲按無明火。事不求全也罷茶。閒遣無聊作俳語。麗譙更鼓已三撾。

閱綏寇紀略書蜀亂遺事

不信人間浩劫塵。一羣屠伯毒峩岷。後房奏樂身無首。白晝騎牆鬼瞰人。殺運自然生劇賊。興朝仍不列功臣。闕獻爲本朝先驅之資誰知今日蕃昌景。蜀錦郫筒萬象春。

蜀江如沸血流紅。銅馬妖氛恣內訌。縱欲逃生先斬艾。漫言好殺是英雄。氣憑地險濤轟峽。力與天爭礮打空。論報尙餘遺恨在。僅償一箭貫當中。

庚午元日

朝正絳闕集鳴珂。野老惟知擊壤歌。豐樂年成春酒滿。昇平時世壽人多。回思壯歲真彈指。曾向名場奮決科。重赴鹿鳴如可待。輕橈準擬泛滄波。

百年難遇歲朝春。何幸親經此令辰。天厭兩回雖省事。坡詩省是天公厭兩回科逢乙榜又興賓。余中式乾隆庚午科舉人今又逢嘉慶庚午人世推排成老物。江湖嘯傲得閒身。卻慚扶杖龍鍾態。不稱陽和景色新。

消閒

消閒何處覓清娛。仍守殘編坐結趺。忽得新思矜弋獲。偶忘佳句費追逋。眼前惜少嚶鳴友。海上由他逐

晁夫他日有人如作畫。或疑伏勝授經圖。  
重向陳編續舊盟。多生結習有餘情。居今敢使忘稽古。細行何能受大名。高枕北窗尋樂地。擁書南面作  
長城。衰殘敢謂無餘事。炳燭光猶到曉明。

自幸

何處偷來得此身。天教晚作葛懷民。少經貧賤能知足。老剩衰孱更率真。風月從來無盡藏。英雄大抵是  
癡人。祇應獨領閒中味。跌坐蒲團結淨因。  
詹尹何須問卜居。及時行樂步當車。渡江春到花爭發。過午人歸市自虛。宵怕不眠惟強酒。晝嫌無事又  
看書。偶然食肉仍愁脹。熬熟山查候飯餘。

楊雲珊自長垣歸出示近作嘆賞不足詩以誌愛

四海交游剩隻身。師資豈意出比鄰。向來枉自求知己。垂老今纔得替人。入木三分詩思銳。散霞五色物  
華新。從今鑿壁光堪借。請益何辭步履塵。君與余  
比鄰

畫士顧生爲我寫照卽題幀末

山澤之臞土木身。偶煩畫史爲傳真。功名不上凌烟閣。尸祝甯期畏壘民。窗下猶勤三寸管。鏡中暗換十  
年人。他年留作高曾矩。或有書香尙可循。

春興

東風桃柳一番新。又是陽和大地春。代序屢遷身易老。物華方富我甯貧。要觀後世無窮事。想作長年不死人。只有學仙堪耐久。卻愁修煉太勞神。

夜夢忽得熏香侍女整朝衣一句似係早朝詩爰足成之

羅幃頻問夜何其。爲有封章上玉扉。掌漏監奴添夕燎。薰香侍女整朝衣。九宵籟寂鐘初動。千樹陰濃露未晞。取次東華車馬集。五雲糾縷藹祥暉。

過前明故宮基

萬里山河百戰收。子孫容易失神州。龍驤竟渡無天塹。虎踞空傳有石頭。遺俗後庭歌玉樹。故基羅郭罩金甌。孝陵靈爽如重過。應有滄桑涕淚流。

大功坊

中書行省大功坊。開國勛名絕輩行。草昧未開能擇主。旂常難報到封王。運移故宅空遺像。事往威聲尙戰場。今日經過一憑弔。令人想見奮鷹揚。

白頭

老壽人皆羨久留。久留亦苦少朋儔。徧翻除目無相識。欲作遨頭孰共遊。歲月只知方未艾。身名悔不早

爲謀可憐多少同心友，一一看他土一抔。

重赴鹿鳴宴恭記四詩

歲又逢庚赴舉忙，賓興筵許附榮光。老僧回證初禪地，退將重經舊戰場。見獵敢云心尙喜，收棋聊幸拙堪藏。綴行同出人爭笑，白髮翁隨白面郎。

歸田卅載臥江村，十笏書齋兩板門。豈有才猷供世用，祇將老壽倖朝恩。恭遇聖壽，蒙恩已拜緝綿酒帛之賜。身謀已刻鳩

爲杖，眼界從嘔蝨處禪。敢復誇張年少事，從戎曾役百羌渾。

重赴金陵四日程，滄江如舊布帆輕。曾經鉅鹿沉船戰，再聽春蠶食葉聲。九折坂猶心畏蜀，三神山孰步登瀛。風簷弋獲原非易，多少文心耗短檠。

未得追踪洛社英，喜從新榜結齊盟。敢期同輩尊前輩，未必先庚勝後庚。智可識途推老馬，才慚橫海掉長鯨。鹿鳴重宴已非望，遑想瓊林再舉觥。

赴江甯途次奉恩旨加三品職銜准入鹿鳴筵宴再紀五首

布帆安穩出橫塘，隄柳纔秋葉未黃。此去不須三寸筆，重來已是滿頭霜。也勞送別如征客，豈尙求名赴舉場。聊比看花踏陳迹，元都前度老劉郎。

遂初豈意忽遷鶯，爲歷鄉關兩鹿鳴。曾是昔年辛苦地，重聽嘉宴管絃聲。席間多已先科第，監臨及監試提調皆由科

第。榜上何須有姓名。自是聖朝修盛舉。衰孱敢濫廁耆英。

會叨先帝舊朝臣。久作還鄉賀季真。敢望紹庭收廢籍。再蒙進秩換華紳。青雲一榜新先輩。黃髮三朝古老人。回首生平歎歷處。翻教感切淚沾巾。

早朝曾趁露華晞。久疊巾衫黯不輝。佚老只宜居士服。希榮翻製侍臣衣。蔚藍頂上明更暗。道員青金石頂三品用透

明藍坡繡補胸前走變飛。道員辦家補服更喜家居無職事。維鵜得免曠官譏。  
先後同年強作儔。不曾同試月燈毬。周忱自願爲挨宿。欽若終嫌是贅疣。退院身惟隨粥飯。緯蕭人已狎。鼻鷗。豈知六十年相隔。還向時髦結輩流。周忱館選時已取二十八人。以應列宿。忱自願讀中秘書。遂入選。時謂之挨宿。

制府松公湘浦贈三品冠服賦謝

恩詔加銜寵腐儒。卽蒙購贈適相需。正思焜耀榮君賜。恰好莊嚴稱我軀。韓尉豈誇衣錦繡。管甯仍戀布裙襦。祇應大雅扶輪力。要侈文昌聚讌圖。

奉和監臨廣撫軍省堂見贈原韻

發解筵前鼓樂鳴。腐儒何幸得分榮。直將局外殘棋着。來佔人間畫餅名。疎懶久成都散漢。引援應作老門生。只慚悞玷山公啓。夾袋中人到列卿。

天尙留君賦鹿鳴。用集仰邀賜爵羨恩榮。數編甌北詩人集。一代江南才子名。若論甲科真後輩。敢言推薦卽門生。竚看再拜瓊林宴。百歲官加三品卿。

隨園弔袁子才

隨園風景尙依然。今日重過剩故阡。花藥尙爲才子艷。亭臺能守後人賢。十年俯仰成陳迹。並世交遊亦宿緣。老我獨傷同調盡。臨行能不重留連。

稱詩

稱詩何必苦爭新。無意爲詩境乃真。水月鏡花言外意。雪來柳往景中人。江東杜甫雲垂暮。枕中甌陽夜嚮晨。莫食地肥烟火氣。仙人掌有露華新。

老友莊似撰

別字虛菴

官關陝三十餘年洊陞牧守今年老致仕貧不能歸遠承書訊詩以寄答兼望其

早回

朋簪氣誼最相親。一別俄驚三十春。顏狀久應青鬢改。情懷猶是白頭新。遊踪王粲登樓賦。近局陶公漉酒巾。得及此生重見否。大家都是暮年人。君今年七十四。六余八十四。寄來書札尙專精。想見康強老眼明。躁進不爲偏躁退。高官已做又高明。晚中樂事惟良友。家計貽謀付後生。我已移居履道里。速來相伴作者英。



重赴鹿鳴詩海內名流屬和者三四千首暇日編輯長卷戲書於後

桑榆景受國恩深。引得名流共苦吟。白雪一歌無下里。朱絃三歎有遺音。癡心尙想佺喬壽。佳話仍添翰墨林。老健未須嗟大耋。聊將鼓缶當鳴琴。

再題諸名流屬和重赴鹿鳴詩長卷

工歌堂上奏萃蒿。重憶賓興典物昭。禮樂尙存三代古。衣冠肅拜九閭遙。宴前先望闕行禮文昌風景描難就。司隸威儀靜不囂。我比新郎君更幸。榮遷不藉燭三條。

雜感

人謀常向巧中疎。陸放翁句蘭偶當門本易鋤。枉自守株猶待兔。幾曾緣木可求魚。曲肱奧室閒無擾。曝背晴軒暖有餘。任是塵緣蝟毛集。吾身自有指南車。

歲晏

老猶頑健眼纔花。似覺年光尙未涯。館閣人皆成後輩。詩文集頗列名家。身無遺憾常安枕。室有餘閒自煮茶。預喜麥收炊餅大。陳瑩中擬傲京華。

重赴鹿鳴詩和者既多或勸余刪潤勒成大卷書以見意

牛腰籠卷聚文心。都是名流大雅吟。聊喜拋磚能引玉。豈須點鐵始成金。人才輩出如連茹。同氣相求自

盍簪贏得老夫誇口說。苞苴滿屋總珍珠。

### 野夫

網漏吞舟一野夫。少年館閣晚江湖。詞林故事惟香茗。來宗道作相笑倪元璐屢言事謂渠何必多言詞林故事惟香茗耳時稱為清客宰相見明史本傳

名士高年入畫圖。陸放翁詩團扇甯復鑼聲催傀儡。已收種末舞都盧。只慚詩不求工處。共笑吳歎膽太

### 辛未元日

纔看重赴鹿鳴筵。況值江鄉大有年。天幸已多非敢望。飯緣未滿似猶延。惜無好友聯裾屐。剩有閒情付簡編。早喜春光引清賞。傍花隨柳過前川。

### 閒民

中歲歸田賀季真。四民之外一閒民。敢希孔廟廡間肉。猶是盧生夢裏身。光景常新惟好句。取攜不盡是芳春。只慚自命居何等。老作吟窓擁鼻人。

### 浮論

浮論無稽槩可刪。墜淵加膝相回環。適從何來蠅集此。聊以充數蝨其閒。丈夫動足有萬里。寒士待庇逾千間。局促轅駒豈足道。出門一笑開心顏。

靈巖山館弔畢秋帆制府

靈巖山館好邱樊。吾友居停席未溫。過客尙尋清闕閣。籍官幸免奉誠園。錦帆涇駛無游舫。響屨廊空有斷垣。太息盛衰纔廿載。徒令憑弔一銷魂。

哭筠浦相公

晚景何期有此哀。通門高竟泰山頽。生多遺愛留三省。歷官江省最久。歿尙賢聲遍九垓。老健不須扶杖拜。恩深未敢乞身迴。公常有乞身之思。以恩重不敢。獨憐衰朽將誰倚。無復餘光到草萊。

交誼苔岑五十秋。喜聽揆席懋勳猷。登龍門有人增價。旋馬廳無地晏游。別久尙期杯在手。年高應亦雪盈頭。平津閣卽西州路。那禁羊曇涕淚流。

內姪劉慕陔連副自潮州致政歸里喜贈

敷歷功高遽引年。生平宦轍總遐邊。南經陸賈降陀地。西闢張騫鑿空天。先曾駐西藏三年。拾級正堪前齒屐。收篷偏趁順風船。始知身處脂膏潤。原有文臣不愛錢。

遣興二首

三間砥室淨無塵。老作人間一幸民。雞憚爲犧先斷尾。鵠難中的反求身。白頭到處招人厭。青眼憑誰向我親。樂地總歸名教內。奔馳多愧枉勞神。

剔盡殘燈夜嚮晨。商量要保不訾身。儒門風味從來淡。老境詩篇不鬪新。聊復收香如倒挂。久將嚼蠟看橫陳。只憐孤寂無交契。把卷惟應對古人。

每日飯後庭中行。六百步翼以流通血脈。遂成老年日課。

不可徒行舊大夫。聊當行藥步庭隅。磨牛踏處惟陳跡。垤蟻旋來總坦途。飽食不教攤飯臥。偃行時亦沒階趨。更添短拐相幫處。自笑無官尚給扶。

朝衣

久疊朝衫歲屢更。一年兩度銜恩榮。聖壽及元旦。出游未共春衣典。起早翻如夜繡行。侍女熏香殊故事。書生

服采記初程。曾經六十年收筭。冷暖相關倍有情。

九秩

九秩開籌鬢已皤。壯心尚擬奮提戈。嫖姚遠出祁連塞。劉秩親麾曳落河。雞豈惡聲天下曉。馬皆健足雪中過。歸來獻捷明光殿。傳與邊關唱凱歌。

勇退

生長江南鬢已皤。也曾績學戒蹉跎。書生敢與人論福。老境惟期樂有窩。廡仕榮華辭最早。太平歲月享尤多。倘非勇退甘閑散。或恐亨衢有折磨。

浮論

毀有求全譽不虞。祇應自握定心符。絮衣頻喚縫人補。藜杖聊當倩女扶。蠅可遠飛緣附驥。馬經屢寫或成烏。識真自有蘭亭本。肯逐時流說莞枯。

譙鼓

譙鼓三擗夜嚮明。書生事已近殘更。壯夫不爲雕蟲技。下士大笑蒼蠅聲。冷蕊尙留殘菊艷。早香漸綻老梅清。小春已覺風光好。預擬尋芳帶酒鎗。

揚州

綠楊城外泛輕艫。放眼先開四望窓。柔櫓搖如魚掉尾。快帆掠似鴈橫江。馬頭冠蓋長亭路。牛背兒童短笛腔。回憶昔遊將廿載。依然風景似鄉邦。

老來

老來意興漸頹唐。踏鼓東華夢久忘。尙有貪嗔癡未去。敢誇才學識兼長。筠簾早捲延朝爽。羽扇輕揮納晚涼。所愧客來須答拜。呼兒代我應酬忙。

江陰道中

一枝柔櫓泛輕橈。橘綠橙黃九月交。碎石砌牆無縫巧。老藤絡土有根牢。豐年野宿無心警。永夜清吟亦

口號倚檻莫愁風露冷。巾箱尙有舊綈袍。

獨立

獨立蒼茫度寂寥。結廬人境穩東臯。翠微經雨山新沐。黃茂收場地不毛。野籬過船搔背癢。矮牆取果等身高。只慚好景無佳句。空負詩中一世豪。

鄉居

畏壘鄉居似野僧。蕭然氣味冷如冰。割禾地頓低三尺。種麥田翻顯百塍。露積場皆推突兀。新籬人有醉僮騰。老夫倚杖柴門外。閒向斜陽數過禽。

題黃道婆祠

松江初來教人織布者

一技專長濟萬邦。故應祠廟赫旌幢。高樓占地不占地。平水通海又通江。未有蠶桑人訣纘。共勤機杼女鳴銜。君看鶯脰湖邊月。夜夜寒燈剔短釭。

過靈巖山故人葬地已易主矣感賦

買得青山作殯宮。書生願力故英雄。主人購此地頗費心力。豈知身後牛眠地。又換生前馬鬣封。礮石纔鐫新勒碣。護墳卽用舊栽松。靈巖一片佳山水。留作他年弔古恫。公自言吾葬此使人長指某人之墓足矣

哭李嗇生郡博

朋簪回數幾心交。腸斷揚州廿四橋。步履過從無半里。盤餐留話動連宵。喜聞質庫開闔闔。更買高閣俯麗譙。獨有故人餘老淚。更無灑處湧如潮。

相國尹文端公節制兩江四十餘年。遺愛在人久而弗替。今蘇州新建名宦祠。奉神主入祀。翼以老門生得襄盛舉。欣忭難名。敬賦以誌。

傑構尊嚴五百弓。名臣入祀典儀隆。死如可作吾誰與。沒尚難忘世自公。嘉樹好栽丞相柏。孤標獨挺嶧陽桐。尚留白首門生在。親見勳庸勒鼎鐘。

爲人寫墓銘後戲題

老去羞留疥壁塵。書丹遣寫墓碑勻。百年白頭同歸日。五字蘭亭不損真。帶減腰圍幾一寸。筆鏖腕力尚千鈞。他年藝苑傳佳話。竹垞貪多恐笨人。

鄉試屆期分遣彥兒科聯孫就試。南闈和羹慶齡向京闈。赴試詩以送之。

賓興才俊競躋攀。分遣兒孫各上壇。兩路夾攻應有獲。衆擎易舉或無難。科場得失原靡定。文字妍媸要共觀。倘得泥金來報捷。老夫那不更加餐。

習靜

慾障邪魔絕外緣。祇將習靜養衰年。孫曾名字須披簿。賓友音書少答箋。獨宿慣嫌釵澤氣。中虛惟啖粥。

糜眠。只慚杏酪清晨吃。未免呼童隔夜煎。

甌北詩鈔 七言律七

四六一





# 甌北詩鈔絕句一

## 題黃丈季游梅花小照

雪作寒交月作鄰。水邊疎影本前身。始知畫手傳神好。只寫梅花不寫人。

## 野菊

多少秋芳入貴家。獨餘籬落幾寒葩。對君莫訝相憐甚。同是無人賞鑒花。

## 澄懷園消暑絕句

名園長夏景清和。借與幽人領略多。絕似溫公洛陽墅。爲堯夫結一行窩。  
小雨如酥過曉風。幾枝豔發映簾櫳。女郎愛插花盈髻。試手先探月月紅。  
一榻花陰對綠洄。茶烟香篆互縈回。蕭齋四面皆窗戶。何處風來何處開。  
一編閒讀首楞嚴。後夜雞鳴靜諦拈。香罷經聲歇禪榻。諸天細雨正廉纖。

## 題畫

碧梧漏疎陰。綠蕉濺餘濕。高齋寂無聲。獨鶴如人立。  
沿溪一茅齋。老樹出屋頂。采藥人未歸。野鷺踏孤艇。

薄暮蕭齋下。高人相對閒。夕陽紅不盡。楓葉滿空山。

和沈倬其同年看花絕句

薊門霜冷見春遲。吹透東風了不知。忽漫一枝紅杏出。累人牆外立多時。

江上逢歸鴈

幾點春雲鴈北飛。首塗故與客相依。渡江一樣從南去。我是出門他是歸。

曉起

茅店荒雞叫可憎。起來半醒半懵騰。分明一段勞人盡。馬嚼殘芻鼠瞰燈。

東昌道中卽景

野田有砂有礫。邨屋半草半泥。雞如鳥能上樹。馬可當牛駕犁。罩髮女騎驢背。其夫欣爲執鞭。拾通兒逐馬尾。其父快於積錢。

香山夜歸卽事

露柳清陰十里遙。阿誰乘月夜吹簫。馬頭相並無迴避。同踏香塵過板橋。鬢絲秋老杜樊川。那復風情似少年。慚愧驚鴻偏照影。誤人春夢小遊仙。夜永棲鳥寂不飛。露華涼欲透羅衣。玉聰亦解人良會。故踏花陰緩緩歸。

纔下雕鞍又二更。臨歧含語未分明。從今破盡枯禪戒。不在鄰牆鈿釧聲。

題王石谷畫

一雙雁依淺渚。幾葉葦折寒流。莫向夜深清唳。有人江上悲秋。

郊外散步

幽尋步林樾。淺草道旁斜。不爲無人看。臨風也作花。

古樹圓如繖。綠陰了不暑。無人領此清。黃鸝坐交語。

偶題

風雨寥蕭晝掩廬。一編吟到夜窗虛。廚娘莫聒瓶無粟。我已修成乞米書。

戲題姮娥奔月圖

碧天清怨有誰知。奔月非關竊藥馳。如此容華嫁窮羿。教他那得不分離。穀率能摧九日精。何難射落月輪明。尙留桂館藏嬌地。此老當年也有情。

古北口

設險人增一堵牆。天公寒燠豈分疆。如有一樣垂楊樹。關內青青關外黃。

題蔣心餘歸舟安穩圖

軟紅塵土十餘年。一棹滄江意渺然。此老平生終歷落。不登卿相卽求仙。  
桃花貼浪柳垂隄。一葉歸舟老幼齊。難得全家總高致。介之推母伯鸞妻。圖中太夫人。嫂夫  
人及諸郎咸集。  
年家娣姒往來親。內子披圖省識真。燈下側聞頻歎息。他家眞作去聲鹿門人。  
雞犬圖書一櫂輕。寒官也算宦囊成。扁舟莫笑歸裝薄。還與空江載月明。  
丁字簾鉤拂柳絲。六朝佳麗好填詞。挑燈自製秦淮曲。唱殺長干老伎師。  
采石磯頭片月高。一千年後少詩豪。知君醉酒江天夕。尙有生平宮錦袍。

種樹

帶得豐臺土一杷。栽來高已拂簷牙。庭前突見濃陰合。欲賽仙人頃刻花。  
胸中邱壑搆何年。種樹爲園翠蔽天。看是豪奢卻寒儉。省他六月搭棚錢。  
催喚僮奴抱甕過。防他生意漸婆娑。儂行樹下親澆婆。自笑身如郭橐駝。  
翠痕深映讀書堂。不見花紅但葉蒼。說與愛花人聽取。花時那比葉時長。

納涼

暑坐到參橫。微涼猶未生。誰知秋有信。已在一蟲鳴。

題吟癡所譜蔡文姬歸漢傳奇

識曲工詩韻若蘭。忍隨塞馬到呼韓。人間何限傷心事。千載同悲李易安。  
也似蘇卿入塞秋。黃沙漠漠帶旃裘。諸君莫論紅顏污。他是男兒此女流。  
琵琶馬上忍重彈。家國俱催兩淚漣。經過明妃青塚路。轉憐生入玉門關。  
逸典能抄四百篇。不煩十吏校丹鉛。誰知書籍歸王粲。翻賴流離一女傳。  
暮夜醉歸入寢門。似聞亡兒病中氣息。知其魂尚爲我候門也。

跬步相隨履跡存。牽衣每到月黃昏。豈知死後孤魂在。猶爲而翁夜候門。  
簾鉤風動月西斜。彷彿幽魂尚在家。呼到夜深仍不應。一燈如豆落寒花。

中秋夕感作

又看中秋片月圓。未乾老淚再潸然。一家依舊團圓夜。憐汝孤魂若箇邊。

題汶上旅壁

十二年前過汶河。曾徵紅粉唱廻波。不堪老去重來宿。還聽章娘一曲歌。  
舟至瓜洲連日風阻不得渡詩以遣悶

吹浪江豚捲白波。歸心便擬亂流過。長年苦歡公無渡。遇險休貪趨路多。

下雷道中

密箐長留太古青。陰森蔽日晝如暝。樹名龍骨藤雞血。好補炎方草木經。

灘江舟行

元行連日上灘遲。稍喜揚帆疾若馳。纔得順風河又轉。世間那得稱心時。  
絕假盆地聚碧孱。嵌空石笋滿江灣。化工也愛翻新樣。反把真山學假山。

碧雞關

苴蘭城外又青山。一道風烟八百蠻。勒馬雲端重回首。夕陽人在碧雞關。

瀾滄江

絕壁積鐵黑。路作之字折。下有百丈洪。怒噴雪花熱。

將軍果毅公以額魯特兵分給余帳供役

帳下新添突騎多。曉隨鳴鏑夜橫戈。軍中莫笑書生弱。親領羗渾曳落河。

題春山仙弈圖

花落空山了不知。爲他勝敗未分時。神仙已遣名心斷。閒氣猶爭一着棋。  
局中算劫正勞神。早有閒觀局外身。袖手不來輕下子。爛柯人乃是仙人。

舟行左江道中

爲貪順水去乘舟。其奈連朝遇石尤。畫鷁翻成退飛鳥。可憐辜負此江流。  
水風雙順可兼程。卻教來船何日行。他趁順風吾順水。天心原自最公平。

### 蜚船曲

畫舫凌波映曉梳。盈盈十五似芙蓉。儂家生長胭脂水。不要牽舟岸上居。

蜚人。世居水上。不得結廬於岸也。

漢宮遺種有名花。只在河南水一涯。今夜定情何處宿。輕橈蕩入素馨斜。  
照影晴波似鏡中。髻邊茉莉引香風。曉粧別有施朱法。卯酒微醺兩頰紅。

### 席散偶作

小部梨園夜讌圖。千枝畫燭照瓊瑜。笙歌散後虛堂靜。危坐依然一老儒。

### 泮江道中

邊地敢三宿戀。沂流憑百丈牽。南來無落葉樹。西去皆上水船。  
虎或當晝出山。牛能截江渡水。遠沙鷺似白人。重霧樹如黑鬼。  
密箐烟迷窈冥。陰崖風刮凄凜。深篁忽有人出。驚是獼猴下飲。  
入雲磴百盤計。人行如旋磨。蟻俯江樹千尺餘。猿掛似貫柳魚。  
山高見日常遲。日沒又偏覺早。可憐深谷人家。長是夜多晝少。



自貴陽赴威甯作

天許遊蹤徧八荒。一年輒易一殊方。滇雲粵嶠都行遍。又記郵籤到夜郎。

出守鎮安未一年。赴滇從軍。在滇年餘。回鎮安。甫九月。調廣州。

在廣一年。今又入黔。每一年輒易一地也。

三兩茅棚嵌碧螺。坡邊蕎麥水邊禾。萬山深處都耕徧。始覺承平日已多。

洪爐煉汞出鉛華。斛土論錢帶雨耙。怪底山童無樹木。五金殺氣在泥沙。

蓮華廠諸山。出鉛礦。無樹木。

由來高處最寒多。官舍層椒似鳥窠。貴西署在山頂。冰雪滿空居絕頂。教人呼作鐵頭陀。

于役古州途次雜咏

曉赴龍場驛路遙。試燈風裏雪微飄。蠻荒瘴旅當時事。二百年來瘴已消。

石磴摩雲往復還。青山隨我馬蹄間。一遺徑過山應笑。這個官人不愛山。

先輩查初白詩云。亂山中有豺狼穴。曲突何人議水西。蓋其時雖已擒安坤。改郡縣而羅鬼猶懷反。

側也。余所轄大定黔西平遠威甯。卽水西地。百年以來。皆成編戶矣。經臨途次雜紀以詩。

濟火曾標蜀漢功。

相傳羅鬼之始。有濟火者。從諸葛武侯征蠻立功。世有其地。

千年兵號水西雄。斷頭掉尾諸羅鬼。今日都編保甲中。

匹馬朝天跡已陳。開通九驛亦勞臣。遂延三百年宣慰。何物奢香一婦人。

華風濡染變狃獠。光氣將開色色新。四十八支頭目衆。近來漸有讀書人。

芳草茸茸路一條。綠痕斜似女裙腰。午風麝過餘香在。疑有蠻娘去未遙。  
一線斜坡上碧穹。真看去地幾千弓。誰知到頂纔爲地。雞犬桑麻在半空。  
說與人間定笑休。黔西三伏冷如秋。使君不是談天衍。親著深山六月裘。  
夕陽晴映數峯間。樹石都成紫綠斑。疲馬漸遲鞭不進。錯疑他也愛看山。

奉賀福總戎姬人到署之喜

將軍威令肅如秋。時向霜天試臂鞬。忽漫春生鈴閣滿。衣香人影太風流。  
雲母餐來意自雄。酒杯浮白燭搖紅。莫嫌老將風情少。尙有如皐射雉弓。

再遊葡萄泉道士玉宣乞詩書以付之

雜卉駢羅羽客家。一枝橫間一枝斜。畫師惜少滕昌祐。來寫欄前細碎花。  
緇衣修道衲參禪。等是三生結淨緣。到此又增身世感。海山兜率兩茫然。  
右爲僧寺。左爲道院。故云。

將發貴陽開府圖公暨約軒笠民諸公張樂祖餞卽席留別

離人將上洞庭舟。餞別深叨喚主謳。爲我紅塵留不住。開場先唱岳陽樓。  
演呂仙洞庭故事。  
罷官敢復戀華珂。何事臨分淚轉沱。老子婆娑爲君等。生平此地故人多。

當筵忽漫意悲涼。依舊紅燈綠酒旁。一曲琵琶哀調急。虎賁重感蔡中郎。  
傷蔡崧震之歿也。是日又演琵琶記。

解唱陽關勸別筵。吳趨樂府最堪憐。一班子弟俱頭白。流落天涯賣戲錢。貴陽城中崑腔。只此一部。皆年老矣。

古來咏明妃楊妃者多失其平戲作二絕

遠嫁呼韓豈素期。請行似怨不逢時。出宮始覺君恩重。臨去猶爲斬畫師。  
擘鼓漁陽爲翠娥。美人若在肯休戈。馬嵬一死追兵緩。妾爲君王拒賊多。

順風歌

連朝艤櫂洞庭邊。一日開帆路半千。此理眼前誰悟得。順風船卽阻風船。  
破浪雄心久淡忘。無端又起意飛揚。蔽江百道風帆下。想見龍驤指建康。

廬山在望不及一遊詩以解嘲

鄉心連夕促歸舟。咫尺匡廬不一遊。千古香山暗相笑。此人枉自過江州。  
記得前身本遠公。何須履跡徧山中。不來五老峯邊坐。恐被人呼六老翁。  
信有坡仙是解人。教從象外見全神。先生不入廬山去。正爲看他面目真。

守風遣悶

琵琶亭畔雨如絲。津吏攔江一纜維。檣轉相烏關未啓。好風偏在空閒時。  
避風長日泊江邨。敢比鷄鷓寄爪痕。已有旁人知退鷁。不將鐘鼓祭東門。

濤聲如沸撼長空。月黑天低夜守風。官燭滿堂消散盡。來分漁火一燈紅。

閒步江岸有邨翁。築屋數間蒔花籠。鳥頗有閒適之趣。戲題二絕。

溪流曲曲柳絲斜。中有幽棲處士家。好个丹青行看子。黃筌禽鳥趙昌花。門前無數阻風舟。相對荒灘歎石尤。不抵此翁閒一笑。看他江水日東流。

金陵

不到金陵廿六年。白門煙柳故依然。多情丁字簾前水。還向秦淮引客船。自丁卯以秋試至。屈指廿六年矣。

剪燭風簷夜漏長。少年曾此賭身強。不堪老作歸山客。重過生平舊戰場。

舟至黃天蕩北風大作迴泊燕子磯

打鼓朝辭燕子磯。蹴江雪浪撲人衣。黃天蕩裏迴舟處。笑比蘄王戰敗歸。本是人間一退翁。故宜路鬼戲途窮。若非反走回頭路。那得輕帆挂順風。重向招提一拄簾。回廊曲磴轉層層。老僧不管人風浪。自向禪堂點佛燈。

虎邱絕句

山塘春早水微波。日日香風送綺羅。不是遊人看山到。此山最是閱人多。捨宅王珣築梵宮。千年變作綺羅叢。笑他佛也風流甚。身在煙花不斷中。

花到寒梅第一流。絕無顏色自清幽。而今也帶胭脂氣。綠萼紅苞滿虎邱。  
暮鳥啼處客歸遲。畫舫前頭月似眉。殘醉倚舷簾半捲。家家水閣上燈時。

庭前雜咏

衰醜形容只自羞。老來宋玉豈風流。鄰家新竹過牆出。似爲窺人露一頭。  
草花低亞樹花高。各自相安氣不驕。偏是陵苕軟無力。附他喬木號凌霄。  
寒士栽花各責成。菊堪釀酒桂調餳。芭蕉如掌閒無用。派管庭前報雨聲。

消夏絕句

兩板衡門暇日多。虛窗閒製小詩哦。唐音宋調俱無用。自有田家擊壤歌。  
蔬筍常慚踏菜羊。村居奉母少嘉嘗。擊鮮忽漫設家宴。釣得鯉魚尺半長。  
消磨長日仗丹鉛。常苦巾箱少逸篇。解事童奴傳好語。門前新到賣書船。  
浴罷東臯看月明。夜涼風露寂無聲。豆棚花下流螢滿。自笑歸田尙火城。

過故友村居

一櫂重來訪故交。依稀何處認門敲。村貧賣樹茅簷露。不見牆西老鶴巢。

題暉南田畫

秋水渚蓮落殘。夕陽沙鳥飛去。漁歌欸乃一聲。人在蘆花深處。

欲往鄧尉看梅。向郡城結伴。莫有應者。適有賣花船到。遂以遊資買梅十餘本。歸而自賞焉。  
風味空山縱寂寥。何妨澹泊一相遭。并無人訪南枝去。驕得梅花分外高。  
省卻遊資買樹栽。栽成又得每年開。此情應被梅花笑。酸在東君不在梅。  
分種南枝與北枝。向陽開早背陰遲。居然妙奪化工手。暗展看花半月期。  
曉謁高堂趁露華。一枝爲浸膽瓶斜。寒家奉母無佳物。便當南陔潔白花。

偶成

午窗一枕夢回時。藥酒微醺一兩卮。閒向綠陰凝立處。人言此老要吟詩。  
煙霧深林叫子規。輕陰幾點雨如絲。笑他牧子騎牛背。身在畫中不自知。

枕上

枕上得詩愁健忘。披衣起寫殘燈光。山妻竊笑老何苦。兒輩讀書無此忙。

漫興

泥絮風情久不狂。如何竿木又逢場。阿難自是無禪定。不爲摩登呪力強。  
誰把姻緣籊錯移。落花偏向溷邊吹。千金一笑猶難買。何福人間賣餅師。

莫訝相看意倍親。徐娘也是過時人。白頭詞客青裙婦。同感琵琶老大身。燈光花影兩參差。有酒如淮酌滿卮。太息相逢吾已老。白家正擬放楊枝。

納涼

暝色赴庭陰。雲輕月微斂。東風觸牆迴。折作西風颭。小兒強解事。奇語驚老叟。不知雲飛速。但道月退走。

戲題閒雲女郎小照

是誰月旦品風華。喚作人間女探花。試向十眉圖比較。黃崇嘏恐不如他。黃崇嘏五代時西蜀女狀元。偏向巖光眼獨青。羊裘也染麝蘭馨。他家足慣加人腹。夜半須防犯女星。謂君所善戲生。

西湖雜詩

六橋曾泛畫船過。十四年來一刹那。今歲重遊春較晚。錢塘門外落花多。重過蓮池跡已陳。女尼那復記前因。當年綠鬢看纔剃。豎拂今爲首座人。余昔攜家遊湖寓蓮池女菴。

葛嶺南園一代狂。欲尋遺跡已滄桑。賈堂蟋蟀韓莊犬。留與遊人話夕陽。

老去詩人兩鬢秋。祇憑才筆占風流。若非紅粉名心在。誰肯樽前伴白頭。

天水空明笛一枝。斷橋人靜月斜時。湖樓多少憑欄女。明日家家說項斯。吾鄉三項生善歌。來寓湖上。每夕在斷橋亭奏伎。傾一時。

花開緩緩到餘杭。正遇清齋學太常。今夜河魁須禁忌。可憐天壤此王郎。夢樓茹素奉佛。其夫來遊湖與談禪而別。

手翻樂府教梨園。可是填詞老稼軒。唱到曲中腸斷句。眼波偷看客銷魂。夢樓在杭製新曲教梨園。

但一聞聲記不訛。琵琶盲女賽橫波。老夫亦以耳爲目。認作西天阿律多。盲女王三姑。知詩文。當衆客沓至。一接談。輒記其人。酬應不爽。

曾記從軍入百蠻。每從馬上看煙巒。而今髀裏全生肉。重爲湖山一據鞍。是日借馬遊虎跑。理安諸勝。

寓齋老桂四株余到日正放花喜作

四株丹粟倚簷栽。百斛濃香滿屋來。最是今年時令正。中秋節候恰花開。

不信名香解作媒。惹他鄰女上牆隈。老夫也自忘衰醜。只道窺牆爲玉來。鄰女多梯牆折花。故戲云爾。

幽芬似與伴衰遲。來是開時去謝時。天遣清緣托叢桂。小山不住更何之。

閱史戲作

閒翻青史坐涼宵。頃刻興衰閱幾朝。寸燭未殘千載過。先生笑比爛柯樵。

舟行絕句

一身充兩役。誰道吳娘癡。襁兒背上臥。搖櫓兼搖兒。

吳航與楚艦。本不共鄉程。同泊偶交語。便有鄉鄰情。

閒居無事取子才心餘述菴晴沙白華玉函璞函諸君詩手自評閱輒成四首



千里懷人白露時。一編冰雪慰相思。蕭齋日與諸君見。可惜諸君不得知。  
新知舊識總吟朋。老眼臨文肯世情。心賞不關交厚薄。此中我自最分明。  
姊妹新粧共倚欄。孰宜施粉孰宜丹。背人卻向菱花照。還把看人眼自看。  
流年輕擲等閒過。老去空悲兩鬢皤。貧始燒丹病求艾。此生何事不蹉跎。

數月內頻送南雷述菴淑齋諸人赴京補官戲作

柳條折盡送人行。都謁承明上玉京。老寡頻看鄰女嫁。白頭重憶舊風情。  
袍笏登場也等閒。惹他動色到柴關。妻兒翻不如猿鶴。啼怨山人不出山。  
同學都看入宦途。誰從林下譜康衢。野夫歌咏昇平處。或亦清時不可無。

觀劇卽事

逢場竿木逐兒嬉。顧影郎當祇自知。博得黃金買歌舞。可憐已過少年時。  
明識悲歡是戲場。不堪唱到可憐傷。假啼翻爲流真淚。人笑癡翁太熱腸。

貞女芮泰姑詩

當塗人未嫁而夫楊之嘉死。矢節爲其夫養親立孤。

白頭猶是女兒身。辛苦持開幾十春。絕似子中通籍後。不會食祿作忠臣。

那得閒依繡佛燈。課嚴菽乳日三升。市兒買得都稱歎。片片懷清寡女冰。  
以磨豆腐爲生。

送春

踏盡苔痕履齒泥。銷魂今日畫欄西。落花何與黃鶯事。也爲春歸不往啼。

舟行

一枝柔艣泛波空。牽曳詩魂入夢中。笑比搖籃引兒睡。老夫奇訣得還童。江村人臥小兒於竹籃。搖之使眠。謂之搖籃。

吳門雜詩

握手依然舊雨親。十年京國對牀人。雲泥不但公忘分。我亦忘呼老大臣。畢秋帆開府奉諱歸里。相見道故。

形容老盡舊交游。獨有先生鬢不秋。白髮誰言最公道。逡巡也避貴人頭。鬢無一莖白者。

幽棲風味愛清歡。頗笑胭脂畫牡丹。到得東山絲竹地。始知平日秀才寒。酒船中有金郁二女郎。侍客。船尾張小妹者。舊亦以色藝稱。今

矣。

占得風流向客誇。賈胡留滯漫思家。前身原是莊周蝶。莫怪三生慣宿花。莊似蝶。連日有煙花之會。

尋常一樣野花嬌。纔到山塘價便高。我昨三家邨畔過。可憐艷煞一枝桃。

納涼

矮机無籐坐月陰。桔槔聲寂夜沉沉。西瓜大字芝麻鑑。閒聽邨翁說古今。  
坐久空濛露濕衣。風來暗帶稻香肥。流螢不自量微照。偏向星多處亂飛。  
夜深歸去就橫陳。一語應添笑柄新。我比齊人有妻妾。專房偏寵竹夫人。

中庭坐月

移得紗幮小院旁。中安一榻臥乘涼。惹他四面蚊忙煞。眼看冰肌不得嘗。  
甕天窺處得雄談。仰看穹霄正蔚藍。十丈空庭圍不住。銀河流出粉牆南。

# 甌北詩鈔絕句二

所見

後船無數向前過，忽喚開帆也打鑼。連夜縱添雙槳趕，可憐他已渡黃河。

漁翁

網得修鱗佐晚炊，小舟如葉夜歸遲。一天明月秋江上，可惜漁翁不作詩。

寓齋聞歌

比鄰歌管出樓臺，此老蕭齋獨引杯。明月不嫌茅屋陋，夜深一樣上窗來。

小園

小園不設繚垣遮，麀眼籬編六枳斜。一樹桂花風過處，聽他香到別人家。

朔風

江天連日朔風高，催贖先生敝緼袍。一笑化機誰識得，樹方落葉鳥添毛。

蕭齋

蕭齋雨過淨無塵，睡起憑欄曉色新。分得綠陰牆外柳，一家樹作兩家春。

驢嘲

凌兢瘦影踏黃塵。日向長途受雇緝。憐汝往來風雪裏。不曾馱着一詩人。

送客歸戲書

卸卻漁簑一整冠。送人謁選上長安。惹他僮僕私相笑。既愛山林又愛官。

授衣

九月霜清木葉飛。例修敝褐禦寒威。笑他兒女隨年長。遞換兄衣作弟衣。

莊樂閒崔曼亭兩同年皆工詩莊夫人董蘭谷崔夫人錢浣青亦皆工詩兩家又同居一宅閨閣韻

事近代罕有欽羨之餘奉贈

何處香閨鬪擘箋。迎春橋北地幽偏。依稀采藥天台路。劉阮雙棲一洞天。

旗鼓詞場各策勳。郡城近日詩社最盛。正愁應敵力難分。如何惡少雕青外。又遇一班娘子軍。

夜坐

人語夜深寂。霜威侵敝袍。梅花映明月。共我作三高。

讀史

一刹那間便一生。何須恩怨苦分明。老來自笑猶閒氣。動爲前人抱不平。

過城東小桃園

重過桃園跡已陳。花塍依舊錯如鱗。傷心紅雨亭邊路。只見桃花不見人。

眞州歸途作

盡日無人古路斜。空濛細雨落如沙。一旗飄出青林外。知有前村賣酒家。

家約

老去惟耽懶味長。自頽家約戒廚娘。何能爲汝蠶鹽事。費我吟詩錦繡腸。

齒痛

嚼鐵生平礪齒齧。無端對食輒含顰。遇剛必吐柔方茹。累我翻成勢利人。

山塘

老入歡場感易增。烟花猶記昔游曾。酒樓舊日紅粧女。已似禪家退院僧。  
半塘橋北好陰涼。殘醉扶來蕩畫航。臨水數家門半掩。更無人處有垂楊。  
一夕新歡曉已陳。黃金散後更誰親。定情羅帕還留看。多少人間抱柱人。  
普惠祠基築短牆。五人墓木獨蒼蒼。山塘滿路皆脂粉。可少秋風俠骨香。

論詩

滿眼生機轉化鈞。天工人巧日爭新。預支五百年新意。到了千年又覺陳。  
李杜詩篇萬口傳。至今已覺不新鮮。江山代有才人出。各領風騷數百年。  
隻眼須憑自主張。紛紛藝苑漫雌黃。矮人看戲何曾見。都是隨人說短長。  
少時學語苦難圓。只道工夫半未全。到老始知非力取。三分人事七分天。  
詩解窮人我未空。想因詩尙不會工。熊魚自笑貪心甚。既要工詩又怕窮。

紅梅

品高初不逐繁華。何事新粧鬪絳霞。莫是也貪流俗賞。漸思改節學桃花。

清明後一日松坪前輩招同西巖涵齋棕亭湖舫雅集

多煩折簡到潛夫。出郭尋春興不孤。千樹桃花萬楊柳。揚州城外小西湖。  
一樣風光二月春。林亭點染倍鮮新。畫家小李將軍派。金碧山川粉黛人。  
香雪飄殘萼綠華。平山堂有梅千株。號小香雪。旁人笑我願空賒。風流詞客非高士。不看梅花看杏花。  
紅橋修楔客題詩。二十年前。盧雅雨爲運使時事。傳是揚州極盛時。勝會不常今視昔。我曹應又有人思。  
花魂欲睡隱蒼烟。重結清游異日緣。風露峭涼人半醉。滿湖燈火夜歸船。

湖上二首

山光澹沱水縈紆。幾日蕪痕綠滿途。隄上香車隄下舫。清明一幅上河圖。  
連日狂飈捲地來。孟婆作意把花摧。可憐桃李貪人看。不爲風多遂不開。

### 食香椿有感

新故相乘共喜新。自因生意在青春。可憐一樣庭前樹。嫩是香椿老臭椿。

### 鱒魚初出松坪前輩卽購以見貽賦謝二首

銀鱗尺半壓荒廚。纔是江鮮入市初。一尾千錢作豪舉。先生今日宴頭魚。  
菜根久礪齒牙牢。珍味無端誘老饕。不肯累人窮閔貢。爲君一旦破清高。

### 松坪於齋頭遍插芍藥招同涵齋棕亭再可雅集卽事

相期不負景清和。又許看花發醉歌。前日鱒魚今芍藥。老來食色累公多。  
尋花我昨步當車。君乃移花插滿家。始識名流太驕貴。要花尋我不尋花。

### 夜醒得句

露氣涵虛庭。羅幃早涼到。三更月太明。滿園鵲盡噪。

### 觀舞燈

滿野流移似凍蠅。華堂猶列炬千層。臨觴敢謂非豪舉。如此荒年看舞燈。



米貴

米貴如珠豈易量。午炊往往到斜陽。老夫近得休糧法。咀嚼新詩誑餓腸。

兒戲

兒女青紅又一時。拔河拋壻儘游嬉。老夫不忍輕訶叱。教誦淵明責子詩。

江邊鷗鷺

覓食終朝傍水湄。晚來戢羽靜無爲。始知鷗鷺閒眠處。也在謀生旣飽時。飲啄呼羣不亂行。空波容與太清狂。扁舟偶過忽飛起。我已忘機他未忘。

一蚊

六尺匡牀障皂羅。偶留微罅失譏訶。一蚊便攪人終夕。宵小原來不在多。

劉霞裳秀才美姿容。工詩嘗偕子才爲名山之遊。今又同舟來謁喜。而有贈并調子才。

緒柳風流見後身。雅吟況復擅清新。世間真有無雙品。才子原來是美人。白頭人共泛清波。忽覺沿隄屬目多。此老不知看衛玠。自誇看殺一東坡。最羨師生共一航。曉窗聯句夜傳觴。禪門亦有旁叅法。我欲勾他叛呂防。

買燈十二挂。皆舊家物也。書示兒輩。

十二明燈爛似霞。買來光炫膽瓶花。豪家下等莊嚴物。移到貧家便太華。

想見華堂照酒樽。無端來伴我黃昏。須知是物關興替。最後登門早出門。家居買燈。最為不急之務。及稍貧。則此物先賣矣。

### 秋燕

落木風高葉漸稀。人家刀尺促寒衣。生憎燕子炎涼甚。春便飛來秋便歸。

### 卜居

卜居未久白雲溪。坊曲平時過從稀。怪底鄰家肯賒酒。先生將有束脩歸。

### 閩游途中雜詩

隔歲無端動遠思。此行亦似有前期。可應天欠詩人債。遊武夷山喫荔枝。  
遙憶山茶曲檻前。此時繁葉放紅嫣。正開花候身偏出。天爲先生省酒錢。  
百尺荒祠俯綠洄。客星遺跡尙崔嵬。出山恐被嚴陵笑。連夜催船過釣臺。

### 自泉州至漳州道中作

閩遊未訪武夷君。先踏泉南瘴海雲。添得生平蛇一足。白頭出作老參軍。  
曾讀冬郎豔體詩。飄零遺跡最堪思。夕陽荒草南安路。何處空山訪墓碑。韓偓流寓南安有墓。  
不信澆田仗井泉。汲竿懸斗似秋千。一田一井禾都灌。此是閩南古井田。

高髻雙盤結束新。擬將百琲買橫陳。只愁枕上無重譯。夜半誰來作舌人。  
候館殘燈送馬蹄。一弦海月出猶低。十年高臥山中客。重聽荒郵半夜雞。  
廿里郵籤一歇鞍。綠瓜丹荔已盈盤。莫嫌喝道遊山俗。畢竟遊山也仗官。

詠古

繙遍瑤臺綠字函。五銖衣換茜羅衫。杜蘭香本仙家女。一點春心便謫凡。  
滌器空羈作賦才。凌雲一薦入蓬萊。遭逢莫怪臨邛幸。犬子原須狗監推。  
英聲軼里互千春。只解酬恩不擇人。何物韓巖甘爲死。可憐輕擲不貲身。  
閒翻青史幾悲涼。功罪千秋少尺量。讀到曲端呼鐵象。恨他何不死沙場。

閒咏史事六首

運石飛磚造塔忙。馮熙計慮亦深長。塔成但見高千尺。誰見人牛死道旁。  
灸手權門百賄填。古人眼孔究堪憐。區區黃雀青魚鮓。屋棟雖充值幾錢。  
北府曾傳孝傑誇。官登台輔要豪華。庫無百萬黃金錠。那足稱爲宰相家。  
身在璇霄秉獨裁。何難金塢積成堆。江陵至竟稱賢相。只愛持權不愛財。  
拗項橋瞻最上層。力求宦達果飛騰。官高無奈身如舊。日食依然只半升。

老禪淨眼看花紅。已付飄香一陣風。畢竟瀉師原失計。骨人那住肉山中。  
裙帶魚臭如醃鯨。我洲百門乃酷嗜。詩以調之。

臭味輻輳不可親。嗜痂偏作席閒珍。爲魚也要佳名字。裙帶纔呼便動人。

桃花

清明雨過淨無塵。欸段遊山始見春。多謝桃花開滿洞。劉郎已是白頭人。

閩言

滿耳啾啾不辨何。近來漸解說僂羅。始知公治非神也。只爲聽他鳥語多。

北歸

屢改歸期始定期。郵亭露布正班師。千軍萬馬紛馳處。一個閒人訪武夷。

仙蛻巖

仙人游戲大羅天。何事空餘一蛻蟬。若使成仙只如此。老夫也不慕喬佺。  
聞說登真不在形。可憐世眼自難醒。不知尸解遊何處。猶向枯骸跪乞靈。

煉丹臺

藥爐已廢冷無烟。傳是丹成此上天。煉汞燒鉛吾不耐。英雄撒手卽神仙。

至福州有一僕來見自道姓名乃余昔在京師未第時童奴張忠也蒼顏白髮幾不可識撫今追昔感嘆久之

三十年前青翰舟相逢欲認屢凝眸。看他綠鬢今斑白。不唱何戡也淚流。  
穎士奴曾解愛才。相從正值困蒿萊。傷心夜伴孤燈讀。冷盡熏爐一寸灰。

題淑齋官署

粉署含香地望華。天教作吏亦清嘉。全家碧水丹山裏。好个神仙太守衙。  
奏凱師還滿驛亭。獨因僻左少來經。四禪地可迴兵劫。不枉山城號福甯。

江行

倚舷坐愛晚風披。正是科頭覓句時。兩岸空青一江綠。不妨潮阻去帆遲。

西湖雜詩

又向西湖泛綠漪。湖光如舊客衰遲。可應皺面波斯匿。重過恆河照影時。  
白蘇都向此留題。二老才名本自齊。不作爭墩互傾軋。兩人各占一條隄。  
一坏總爲斷腸留。芳草年年碧似油。蘇小墳連岳王墓。英雄兒女各千秋。  
名士常憑勝地傳。如何勝地轉攀緣。歐公宦跡何曾到。勺水偏標六一泉。

冤獄風波已被誅。空餘鑄鐵跪泥塗。不知地下權奸骨。果識人間唾罵無。  
湖山原要錦成堆。一味孤清也可哀。想見平章燈火出。道旁寒殺老逋梅。

重遇盲女王三姑賦贈

十年前聽撥琵琶。曾惜明眸翳月華。今夕紅燈再相對。老夫亦已霧看花。  
無目從何識字成。偏能演曲寫風情。可應手摸知書慣。此瞽真當字伯明。  
徐娘雖老尚情長。慚愧蕭郎鬢已霜。對面欺他看不見。白頭聊作少年狂。  
人間用短轉能奇。水母曾傳借目窺。爲汝作蝦吾亦肯。便隨流蕩不相離。

卽事

偶得詩一句。健忘忽失卻。翻去問傍人。增地一笑噱。

吳江道中卽景

荒村遠城市。不知羅綺鮮。村女簪紅花。顧影亦自妍。

夜坐

拋卻橫腰帶萬釘。歸來仍伴一燈青。夜深河漢星千萬。何處尋他處士星。

相逢

相逢猶作少年行。西抹東塗已不成。老去佳人思昔面。怕聽人喚阿婆聲。  
映坐標姿玉不如。烏衣裙履氣軒渠。鄙人老不知時務。只道郎君總讀書。

野步

峭寒催換木棉裘。倚杖郊原作近游。最是秋風管閒事。紅他楓葉白人頭。

桃花

正是桃花滿洞開。春遊偶誤入天台。仙家也自貪年少。笑我何爲老始來。

賣文

賣文錢稍入慳囊。欲破休糧祕密方。揚子江中水雖淺。舀他一勺亦何妨。

郊外見殘菊

黃葉江村木盡凋。尙餘冷豔耐商飈。有情都作春花去。誰與秋容綴寂寥。

子才到揚州預索輓詩戲和其韻意有未盡又增二首

蓮露如何可預支。渡江來似別交知。得詩恐爾真歸去。不覺低徊下筆遲。  
年壽何人不祝延。怪君撒手獨超然。可應舊籍樵陽在。謫限完時又作仙。  
君果飄然去返眞。讓儂無佛易稱尊。只愁老境誰同調。獨立蒼茫也斷魂。

生平花月最相關。此去應將結習刪。若遇麻姑休背癢。恐教又罰到人間。修短終須聽太空。莫將殘錦散諸公。還防老學菴燈火。絆住山陰陸放翁。

### 廬山雜詩

二十年前過九江。未曾廬阜躡飛涼。那知未了清緣在。垂老來償履一雙。小橋流水路橫斜。野草茸茸滿路花。盡日山行無斥堠。有田疇處有人家。榆柳陰森綠滿途。秧歌聲裏鶉鳩呼。牛宮豕棚俱污濁。一入山家總畫圖。一重一掩隔紅塵。深入方知景色新。山外何由見真面。東坡調語究欺人。匡廬擅勝瀑流多。百丈飛泉注急坡。卻怪古人眼孔小。一衣帶水詫銀河。崖壁鐫詩費斧椎。欲憑貞石姓名垂。誰知雨打風摧久。也作模糊沒字碑。流出山來便不還。何妨小住保清潺。可憐三峽橋邊水。日夜喧囂要出山。留帶山門結淨緣。樓賢寺有石刻。宋大中丞留帶處。佛家終仗布施錢。綿津去後無人管。三兩殘僧自種田。

子才舊遇相士胡炳文。決其六十三生子。七十六考終。後果如期。得子一驗。宜無不驗矣。去歲七十。六遂飾巾待期者一年。并預索同人挽詩及歲除。竟不死。乃又作除夕告存詩。遍遺親友。爰戲贈

### 八絕句



料理行裝一載忙。飾巾仍不到樵陽。五更待漏天還早。再吃朝房厚朴湯。  
添丁果驗洗兒絀。預索灰釘乃不行。術者莫非司馬懿。不能料平死只料生。

眊筆閻羅未及勾。遂教天網漏吞舟。笑他袍笏風流宰。換作人間夜不收。  
割肉偷桃狡獪才。九閩都怕此人來。故應天亦難安頓。纔召巫陽又赦回。  
開口吳兒有是非。戴逵求死反招譏。此翁名士非高士。本不將身繫少微。  
年是新年人是陳。過年只算再來人。便將來世連今世。省得輪迴又換身。  
難星須滿一年期。未飲屠酥尙抱疑。想見呂嵒爐底伏。幾番恐殺打雷時。  
莫怪輕災解縛纏。前身原是點蒼仙。君自言前身點蒼山老猿仙人一劫能逃過。又可嬉遊五百年。

春農寓齋窗外忽生新竹一枝賦詩自誇戲贈

與可千尋已覺長。笑君譽竹更無雙。揚州寓舍新篁茁。道自家園透過江。君詩疑是故園亭子外一枝冒雨渡春江。

月明鸞尾影娑娑。掩映文窻隔皂羅。莫是惠州都監女。夜寒偷看老東坡。  
孤竹君曾傳二子。勸君添个鳳池毛。白頭笑倚欄杆說。階下龍孫爾許何。君孫已選拔明經。

幽棲借得好林巒。天與蒼筠伴歲寒。便抵挂單童子寺。一枝日日報平安。

松坪七旬稱慶余。已有詩奉賀嗣君次生。又索屏風詞爰補前詩所未及。

已打長句侑瓊卮。又索屏風介壽詞。恰似海籌多益善。祝公添歲我添詩。  
早登仕籍早歸田。不用持籌但使錢。詩酒笙歌娛到老。始知世有地行仙。  
烟花夢久斷塵根。禪榻旁無翠黛痕。早喜析薪能負荷。不須多子但多孫。  
館閣常疏步履塵。轉於林下得相親。十年邗水過從久。我亦隨公作老人。

題岫雲女史雙清閣詩本

沈既堂先生女

詞垣宿素沈東陽。家學流芬奕葉長。不獨敬倫能似父。掃眉嬌女亦文章。  
隔紗未試解圍兵。展卷偏教見性情。絕似李蕃牆外聽。一枝玉笛最分明。  
憶堵思親點筆遲。蘭荃香入墨痕滋。始知閨閣真風雅。不在香奩艷體詩。  
略識之無便目存。生平未上學堂門。由來慧業關天授。待有人教已鈍根。  
繡閣才名錢孟鈿。吾鄉錢文敏公女孟鈿最工詩。何當旗鼓對鳴甄。玉臺他日編新咏。江北江南兩女仙。

京口晤夢樓聽其雛姬度曲卽事

廿載清齋禮佛香。翻將禪悅寄紅粧。始知十六天魔舞。別是僧家一道場。  
手剔銀釭晝燭明。愛留客坐聽新聲。人間何限霓裳曲。出自家姬覺有情。  
燄段新翻指點勞。要令姿致極妖嬈。自家忘卻便便腹。只管呼他學柳腰。

恐將寒儉惹人嫌。特與新裁綺縠織。蓮步出堂嬌顧影。傲他率地夏侯簾。  
笑我家貧赤腳多。那能百琲買青娥。鄭康成婢香山嫗。只解吟詩不解歌。  
城輪懽人曲未終。令嚴帥府鼓琴琴。出城笑這將軍俗。不及羊羔老党公。

遊金陵雜詩

十幅蒲帆兩草鞋。借名送考到秦淮。老夫別有西來意。半爲栖霞半簡齋。

蹇衛牽來狗不如。跨鞍難穩且呼車。生平跋馬千山遍。老去翻愁一秃驢。

人筆雙高不可攀。雲烟供養掩禪關。京華四十年前友。頭白相逢在攝山。

逆風船似挽強弓。篙纜爭途夾港中。忽漫開帆天解鬪。此船不占彼船風。

興亡局似去來潮。南部烟花尚未消。丁字簾前一條水。河房燈火見前朝。

名紙填門奉玷壇。隨園豪舉欲留餐。靈山五百阿羅漢。一個觀音請客難。

燕子磯頭落日懸。支筇重到廿餘年。阻風中酒曾遊地。垂老經過倍惘然。

揚帆百里不多時。諺語江湖可入詩。只有快船無快馬。

舟人語詩家無此句新奇。

真州蕭娘製糕餅最有名人呼爲蕭美人點心子才以餽奇中丞中丞寵之以詩一時傳爲佳話余

亦作六絕句

欲騎驢遊栖霞老不  
能跨鞍仍呼筇與  
老友張玉川精繪事  
久寓栖霞是日同遊  
遊栖霞之次  
日順風出江

子才招飲余以  
其客多故不赴

余昔自黔歸守風  
燕子磯凡九日

帶得脂香價便高。一奩粉餌入風騷。美人手段才人筆。補出劉郎九日糕。  
織織素手擅拈針。改製餛飩味自深。這箇麻姑好指爪。不搔人背點人心。  
已是徐娘半老時。年已五十餘。芳名猶重美人貽。不知年少當爐日。幾許游人妬餅師。

一枝成家動貴游。遂憑食譜姓名留。蘇東坡肉眉公餅。此女公然另出頭。  
饋節聊同獻曝情。竟邀椽筆賜褒榮。始知大雅羅材廣。錄到人間畫餅名。  
麩車涎早溢殘牙。曲盞何當送我家。爲語故人應捧腹。老饕饞口嚼梅花。

### 編詩

舊稿叢殘手自編。千金敝帚護持堅。可憐賣到街頭去。盡日無人出一錢。

### 苦雨

竟月淋浪雨腳斜。麥苗萎盡泣農家。可憐兒女多情甚。一樣傷心只惜花。

### 所見

白玉盆中發寶光。洞天清供好排當。明珠妝出細梅瓣。無價奇花惜不香。

### 女史鮑尊古賜題拙集推許過當走筆奉謝

下語評量費綵毫。恰如鳥爪癢邊搔。從教萬口流傳遍。那及茗華一字褒。

若遇隨園拾唾珠。定應誇作女高徒。子才輯詩話多採聞秀詩輒稱女弟子老夫不敢衙官屈。稽首仙臺拜鮑姑。

安樂窩中有賞音。家門風雅宿緣深。遙知問寢重闈罷。閒和堯夫擊壤吟。邵松阿孫媳

莫怪香閨解擘箋。清才多聚一門偏。劉三娘子詩情麗。家學原從孝綽傳。令兄景略本才士

不寐

老去無眠夜景清。聊營腹稿待天明。小鬟曉夢聞呼起。知有新詩枕上成。

再題焦山寺贈巨超練塘兩詩僧

滑笏江流去不扃。海風吹出一螺青。十年來往空相望。今日纔尋瘞鶴銘。

修篁密樹綠陰連。不着樓臺得自然。對面金山太寒乞。傲人生活勝焦先。

對他浮玉覺寥蕭。狐貉旁偏立緼袍。齊已詩篇懷素字。兩僧共占一山高。巨超詩最工練塘兼能書

伊蒲留客飫香廚。蔬筍登盤味有餘。我本才非蘇玉局。敢噴佛印不燒豬。守中留飯

叅遍華嚴五十三。老思彌勒結同龕。一庵似怕人來借。先自名呼作借庵。巨超又字借庵

山行

路尋樵徑躡槎枒。山色蒼深夕照斜。一樹紅楓全是葉。翻疑無葉滿身花。

論詩

着色原資妙選材。也須結構匠心裁。可憐絕豔芙蓉粉。塗在無鹽臉上來。

野蕨

菜根風味出江村。恰稱田家老瓦盆。辣玉甜冰常饌足。不知世有乳蒸豚。楊誠齋以蘆菔爲辣玉。蔓菁爲甜冰。

圍爐

頭腦冬烘一腐儒。怕他冰雪冷侵膚。平生性不因人熱。老反趨炎附火爐。

揚州觀劇

又入揚州夢一場。紅燈綠酒奏霓裳。經年不聽游仙曲。重爲雲英一斷腸。回數歡場歲幾更。梨園今昔也關情。秋娘老去容顏減。猶仗聲名壓後生。故事何須出史編。無稽小說易喧聞。武松打虎崑崙犬。直與關張一樣傳。今古茫茫貉一邱。恩讐事已隔千秋。不知於我干何事。聽到傷心也淚流。

題竹初爲袁趙兩家息詞後

余戲述子才游蕩之跡。作呈詞。控於巴拙。存太守。子才亦有訴詞。太守不能斷。竹初以息詞了此案。

一重公案起無因。太守筵前訟牒陳。不設青紗圍自解。累君來作謝夫人。各挾雌黃訴到官。閻羅包老也顛顛。竹蕉兩造皆情熟。欲判輸贏下筆難。譚語褒訕總白癡。客嘲賓戲戰交綏。兩家旗鼓今無用。同看營門射戟枝。

一燈

出身早脫子衿青。堪笑丹鉛尚不停。頭白一燈孤館裏。廿三部史十三經。四庫館新頒舊五代史。遂成廿三史。

天河

誰把虛空界畫粗。生將別恨坐黃姑。青天爲紙山爲筆。倒寫長江萬里圖。

朔風甚急萬鴉集於枯木。皆向風而立。無一錯互者。乃知其向風則羽毛轉順也。向聞魚亦多逆水。

而游同是一理

寒鴉枯木景蕭騷。觸目都增見地高。鳥立向風魚逆水。物生各自愛鱗毛。

觀音閣碑

堪笑籌車致祝情。望奢那計一蹄輕。百金捐造觀音閣。便欲碑刊萬古名。

宦囊

解纜歸來卜築忙。老夫曾此賀華堂。看他營造有他賣。何事人猶羨宦囊。

松坪招同葉生柏秀才高詠樓看荷花五首

老去心情愛物華。肯同新婦閉帷車。蹣跚行腳麻茶眼。同向湖隄去看花。少日踈狂作冶遊。那堪還占老風流。惹他十里珠簾捲。多少紅妝笑白頭。

延緣一掉過紅橋。早有荷香陣陣飄。解事扁郎不煩囑。但花多處使停撈。

余已過揚州。惟平山堂及法海寺。餘皆斷溝古墓而已。今湖

山樓閣。則皆庚午後開闢構造者也。

高詠樓前飲碧筩。凭欄千朵絢晴空。蓮花本是君家面。還與先生發醉紅。

### 答蔣蔣州秀才

歷數名場幾作家。後生中有此才華。白頭老嫗看新婦。恨不親爲插髻花。

### 贈當筵索詩者

盈盈十五出堂時。妙轉歌喉勸客卮。也是人間生活計。老夫和淚寫胭脂。

### 入冬日飲牛乳一升以代朝粥戲成絕句

曾傳薯粥養衰翁。服食還輸乳汁功。白髮人爲黃口哺。老夫奇訣已還童。  
清晨飲我乳花香。省得張蒼子婦忙。笑問嬾婆何姓氏。遙遙華胄出奇章。  
訛寢蕭閒顧影驕。愧無錦薦護寒宵。柵欄爲築新牢就。也算莊嚴貯阿嬌。  
服匿盛來日一甌。瓊漿滿引潤枯喉。卽看下咽如脂滑。不用周官更祝鳩。  
縱無燥濕効微勤。乳哺功深自策勳。合請戴高爲寫照。丹青貌出野王君。



久食功堪奏養和。煮羶氣亦染身多。老饕自愛醍醐味。任把臊胡喚達磨。昔人曾飽穀於菟。何似芻牢給所需。老健定堪牛鬪虎。看余矍鑠執爰驅。書生貧易德壺殮。飲酪先誇至味存。何限世間豪貴客。還將人乳去蒸豚。

自笑

一甌著粥涕沾鬢。背曝晴簷手擁爐。試問古來麟閣上。畫圖可有此形模。

芸浦中丞邀我鄧尉看梅夢樓芷堂先在蘇相待遂同游連日并偕蔣于野秀才

廿年此願今纔果。爲有佳招發興新。行樂也憑賢地主。腐儒何事不因人。

燈節前頭雪壓枝。梅花今歲較開遲。花神大似留相待。二月初來正及時。

點役簽夫曉鼓催。幾同喝道看山來。惹他村嫗從旁笑。不是官梅是野梅。

老幹空山格自高。難將勢位屈孤標。我來只帶諸名士。壓得梅花不敢驕。

漫將孤寂結相知。豈識瑤林四照奇。笑煞老逋真見小。賞心只在兩三枝。

想見名卿氣力雄。要留爪跡雪泥鴻。黃金買得春山闊。死葬梅花萬樹中。

山有徐健菴墓

料理舟車縱客歡。官齋獨對一燈寒。中丞枉作梅花主。只讓人看不自看。

中丞以事不得同遊

忍爲清游攬景光。累人連日費供張。一帆歸向山塘過。自買名花種草堂。

虎邱買牡丹四盆海棠一株

戲題靈巖山館畢秋帆制

靈巖千古屬西施。亭館何人鑿翠爲。要與美人爭勝蹟。秋帆此處是男兒。

手種梅花已丈餘。相需般每遇偏疏。園林閒煞公忙煞。曳足壺頭正羽書。湖南征苗公督辦軍需

愛山我乏買山貲。公有青山只夢思。何不把山來贈我。省他猿鶴盼歸期。

閱近人詩稿戲題

名士求名氣力殫。到頭不出百年間。那知世有神通大。臥作長河立作山。

題女史駱佩香聽秋軒詩集

冰雪新詩絕點塵。女中有此謫仙人。故應數遍樵陽籍。只替常儀作後身。集中女遊仙詩第一首云不是姮娥拚獨處何人領袖廣寒天

蓋以自况也

解圍何必幃青紗。對客揮毫筆有花。如此才情如此韻。教他那得閉帷車。

倘著冠巾試萬言。也應第一領詞垣。如何不學黃崇嘏。去作人間女狀元。

禮佛香清手自拈。禪心已證首楞嚴。教人癢煞鮎紋背。不敢思他鳥爪尖。

此豈宜居弟子行。詩翁漫詡在門牆。上元燈下千詞客。方待昭容玉尺量。簡齋夢樓皆誇爲女弟子

高旻寺鑑公房夜看牡丹戲書

一枝濃艷倚禪房。銀燭高燒照滿廊。我欲嚇他禪定破。老僧深夜對紅粧。  
揚州買芍藥。攜歸而齋前寶珠山茶已開過矣。

已向山塘買牡丹。又攜紅藥到雕欄。惹他千瓣山茶妬。家有名花不愛看。  
子才以雙湖太守禁妓作詩解之戲題其後

登車紅袖滿啼痕。詩老爲招已斷魂。十四樓高功保障。平康護法好沙門。  
八十衰翁已白紛。惜花心在老逾殷。哥舒半段槍無敵。專救人間娘子軍。  
南部烟花手護持。君房下筆妙言詞。女閭援到齊桓例。莫是貪他夜合資。  
巧爲蛾眉作主張。一言感煞衆紅粧。知君九十開筵日。定有湘蘭百妓觴。  
多少妖姬又治容。家家虔炷辦香濃。青樓占得長生位。也抵先儒祀瞽宗。  
雨不止

客窗聽雨夜如年。簷溜丁東斷復連。絕似小兒啼不住。終宵攪得老夫眠。  
方罨田塍漲白波。甘霖翻恐沒新禾。曾經乙巳年荒旱。不敢嫌他雨過多。

野泊

扁舟晚泊傍村家。露草浮光月未斜。螢作火城蛙鼓吹。野夫何處不榮華。

題沈既堂前輩載書移居圖

買宅何須百萬奢。爲貪隙地好栽花。移居大似村夫子。滿載圖書載棘車。  
檢校資儲一番忙。犬雞都點入行裝。押綱不用鐵羅漢。家具無多只縹緲。  
牙籤整妮上行轉。卷帙真看欲汗牛。比似米家書畫舫。陸行水泛兩風流。  
奏賦蓬萊舊壇名。宦成那復作書生。祇應結習難忘處。老戀青燈倍有情。  
入詠樓新葺綺寮。又排書帙遣良宵。只愁撐滿便便腹。難作東陽瘦沈腰。

哭偉兒

二十年無一哭聲。此生應免起哀情。誰知時命無終泰。臨老西河欲喪明。  
未必興家且保家。少年早自戒豪奢。烏衣門巷牛衣志。不闕人間金犢車。

猶記生時有吉徵。異香滿室兆榮名。兒生於鎮安官舍。時異香滿室。誰知兆也無憑準。只得頭銜廩膳生。

拮据參苓恐不供。但愁病劇敢愁窮。一年心力枯何補。囊到空時命亦終。

身病堪醫心病難。生來心性慣憂煎。可憐半月前孤枕。將要長眠轉不眠。臨歿前半月。通夕不眠。

就醫吳苑半年淹。勢急歸舟夏正炎。氣力自知支不得。時時問過幾郵籤。吳門就醫半年。到家僅六時。即屬續。

時到彌留倍可傷。不呼妻子只爹娘。五更續息微將絕。忍死催移到我床。到家臥其房不安。速呼移就余床而歿。

痛定追思痛更深。自知不起病加沉。恐傷乃父心難割。淚欲流時輒掩衾。  
兩孫卯角尙兒嬉。他未知悲我更離。七十衰翁頭白盡。豈能撫到長成時。  
彷彿幽魂尙式憑。微風入戶閃孤燈。定知汝不離吾側。只是千迴喚不應。  
入棺猶是舊容姿。從此真無再見期。一語九原聊寄慰。我來應亦不多時。

夢中

月影橫窗夜向闌。峭涼新入覺衾單。夢中新鬼逢多少。偏是亡兒一面難。

年來孫補山畢秋帆兩制府阿雲巖相公相繼下世林下則顧晴沙袁子才王西莊又物故生平交  
舊一時俱盡淒然感懷

老來不復作詩新。偶作詩惟哭故人。哭盡故人無可哭。孑然顧影自傷神。  
武緯文經將相功。儒林文苑亦宗工。此皆數十年成就。何意淪亡一歲中。  
至蘇州寓懷杜閣後樓卽事

偶指名賢故跡湮。祠成館我亦前因。敢援彌勒同龕例。縛帶聊爲灑掃人。  
斟酌橋通畫舫游。都來塘北泛明流。冶坊浜裏將寥落。漸少人登舊酒樓。  
垂老光陰夕照斜。風懷聊復逐鉛華。惹他年少竊相笑。如此白頭來看花。

名園樓閣表前賢。點綴溪山物色妍。自是承平好光景。頗聞秦蜀正烽烟。

去歲偉兒就醫寓舍在伍相國祠東今來過此泫然有作

往事追思灑淚紅。半年醫藥竟無功。監輿重過靈胥廟。忍聽人呼伍相公。兒行五。家人呼爲五相公。

題短簿祠

短簿祠高虎阜東。故居人指梵王宮。誰知捨宅歸僧寺。翻占名山地百弓。

三月十日寓齋前牡丹纔試一花次日半開者數朵十二日曉村太守讌東浦藩伯湛露廉使柳亭

觀察於此則百朵競放矣以後士女遊觀連日雜沓雜記以詩

聞道旌麾過使車。牡丹連夜發穠華。比他羯鼓催還捷。富貴花原勢利花。

那得才人不露才。名花亦愛向人開。一枝背面亭亭立。也對紅欄拗項來。花面皆側向人。

翠翹紅袖總嬰春。稍爲移床避韞塵。滿架名花讓人看。老夫卻看看花人。

此行專結牡丹緣。繭栗催開七日妍。看到落紅吾亦去。人言薄倖杜樊川。

西湖寓樓卽事

又向西湖泛畫船。青山綠水故依然。同思奉母蓮池日。往事俄驚三十年。余丁亥歲初遊西湖奉太夫人寓蓮池足菴。

虎邱遊罷虎林遊。人巧天工各擅優。黃篋酒樓青篋舫。西湖可惜不蘇州。

遊船無數檻前過。占得湖樓俯綠波。但我見人人不見。碧欄干外綠楊多。  
人心趨處佛增靈。祈雨祈晴有必膺。相燭檀香三竺路。一觀音養百千僧。  
年少吳郎絕妙詞。相逢真恨十年遲。瀟瀟暮雨催人別。腸斷西泠是路歧。

吳蘭雪年少奇才同遊數日。

春雨

一度來遊一度奇。始知好景不勝追。衰年敢作重來想。臨去多留疥壁詩。

春寒

連日春陰似臘寒。正當哀詔到江干。故應天亦頻垂淚。細雨如絲灑不乾。

雨中杏花

買得羊裘價十千。料應溫暖勝常年。誰知天又非常冷。依舊凌兢聳兩肩。

山行看紅葉

四海方深遏密哀。今年春色總如灰。杏花知道無人看。不待晴開趁雨開。

嘲梅

十月清霜萎綠莎。翻看紅錦絢山阿。天公也有才人習。晚景詩尤綺麗多。

正無花候拆寒苞。巧結騷人淡泊遭。若使開於紅紫內。更誰來賞格孤高。

除夕喜雪

冬暖常憂得雪遲。得於除夕尙當時。製成鶴氅無誇處。火急披肩去覓詩。  
暮雪

雪花如席壓炊烟。萬籟無聲薄暮天。我似東禽暗不語。忍寒危立老梅邊。  
所見

寒威癩疥曉侵肌。驚見驅牛飲凍池。搖手急呼莫莫莫。恐他冷飲或傷脾。  
乞活兒

手足俱無裹敗羶。蛇行蠕動路蜿蜒。憐他生已不如死。猶乞街頭活命錢。  
偶見

泥爐烟碧瓦燈紅。香火喧闐委巷中。三尺小祠七寸像。居然顧盼自豪雄。  
酒間與味堂司寇追話都門舊事感賦

春明舊輩幾人存。重話鴻泥指爪痕。絕似上陽宮畔路。白頭老監說開元。  
多雨

忽晴忽雨亂晨昏。纔苦陰寒又晏溫。一月九蒸還九曬。老夫身作地黃根。



花蝶

樊尾花穠深院藏。外邊那得遠聞香。不知蜂蝶從何覺。已自飛來過粉牆。

儒餐

士鏗煤爐老瓦盆。莫因鼎食羨豪門。儒餐自有窮奢處。白虎青龍一口吞。  
俗以荳腐青菜爲青龍白虎湯。

秦蜀

秦蜀兵氛歲再期。蒼茫天意信難知。世無杜甫能吟咏。何苦教人賦亂離。  
太平生齒日增多。天亦難供可奈何。何不教他饑疫死。卻教狼籍死兵戈。

閒極

爲愛清閒早掛冠。秀才生活辦粗完。而今閒到無聊極。臨老翻思去做官。

山塘

清簟疎簾軟水舟。老人無事愛清遊。承平光景風流地。燈火山塘賣酒樓。

僮約

僮約雖頒十數條。守門奴已出遊遨。客來剝啄無人應。只道先生故作高。

舊篋中偶檢得在京時所畫鷗北耘菘小照戲題卷後

灌園閒與白鷗親。四十年前舊寫真。只有老妻還認得。兒孫俱不識何人。  
初冬柳色

古語由來未可聽。爭傳弱柳望秋零。誰知霜露凋傷候。萬木丹黃此尙青。

近游戲書

小舫清游不覺疲。每眠杉板當牀帷。也知就木期將近。先向船艙鍊背皮。

書劍南集海棠詩後

陶菊林梅名各擅。海棠猶未有專家。放翁此意先窺破。急把狂吟占此花。

健忘

眼前僮僕或忘名。何況經書記不清。怪底近詩多白戰。征南武庫已無兵。

厭聞

三十年來把釣緝。厭聞消息說兵塵。私憂竊歎何人識。識亦徒嗔是杞人。

巨超將歸托寄京口佩香女史

香閣論詩又兩年。遙知淨業已皈禪。不妨書托高僧寄。正是清齋繡佛虔。

新築軒仍榜聽秋。我來準擬小停舟。可憐兩度過京口。只見紅欄俯碧流。

去年往來京口俱不值。

詩筆年年耐苦辛。懺除不盡是前因。女中才子僧詞客。都是名心未斷人。  
枯木禪僧印寂光。空山兀坐太荒涼。作書爲介司花女。或有天花散道場。

牡丹將開作布幔護之戲題

改砌花臺作幕遮。玉樓春花名色倍穠華。初非貴種偏珍惜。爲是前年手種花。

老去風情尙易撩。護花心力費連朝。一棚布幔當金屋。慚愧書生貯阿嬌。

題蔣立崖天遠歸雲圖

膚寸膏流漢上田。又分愷澤潤窮邊。而今斂卻爲霖手。散作餘霞尙滿天。

連日競渡再賦

競渡傳從楚歲時。爲投角黍弔湘纍。誰知千載沉淵痛。翻與人間作水嬉。  
暕雪中流爪鬣張。不徒旌旆盡飛揚。岸邊萬扇搖風處。也似金鱗閃日光。  
多少游船載豔粧。朦朧都掛繡簾藏。不教人見教人想。風過微聞茉莉香。

深幔高張俯碧流。豪門坐召四龍舟。東門鱣商孫氏蒲鞵船上常州蘆蓬船茅柴酒。慚愧書生作冶游。是日遊同人舟泛

五月十三日相傳關壯繆生辰常城例具雲車數十座作神會今歲屆期大雨竟日雲車遂不能出

龍舟猶鬪彩霞紅。又聳雲車絢半空。一雨磨刀都嚇退。殺風景。究是英雄。俗以是日雨謂壯磨刀雨。

### 江陰道中遇順風

逆風翁忽順風多。百里程途半日過。卻看來船牽纜苦。我雖自幸亦憐他。

### 放生河

放生河上放生碑。禁斷人間網苦施。可惜游儻不識字。不知來此避漁師。

游孫淵如觀察園亭愛其松石古秀正。欲題詩疥壁。適觀察以萬卷歸裝圖索題。遂牽綴成篇。請正詞館才人畫省郎。出膺使節暫還鄉。書生大有誇官處。豪擁歸裝萬縹緗。果然水木湛清華。恰稱橫陳萬卷賒。笑我方將賣書籍。卜鄰來問爾東家。

### 看山

物色難窮意想間。始知閱歷老猶慳。千形萬狀無成格。天上浮雲地上山。

### 偉兒葬金壇之夏蕭邨哭以送之

不忍將兒遽掩藏。五年棺尙殯帷堂。愛深翻惑青烏說。遠送枯骸葬異鄉。地近華陽古洞天。宿緣應許侍茅仙。此阡或便當尸解。好認前身已蛻蟬。諸子中惟汝肯堂。儒家本色陋膏粱。祇今十具牛空在。付與何人作主張。

葬同羸博見無期，魂氣由來無不之。他日乃翁游岱去，不知可有再逢時。

京口同佩香女史游招隱寺獅子窟八公洞綠蓋樓諸勝

擬爲彭宣問疾瘳，江臯不遇且回舟。誰知才女佳山水，另作秋來一勝游。費制府久病清江，聞將回江寧，故往京口候晤，而費公尙未至。

遂作此游

支筇來問病維摩，早散梨園罷教歌。夢樓已散去歌伶莫怪臨分頻執手，京華舊友已無多。

芻甫曾留屐齒痕，我來惜未得同羣。風流各自堪圖畫，君挾緇衣我繡裙。稚存半月前偕巨超練塘僧游此

舟泊太湖

峭涼時節未丹楓，萬頃晴波映碧空。星月滿天人半醉，扁舟夜宿太湖中。

山茶盛開邀去年諸同人小集

占得名花敢召賓，盤餐莫笑庾郎貧。珊瑚滿樹紅於火，我亦人間石季倫。

燕來巢

春燕飛來結壘工，笑同賃廡到梁鴻。容他夫婦雙雙住，我亦高人臯伯通。兒曹探卵恐難禁，竟不隄防意外侵。知我刑于施有政，一家童子總仁心。玳瑁無梁似野菴，慚他朝夕進風檐。聊申僮約行方便，教緩垂簾早捲簾。

蜂蝶

是誰送信洩春魂。惹得偷香賊滿園。一樣貪花輕薄性。蠶蜂強暴蝶溫存。  
春風齊入百花村。掠粉含香各飽殮。一樣採花分兩技。一收花魄一花魂。

螢入書室

炳燭焚膏念已灰。夜深暗坐眼慵開。流螢只道猶勤學。飛入書窗映字來。

題芳茂山僧寺

無山空買一株藤。競想逢山快一登。嵐翠滿庭門晝掩。有山不看是山僧。

看剃度者戲之

拈花一笑問沙門。何事圓顱髮不存。我見如來非老禿。青螺滿髻未曾髡。  
佛像俱作青螺髻。則如來未嘗髡髮也。

飯餘

飯餘一枕倚窗紗。睡起甌香小啜茶。攜得胡牀臨水坐。柳陰深處看荷花。

目力

兩目雖存力減前。臨文敢怨視茫然。自從六歲攻書起。我已勞他七十年。

簾雨

綠遍田禾不隔區。簾前又見雨沾濡。雨絲作經去聲見。簾絲緯織出幽風七月圖。

遊焦山至揚州途中雜詩

洞庭遊了又焦山。更指揚州寶塔灣。老去翻成游蕩子。蘭橈一月不曾閒。

詩翁八十尙兒嬉。遊侶居然挾兩雌。鎖骨觀音散花女。天教狂煞老頭皮。佩香悟情

鶴銘隄上贊公房。曾與吳均共對牀。回首雪鴻成故迹。瀕行爲拂舊題牆。昔與吳激竺李嵩生同遊焦山。宿巨超禪室。今激竺先歿矣。

左思賦已壓詞竄。一序何須乞士安。自是老饕多口福。累他珍饌上牙盤。左關成留飲。看饌極精。屬余題其詩本。

巨超行腳未曾迴。剩喜清師半日陪。笑指牡丹添貴種。花時日日望公來。至高旻寺。如鑑設齋。指院中牡丹數十本。皆別後添種。惜已開

過如公號矣。清涼。

虎賁曾感孔融情。爲是中郎舊典型。今日故人餘筆塚。把君臨本哭蘭亭。練塘書學。夢樓逼肖。

軟腳華筵爲我開。典衣治具意堪哀。衰年未必還相見。何忍堅辭餞別杯。既堂。

當日看花兩白頭。碧筩杯飲最風流。十年重泛紅橋榭。忍過張家高詠樓。傷松坪之歿也。

幾載相思暗淚痕。何當握手轉無言。僮奴只怪過從數。三日僑居六款門。生。

費盡遊費到處過。爲尋詩料引清哦。詩囊無句錢囊罄。大笑先生折閱多。

鼻涕

撲面風來酒力消。懶殘鼻涕掛成條。卻思年少粗豪處。一唾高於二丈橋。

歲會

歲會粗增什一錢。居然阿堵滿牀前。不知他日誰家物。煩我持籌數十年。  
看燈

何處譁聲溢市閭。葛仙橋北露華初。廣場千步春燈滿。月走游人火走魚。

紅梅閣題壁

出郭尋春羽客家。紅梅一樹燦如霞。樵陽未卽遊仙去。先向瑤臺掃落花。

觀餵雞者戲作

簸舂餘粒撒籬間。矍矍呼雞恣飽餐。只道主人恩意厚。誰知要汝肉登盤。

彭殤

彭殤相遇道塗邊。名述生前住世緣。旁有螻蛄聽暗笑。不妨童叟拜同年。

花木

誰言草木竟無知。消息能參造化奇。不待司天頒朔到。自然開落不愆期。

衰老



莫怪交遊厭腐儒。家居亦自歎羈孤。滿堂兒女聞聲避。衆叛親離一獨夫。

戲贈

氣豪畧不問生涯。冷笑他人苦作家。富貴性情貧賤命。黃齏吃了去看花。

見爭地者戲作

佔人寸地未堪耕。訟牒紛然訴不平。別有元龍樓百尺。卻無人以佔天爭。

再到西干故里

釣游歷歷舊烟村。相識曾無一個存。莫怪老錢高自置。見人一概喚曾孫。

劉松嵐觀察大觀舊嘗宰鎮安之天保縣。在余守鎮安後二十餘年矣。茲過常州借稚存來晤。且言

鎮民已爲余立生祠。虔奉弗替感賦

南徼歸來已白頭。鴻泥那復爪痕留。誰知三十餘年後。尙有遺民祝故侯。

自知無績可流傳。只有硜硜不愛錢。始識愚民原易感。不爲貪吏卽稱賢。

在任原思死葬桐。余在鎮愛其民。高事簡實。疑老於是官。不願遷也。豈期民已社。樂公不愁身後無歸處。九朵蓮花一畝宮。赴鎮必

由蓮花九  
崑而入。

水車十百屨田水入河

修蛇蛻骨枯槁多。邪許聲悲似輓歌。可惜踏車如許力。翻將田水灌塘河。年年河水灌田禾。田水今翻灌入河。絕似貧人還宿債。羊羔利較本錢多。

小暑後忽得快晴。低田水漸退。而鄉民又恨東南風大。不得速驅向蘇湖。致插秧尙有待也。詩以解之。

積雨新晴氣已蘇。又嫌風不下流驅。果然驅到鄰爲壑。我得春炊獨飽無。

### 江邊

彌望郊原白浪滔。尾閭何處泄狂濤。百川都向滄江灌。壓得潮頭不敢高。

### 少日

少日伶仃僅一身。兒孫今遂列成羣。人間米貴何關我。百萬分中也一分。

### 溝壑

溝壑災黎待斃身。相逢不禁爲傷神。若教破我慳囊救。又覺他原是路人。

### 再過城東小桃園

少年曾此屢經過。腸斷韋娘一曲歌。今日重來頭已白。不知何事淚猶多。

### 米貴

曉市聲喧似湧濤。爭營口食罄錢刀。共言米價如梯級。一步升來一步高。  
只爲人多覺地褊。平聲一人一畝尙難全。孟夫子若生今世。敢復高談古井田。承平日久。生齒日蕃。若人各百畝。安得有如許田也。

景德祥符脫亂離。小兒鼓腹老舍飴。始知斗米三錢價。總在人稀地廣時。

海角山頭已遍耕。別無餘地可資生。祇應鈎盾田猶曠。見天官書可惜高空種不成。

更從何處闢遐陬。只有中郎解發邱。或彷彿秦開阡陌例。盡犁墳墓作田疇。

勾踐當年急生聚。令民早嫁早成婚。如今直欲禁婚嫁。始減年年孕育蕃。

五風十雨惠民深。物產猶難給釜鬻。到此天心縱仁愛。也愁力薄不從心。

斗米需錢四百餘。真同珠價論鎔銖。老夫翻借誇豪富。一日廚炊一斛珠。

蔣立菴輓詩

少小交游到老成。十年以長忝爲兄。正期伴我桑榆晚。何意今翻哭後生。  
半年不斷藥爐薰。轉側常資婢僕勤。看到呻吟牀第苦。翻祈君早赴修文。  
病榻惓惓念析薪。預愁身後藐孤貧。大家都有兒孫累。誰是人間了事人。  
空中笙鶴引遊仙。此事何須快着鞭。恐我他年無伴侶。預先相待大羅天。

楊桐山輓詩

老去枯腸不作詩。作詩多是輓歌詞。寢門哭友連三日。兩淚幾如不斷絲。三日內連得錢竹汀、蔣立菴及君之訃。  
看花每歲荷開尊。精饌真過石季倫。自是老饕無口福。正思大嚼失屠門。君家杜鵑花皆名種。每開時必具精饌宴客。余嘗有詩。  
頃刻花開七七仙。歡場履鳥故依然。明年櫻筍廚誰設。灑淚東風泣杜鵑。

佳句

枉爲耽佳句。勞心費剪裁。生平得意處。卻自自然來。

春蠶

滿箔春蠶食葉肥。腹絲抽盡作蛾飛。尙餘五色文章在。留與人間織錦機。

述菴侍郎遣人送示新刻湖海詩傳所輯皆生平交舊凡六百餘人人各系小傳其心力可謂勤矣  
敬題六絕句

涉江踰嶺採芳蓀。多是題襟舊墨痕。辛苦雅輪扶隻手。故應一代仰龍門。  
有唐何止萬詩人。篇什如今幾個存。太息茫茫烟霧裏。不知多少暗啼魂。  
也是生平大願船。盡收交舊入新編。淮南賓友何多幸。得附劉安總上仙。  
網盡珊瑚也足雄。唐詩選只說荆公。由來買馬招兵戰。萬骨枯成一將功。  
往事傷心踏戰塲。選詩特爲百篇增。不知朽骨空山裏。可識歐陽序宛陵。

選趙璞函詩獨盈一卷。蓋公與璞函同從軍滇蜀。璞函獨殉難。

木果木故存歿之感倍深亦可見篤於風義矣。

對鏡親描兩翠蛾。自矜絕豔渺橫波。一從粉黛叢中過。始覺人間佳麗多。

長至日同人夜集

長至纔交薄雪飛。可無轟飲辟寒威。書生豪舉真堪笑。前面開樽後典衣。

吳穀人祭酒枉過草堂邀稚存味辛同集

裾屐聯翩總勝流。沉沉泥飲盡更籌。江天望氣人應說。今夜文星聚趙樓。  
已屆消寒九九天。燈光月影泛觥船。殺雞爲黍儒家宴。俗煞汾陽軟腳筵。  
百年人物遞當場。館閣歸來鬢各蒼。公等已皆稱老輩。衰翁得不魯靈光。  
袁才子蔣心禮錢汀禮竹總作塵。慙遺漫比後來薪。名流各有千秋在。肯與前人作替人。

冬暖

繡線雖添暖未消。想天亦怕聽寒號。晏嬰尙有狐裘在。不得披來傲緼袍。  
春令冬行暖不裘。漫憑洪範細推求。陰陽調燮何關汝。偏是書生易杞憂。  
不須深窳幻唐花。自是天心急物華。惹得柳桃俱躁進。纔看落葉已抽芽。

今年夏雨過多。低田有被淹者。高田則大熟。余有田五六百畝。散在各鄉。高下不等。及收。冬租各佃。

俱稱被淹竟抗不輸納書此一笑

我田未必水中火。因潦俱稱被浸傷。同此一區豐歉異。佃家大熟我奇荒。

早則指我田爲高阜。潦則指我田爲下隰。緣田主不知田所在。

常州鄉俗皆然。

新年

一笑貪癡鶴髮翁。新年又喜欸春風。閒尋古老人爲伴。數到淇園衛武公。

春夜看孫男女舞燈戲作

碧天如水月如霜。五丈空庭作戲場。破費買燈錢一貫。魚龍兩隊小排當。

行春五馬記南州。謝事歸來剩故侯。騶卒輿丁無一在。自攜童稚作遨頭。

兒女青紅樂事多。新年例得免譙訶。老夫恐踏唐休璟。不敢隨地戲拔河。

唐休璟借三品以上。戲拔河。隨輦踏地。

都是孫曾手自持。舞燈供我作酣嬉。笑他白傅空尋樂。只仗樊蠻唱柳枝。

筆工胡生以羊毫裹兔穎名之曰綿裏針頗馴健可書戲爲二絕

老來那得更還童。自分中書老不中。忽得銀毫濡墨寫。白頭公變黑頭公。

柔毛何意內含剛。恰與詞人寫錦囊。放出晶芒高萬丈。依然佛頂白毫光。

米貴

米貴真看逐日昂。民間一撮藉通腸。老夫家法難行處。要授全家辟穀方。

雞戲

峩冠壯距奮雄鳴。可惜單栖到五更。爲聘一雌相配匹。老夫家法最通情。

錦囊

老已中乾尙外強。嬉遊還逐少年場。怕人笑我詩才盡。特遣奚童背錦囊。

小遊仙

瑤草琪花引洞天。誤人春夢小遊仙。麻姑爪豈曾搔着。枉被方平一頓鞭。

舟行

知有烟村綠水灣。寥寥一犬吠柴關。百株楊柳千竿竹。惜不移家住此間。

二麥將收連旬大雨感賦

米價經年節節高。茅檐待哺正嗷嗷。麥秋時候連旬雨。天要殺人不用刀。

麥已歉收雨猶未止而龍舟之戲尙華豔如昔感賦

正是柴荒米貴時。龍舟仍復鬪琴麗。滿堂燕雀羣嬉處。中有饑寒世未知。

只恐饑荒在眼前。中流鑼鼓漫喧天。老夫聊亦逢場戲。不敢思量到半年。

血氣日衰竹初勸食人乳戲作

昔年乳藉養牛書見漢。供人乳今更軟飽功。驕貴莫嗔人代畜。貪癡要想老還童。

醉盤孩稚已扶牀。又費餐錢雇奶娘。黃口曾孫黃髮叟。一齊都帶乳花香。不煩燥濕効勤多。新婦居然暫作婆。若使屈尊呼乳媪。我年三倍長于他。味到寒儒始覺珍。不教涓滴漉陶巾。恐防悞作蒸豚用。莫近人間富貴人。

無聊

天以無聊困此翁。轉尋生活寂寥中。一聯未穩何關繫。竟費推敲半日功。

兒童敲背

兒童娛我度良宵。如蕨拳輕把背敲。一个西瓜分八片。阿翁大費爲酬勞。

年來市間飯盃漸小蓋窯戶工料增貴暗爲收減也感賦

盜盃新傳縮地方。午餐計數似勝常。不知腹尺還依舊。只誑咽喉不誑腸。泥胚默滅世誰知。食量殘年本暗虧。似爲廉頗誇健飯。對人只說似平時。秘方妙以縮爲盈。頓使加餐浪得名。始悟軍前增竈法。老夫又欲去談兵。



自因范士費增加。埏埴雖工器漸差。此事隱憂殊不細。五材長價到泥沙。

十月二十二日爲余八十懸弧之辰。前一日兒輩爲余演劇煖壽。是時正白菜上市。老夫方謀旨蓄。禦冬督奴婢醃菜書此一笑。

鄉風煖壽本無稽。兒輩尋歡欲借題。珠翠滿堂簫鼓沸。先生正製菜根齋。

費筠浦相公遠寄海虎珍裘。值冬煖幾至。閣束戲題三絕。裘出塞北。俄羅斯國。色黑而毛密。中土人名之曰海虎。彼國不知何名也。

故人念我冷探梅。遠贈烏茸妙剪裁。可惜溫溫無所試。寄裘不帶雪霜來。  
鄒律曾回黍谷暄。區區軟毳豈同論。相公自有調元手。裘到江南候早溫。  
擬誇鄉里小兒曹。銜耀州來秦復陶。天不許更寒乞相。不如還贈舊綈袍。

僧了凡衣狐裘大有銜耀寒儒之意。詩以調之。

狐白袈裟課梵音。漫驕儒者捉寒襟。孔夫子而無金剝。不比瞿曇滿面金。  
七條衣上帶餘羶。毳毳煌煌氣色鮮。口不茹葷身不素。佛門何處野狐禪。

俊兒供饌頗嘉余。以其脾泄病催令服藥。

子舍能供酒饌精。乃翁卻勸藥爐烹。一甘一苦雖殊味。總是人間父子情。  
久不着韉元旦。須望闕行禮而韉底霉黑以粉塗之戲作。

粉應傅而美容華。何事朝鞞底亦搽。塗抹鉛華到雙腳。先生毋乃太驕奢。正字通無搽字。然東坡云。有幾

### 西干故里

門巷依然淥水濱。釣遊陳跡黯傷神。我來便是遼東鶴。盡日曾無舊識人。

### 論詩

結習耽吟老未忘。尙隨年少角詞場。只愁後世無新意。不敢多搜錦繡腸。

### 報施

報施有定理。靜驗殊不然。但見天養人。不聞人養天。

### 同鄉舉消暑會余以齒序屢叨首座戲簡諸公

冰廚消暑彷彿南皮。首座班尊絕等夷。我欲讓人人不肯。爲嫌漸近百年期。

余不喜茹素。自六歲隨先君子書館。卽無日不肉。然每食不過二兩。今年八十餘。約計已三千三四

百斤。自惟庸姿薄植。毫無益於世。而享此口福。良可愧也。

勵志雖甘咬菜根。未嘗一日不羶葷。有何功德施人世。食肉三千四百斤。

### 夜起占星

月離于畢雨應來。翹首占星望眼開。天要殺人何與我。乃勞夜起兩三回。  
冬暖

只救人寒不救饑。饑荒那可更寒威。想天刀下留情處。尙念民間未贖衣。

草花

十笏庭齋傍水涯。鳳仙藍菊燦如霞。老知光景奔輪速。不種名花種草花。  
細碎花紋密似編。開來不值半文錢。若教巧匠金絲製。價又高懸索百千。

換衣

逝者如斯見化機。老來寒暖要防微。新秋一樣清風發。人着單衣我夾衣。

草花畧澆灌輒欣欣向榮乃知賤種尤易滋長也

草花誰澆灌。泉清偶荷滋。培培發榮始。悟六朝中正品。用寒人轉奮功名。

東籬

陸放翁舍東有隙地插棘爲藩植花木其中取陶令詩意名之曰東籬余寓齋在石橋之東隙地  
半畝亦樊爲圃雜植野卉因亦以名焉書以解嘲

陶令東籬久著稱。放翁插棘我牽藤。可憐俱附前賢迹。已是三層最下層。

秋葵

葵高二丈俯中庭。花面鵝黃一色深。誇富漫言金滿地。吾家更有滿天金。  
寓舍有二犬。余飯時只一犬來。詢知乃母犬。讓其子得殘炙也。感賦。  
一骨拋投母不爭。小彪因得飽餘烹。由來舐犢關天性。不但人情也物情。  
同牢百犬兆家和。讓食何爲只犬婆。旁有黠奴心暗笑。主人餘惠本無多。  
白荷未殘黃葵又綻戲咏

雪白池荷正映欄。葵花黃又罨簷端。豪華欲傲王元寶。上有金盤下玉盤。

卽事

五月扁舟到暨陽。茶瓜清坐但迎涼。蕭齋不覺居停久。見了秧青又稻黃。  
閒庭半畝水之涯。雜卉羣芳總麗華。來是將開去將謝。此行端似爲看花。

自嘲

衣食無憂只讀書。不知此福怎消除。祇應老罰飢腸吼。饑向陳編拾唾餘。

六言

孝先任嘲便腹。坡老爭讓出頭。光燄不能萬丈。聲名那得千秋。

金風

閒向東籬玩物華。化工消息在萌芽。金風吹滿黃金色。叢桂園葵野菊花。

枕上

何物消閒味。詩多枕上成。卻將詩索枕。枕又寂無聲。

柳色

暑退農功又築場。秋來一雨一番涼。隄邊暗換垂楊色。不是嬌黃是硬黃。

肩輿拜客憫輿夫勞瘁適食盒中有炙糕各賞三條書以一笑

雇得籃輿拜客遙。炙糕慷慨賞三條。輿夫不敢嫌慳吝。自笑朝來腹太枵。

無詩

每日耽吟到日西。幾於搜及角中驥。只愁明日無詩句。卽此無詩又一題。

花留客

雇得歸舟泊水湄。庭花連夕發妍姿。憐他似欲留儂住。臨別匆匆爲改期。

歸舟

楊舍城南一葉舟。滿途黃葉已深秋。西風自是無情物。催我過歸不少留。

少睡

十二時中神影形。三時瞌睡九時醒。如何卽此三時內。又被南柯攪不甯。

見贖衣者戲賦

一夜霜寒贖敝衣。贖來便在櫃前披。看他顧盼自雄處。回去居然衣錦歸。

放懷

放懷漫擬地行仙。屋漏微光上有天。試聽衆禽俱報曉。鴉鳴常在鷓鴣先。

昨歲除夕香遠內弟得一子書以奉賀

充闕佳氣藹春和。唱到徐卿二子歌。同是生兒君倍喜。當年相國望孫多。外舅文恭公望孫最切。

仲氏吹篪伯氏塤。長君正喜棣華繁。誰知努力相爭勝。坐使而翁又抱孫。長君培斯亦

有添丁之信。

餘酥方飲歲除杯。繡閣俄欣送子來。未到三朝先兩歲。懸知夙慧易成材。

紛紛羊酒賀親鄰。湯餅筵開喜氣新。八十四翁來發兆。上堂親撫石麒麟。

從飯館中買半雞佐餐戲書

常時嚼蠟腐儒餐。買得家禽侈食單。公膳一雙吾半隻。雖奢亦露秀才酸。

院中有芍藥而無牡丹戲書

牡丹素擅夫人號，芍藥甘居侍婢卑。堪笑先生欠莊重，風情只敢諠將離。

有以木瓜見贈者，折芍藥報之，口占二句。

山齋有清供，氣味總相若。投我以木瓜，贈之以芍藥。

敝裘

輕暖貂狐價百金，書生空作苦寒吟。一羊裘敝偏多用，日當衣衫夜當衾。本語

三月十八日檀橋門首同看小茅山香會經過

竿大逢場好治遊，小茅山會此停驂。門前來往人千萬，偷眼爭看兩白頭。  
熙熙人共樂春臺，二老相隨笑口開。不比帷車避新婦，聽他看煞子瞻來。

空雷

有名無實每成空，天亦隨人染此風。一夜怒雷轟霹靂，明朝依舊曉霞紅。

四月十一二等日大寒圍爐就煖偶書

五月披裘氣自雄，我今四月擁爐紅。天教寒士添佳話，不但冬烘夏亦烘。

寓山塘五日

虎邱山下聚烟花，畫舫歌樓遍水涯。老我亦成游蕩子，順風相送不還家。

賀蔣霽峯郡侯得孫之喜

孫早堪償得子遲。使君頭白要含飴。輸他東閣郎君福。十八青年便抱兒。  
堯母門應得寧馨。不輕誕降乃祥徵。息陰健翮培風厚。一出方知是大鵬。姓十二  
月方產。

我方重赴鹿鳴筵。爲是庚科折桂仙。八十四翁來賀喜。竟須先後敍同年。

余以乾隆庚午科舉於鄉。今又屆嘉慶庚午例。得與新舉人敍先後同年。適閱吳梅村集。知梅村亦

庚午舉人也

發科同歲本非親。聲氣相聯誼亦敦。攀附名流吾最幸。敍同年直到梅村。

隱仙菴看桂

隱仙菴桂百年柯。金粟乘秋燦曼陀。怪我出門蜂蝶繞。只緣坐久染香多。

前朝寺觀遍城坊。都出權閹勢力強。獨有此菴留隱迹。故應俗煞衆貂璫。相傳前明守  
備太監所造。

燕子磯

燕子磯邊坐結趺。嵐氛雲氣兩模糊。平明放棹棲霞去。一幅烟江疊嶂圖。

外孫湯文卿中式舉人喜賦

我方重赴鹿鳴筵。又喜東牀有後賢。一代賓興傳異事。外孫外祖敍同年。



哭蔣瑩溪

死盡交遊只剩君。君今又去更誰親。想因我命應孤獨。先降災星到故人。  
山陽笛已渺難追。數盡寧論日早遲。君去不須愁寂寞。我來應亦不多時。  
飾巾待盡便登程。屬纊惟餘我送行。眼看垂危無術救。剩將雙淚寫銘旌。

題明末肇高雷廉瓊五府巡撫李武舟家傳後

掌大山川障海濱。前朝殘局有勞臣。馬場十八先生外。又一孤忠殉國人。  
是何節度強支持。戰敗丹心死不移。并少一抔乾淨土。預題止水後園池。

五更

倚壁燈光小炷留。宵眠醒必五更頭。吾身自有時辰表。不用雞人報曉籌。

題金素中太守西瀛小築圖

家傍黃山客晉陵。寓齋十笏占西瀛。雅人所至皆名迹。況有林巒結構精。  
曾驅五馬走驂驪。澤遍閩南又濟南。縮本摹來雖尺幅。胸中海岱已全涵。

里俗戲劇余多不知問之僮僕轉有熟悉者書以一笑

箴段流傳本不經。村伶演作繞梁音。老夫胸有書千卷。翻讓僮奴博古今。

佳句

詩從觸處生。新者輒成故。多少不傳人。豈盡無佳句。

夢偉兒

多年不見見逾親。相對惟餘淚滿巾。夢斷不知何處去。殘燈無燄碧如燐。

蟻陣

萬蟻紛紛各逞強。縱強能占幾封疆。可憐不自知微末。結陣居然作戰場。

曝背

曉怯霜威犯鬢皤。擬營暖室怕錢多。牆根有日無風處。便是堯夫安樂窩。

虛名

虛名久已積年陳。猶聽無憑宿世因。難道虛空如此大。不能容得一傳人。

旬日無詩

天機雲錦朗昭回。刀尺徒勞費剪裁。怪底經旬無一句。等他有句自然來。

五更不寐

結習難消已作魔。夢回不覺續吟哦。雞初鳴到雞聲歇。枕上詩功兩刻多。

星斗闌干月下絃。沉沉梆鼓夜如年。老人夢醒荒雞叫。窗外窗中兩不眠。  
遙知霜氣颯寒空。小炷留燈一穗紅。臥榻旁偏有鼾睡。鬢童頭已觸屏風。

臘月廿四日大雪

曉窗驚見雪成堆。預卜豐登遍九垓。堪笑此翁都不管。只誇步履可探梅。

嘲梅

南梅北杏各爭妍。地氣人工有轉旋。鄧尉山前香雪海。如今真欲變桑田。  
水邊籬落影橫斜。品格高寒另一家。何事不知先避俗。官方開印亦開花。  
種梅處多改種。蓋蠶利厚也。

新歲

袖手相看畏朔風。人人都想擁爐烘。不知凍面皮皆赤。只道貪杯發醉紅。

紅梅閣探梅

滿街簫管競繁華。閨歲春遲柳未芽。趁得今朝風日好。紅梅閣上探梅花。

探春

何處探春作冶遊。教人指說老風流。影娥池上凌波步。初月梅花第一樓。

江陰別業頗有竹木之勝率題絕句

邵堯夫偶結行窩。虧得前人剩澗阿。屋宇要新園要舊。貪他老樹綠陰多。常時只想避囂塵。晞髮扶桑未有因。今日始看林壑就。可憐已是白頭人。

閱邸報有粵西宜山縣民藍祥年一百四十二歲聖恩賞給六品頂戴御製詩章匾額並建坊銀幣

恭記盛事

兩古稀年并一身。昇平人瑞有耆民。直從九老香山會。千有餘年見此人。

香山九老會。惟李元爽一百三十六歲。僧如滿九十五歲。餘皆

十。未九

人生誰不慕高年。百歲光陰已似仙。到得添籌添破格。教人不敢想隨肩。計年杖國兩輪回。省得浮提又換胎。卻笑癡頑貽背叟。君年六十我纔孩。

寒甚

寒戀重衾夢尙述。臥聽梆鼓小樓西。家風熟我刑于化。懶到荒雞亦少嘯。

元墓看梅

元墓看梅破曉寒。遲來數日已開殘。替身幸不辜來意。開遍山山白玉蘭。

到家正值山茶盛開

尋春步履遍蘇臺。帶得餘香轉櫂回。笑比秦宮花裏活。到家又值海紅開。

昨歲檀橋門首與同看小茅山會今檀橋已故香會又屆期不勝感愴  
昨歲歡場共冶遊小茅山會此停驂傷心重過烏衣巷兩白頭今一白頭

入耳賊

元禮門高萬仞岡肯教代作嫁衣裳四知金到雖磨去已是人間入耳賊有人乞副憲孫薪向地方官說情許以厚賂薪斥去之謂此言  
聞於我即是入耳賊也見姜南瓠里子筆談

城北門外有長濠一道萬柳參天綠陰可愛偶因拜客遇之率賦

晉陵城北古濠邊千樹垂楊罨野烟八十年來身未到今朝始識蔚藍天

午節前連日大雨誌喜

彌空解澤信知時城外栽秧內水嬉苦樂雖殊情則一大家都快雨淋漓

新晴民皆跨街晒衣肩輿多從桶襪下過

積雨初晴衣共晒街懸窮袴桶襪多老夫不受淮陰侮也復低頭胯下過

水閣看龍舟競渡

水嬉金翠活龍鱗遊舫千艘沸水濱舉國若狂吾亦頗屢豐年歲耄期身

暑不可耐劈瓜六片分縛於胸膈項背以敵炎歊戲書

抱冰應笑越王癡。貼得瓜瓢冷沁脾。翻似漆身爲癩子。滿身紅得血淋漓。

自幸

兩板衡門二頃田。書生願已不虛懸。慚他踏鼓東華客。高臥江湖四十年。余自四十六歲歸田。今八十五歲。里居已四十年矣。

露坐

星斗闌干夜氣清。淺涼坐到月初更。忽聞孩穉爭喧噪。撲得流螢似捉生。

又

貪涼露坐曲欄東。專候雲開月滿空。誰識月光猶帶熱。最涼還在月陰中。

譙鼓

譙鼓聲殘接曉烏。牀邊側几一燈孤。不知偶得驚人句。可有前人說過無。

偶得

果入輪迴要換胎。得新驅殼亦何哀。只嫌老馬爲駒處。八十翁翻作小孩。長晝蕭齋手一編。非關積學爲消閒。不知銅臭胸無字。何術支他日似年。

七月三十日常州新造寶塔燈觀者全集

俗愛嬉遊是晉陵。市頭米價漸加增。可憐滿肚皆藜苳。出郭爭看寶塔燈。

比鄰楊雲珊家老桂大開香透余室喜賦

比舍得芳鄰。如行慧山路。但聞桂花香。不見桂花樹。

乍冷

正愁煩暑似洪爐。忽漫秋風冷切膚。乍冷欺人吾不怕。巾箱尚有管寧襦。

相衣

老去令人服侍難。涼思披袂暖思單。相衣頻換防生蝨。又恐更衣犯曉寒。

卽景

千株垂柳綠當門。罨畫溪山是此村。何必平泉金谷墅。有濃陰處卽名園。

孫曾

孫曾羅列要遨頭。披簿呼來作近遊。吃飯穿衣吾不管。燕貽各有乃翁謀。

冒雨尋菊

節過重陽菊遍開。也須晴爽好銜盃。有何急事東籬下。帶水拖泥笠屐來。

流光

流光坐擲寂寥中。天以無聊因此翁。老去作詩多七絕。又從廿八字求工。

幻夢

卅年屏跡隱蒿萊。夜夢無端見上台。我不憶他他訪我。得非富貴逼人來。

上塚

已是橙黃橘綠天。出郊滿路說豐年。柁樓斜挂金銀鏹。知往鄉間上塚船。

皓首

皓首猶動手一編。叢殘舊稿卷盈千。虛名垂老將傳世。活一年多百十年。

秋風

十笏書齋坐浣寥。門無俗客把門敲。秋風吹落梧桐葉。露出梢頭老鶴巢。

涼枕

冰霜氣已失暄和。涼枕如何戀夢多。莫是壯心猶不已。暗中自煉鐵頭陀。億生笑余冬月尙枕涼枕不知也。余終歲皆枕此。慮頭面有虛火。

消閒

消閒還藉讀書功。已似殘燈燄不紅。年紀益增學益退。得非真个老還童。

坐守



經年坐守故書堆。一事無成信可哀。始覺孟嘗門下客。雞鳴狗盜亦奇才。

水轆頭

治坊濱遊船將泊先快  
櫓急搖三匝名水轆頭

俗愛嬉遊是虎邱。翻新市語亦風流。治坊濱裏船將泊。先放三回水轆頭。

壬申元日

新年又益海籌長。八六耆齡力尙強。笑引古人相比較。居然已勝郭汾陽。汾陽年八十五

喜晴

窮陰匝月困愁霖。我道將來必有晴。今日果如吾所料。一輪紅日滿窗明。

早醒

荒雞臛膊一燈昏。風露寒侵夜嚮晨。譙鼓未終殘夢破。人間第一早醒人。

僮約

少日曾囑蝨處禪。老來習懶漸成真。預頒僮約如軍令。除了看花不出門。

長晝

掩關長晝守蓬廬。何物消閒度索居。虧得健忘無記性。古書看過似新書。

論詩

詞客爭新角短長。迭開風氣遞登場。自身已有初中晚。安得千秋尙漢唐。  
天河

候屆農忙正熟梅。夜瞻星斗朗昭回。虧他多少銀河水。忍住空中不下來。

五月廿三日大雨四五寸誌喜

正插秧時大雨來。綠禾高下一齊栽。吳儂相見無他語。萬口同聲大發財。  
四野翻犁盡叱犍。懸知天亦卹民艱。向來錯僅屯膏慮。只道天公不破慳。

漸矮

□堂須要攝齊升。舊着衣衫覺暗增。兒輩漸長吾漸矮。聊欣跨竈有先徵。

經史翼宸故居

城東經過舊青門。天尺軒猶綠蔭繁。三步回車仍腹痛。最難忘是舊承恩。

香牛皮席

香牛皮席擬涼生。汗漬無眠直到明。笑我著書曾未寸。翻教忝竊汗牛名。

病起

風寒暑濕病相乘。此亦何妨撒手行。勞動滿城相問訊。雖非姻舊亦關情。

得雨

今年天總代農耕。欲雨而雨晴而晴。不知何福能消受。翻恐都驕作惰民。

有語皆成嘆。非魂亦作魔。聊書宵寐句。扎闔去攜訶。

昔人有書夜夢不祥書門大吉爲宵寐非禳扎開洪麻者故戲用之。

阿四

阿四頻年爲我忙。飢催羹飯渴茶湯。老來事事需人助。直把僮奴作奶娘。

曉市家家要破錢。獨尋煤店解腰纏。買來炭壑盈三百。似尙留儂要過年。

頭緒

頭緒紛如不斷絲。一程來了一程追。直須炊到黃粱熟。始是盧生夢醒時。

